





1606.

1606.

LE
PASSE-PAR-TOVT
des Peres Iesuites,
APPORTE' D'ITALIE,

Par le Docteur de PALESTINE
gentil-homme Romain.

Et nouuellement traduit de l'Ita-
lien imprimé à Rome.

par César de Plaix.



L'AN M. DC. VI.

THE NEWBERRY
LIBRARY

ner pas tout court pour en voir l'entree
 vn peu sombre. Car s'il prend la patience
 de donner iusques au bout: il en trou-
 uera le reste du paysage d'autât plus
 beau & plus agreable: & qui plus
 est, il y trouuera à toute heu-
 re bonne & agreable com-
 pagnie, pour lui faire
 passer le temps.

* *
 *





LE
PASSE-PAR-TOVT
DES PERES IESVITES.

L'ANCIEN proverbe, qui dit, Que
Verité engendre haine, se trouua a-
uoir lieu contre la bande des Come-
diens, qui nous auoyent en France si
naïfement depeint l'Espagnol, & si librement
parlé de leur propre nation. Car à leur retour à
Rome, ils furent tellement baffoués és Palais
de quelques Cardinaux, partisans de l'Espa-
gnol, qu'ils n'estoyent pas bons à donner aux
chiens: & fen alloient sur le point de faire ban-
queroute, sans vne ruse dont ils faduiferent:
qui fut de fadresser à l'Illustrissime Cardinal de
Montalto, grand Chancelier de l'Eglise, & luy
promettre qu'ils seroyent en sorte que les Fran-
çois ne fen mocqueroient iamais: que si pour
vn temps on leur auoit donné du plaisir, ils a-
uoyent senti pour combien: mais qu'en leur se-
iour de France, ils auoyent enrichi leur magasin
d'une infinité de bons comptes, que leur com-

pagnie desiroit de desployer en sa presence , s'il lui plaisoit leur donner lieu propre, & quelques heures de son loisir, fasseurans bien de lui oster la mauuaise opinion qu'il auoit d'eux, & de lui laisser vn plantureux contentement. Monsieur le Cardinal leur fit signe de la teste qu'il en estoit content, & leur dit que pour cet effect il iroit se promener en sa cassine, distâte vne lieue de Rome, le troisieme de ce mois.

Ils ne faillirent point d'aller accommoder leur theatre avec vne curiosité merueilleuse. Et cōbiē que le tout se deuoit faire en particulier, pour monstrier qu'ils n'auoyent autre dessein que de donner vn particulier contentemēt audit Sieur Cardinal; si est-ce que telles gens ne pouuans estre sans faire valoir leur marchandise, le docteur de Palestine, qui par vne bonne constellation festoit nouuellement associé avec eux, auoit fait mettre sur vne table d'attente, qui faisoit le dessus du portail, ces deux vers,

*Ille ego sum nulli nugarum laude secundus,
Quem non miraris, sed, puto, Lector, amas.*

C'est à dire:

*Je suis cet excellent Docteur,
Qui en sçais donner de si bonnes,
Que ie merite, ami lecteur,
Au moins d'estre aimé des personnes.*

DES PERES IESVITES. 7

Ceste Inscription fut causée que plusieurs estrangers de diuerses nations sy porterent à la foule, ausquels par honneur on ne voulut pas refuser la porte. Et parce qu'on auoit desia aucunement esuenté que ces gens-la, ayans à paroistre deuant personnes sacrées, auoyent choisi le suiet de mesme, qui estoit de faire vn Panegyrique sur l'heureux reestablissement des Iesuites en France: A ceste occasion y furent aussi introduits aucuns de tous les ordres Ecclesiastiques, que le Maistre des Ceremonies auoit charge de receuoir, & leur donner seance, comme vous verrez à la suite de ce discours.

Or pour donner d'autant plus de gloire à ceux qui auoyent sceu mener à chef cet 'oeuvre impossible en apparence, entant que pour en venir à bout il auoit fallu rendre patiente l'impatience du François, &, par maniere de dire, faire combattre la France contr'elle mesme: Vous verrez comme avec vne naïfueté du tout admirable, ces messieurs nous mettent deuant les yeux vne infinité de boutades Françoises: par lesquelles on cuidoit trauerfer ce Reestablissement. Dõt i'ai bien voulu aduertir le Lecteur, afin qu'il ne se desgoust point pour les pinçades qu'ils representent leur auoir esté données: ni sur ce que sourdement ils taxent nostre nation d'estre

moins religieuse que iadis, accusans les François de n'auoir pas la consideration de recognoistre qu'ils doiuent laisser tout soin de l'ame de là les monts, d'où leur vient la dispensation des biens Spirituels, & d'où on leur enuoyoit autresfois tant de repos de Conscience, qu'il n'estoit pas mesme besoin qu'ils y pensassent iamais: & qui au lieu de se reposer là dessus, quand on leur parle des anciennes coustumes, ils en veulent voir les fondemens; & si pour les arrester, on leur enuoye quelque chose de nouueau, ils n'en veulent pas: ou fils en goustent, ils s'en desgoustent incontinant: de les faire derechef mordre à la pomme, point de nouuelles.

Je vous dirai que trois ou quatre François que nous estions, voyans ces gens-la si sçauans en l'Histoire de France, fusmes curieux iusques là de remplir nos tablettes de plusieurs de leurs traicts, qui nous sembloient pouuoir vn iour seruir de leçon à nos François: m'estant deslors resolu de leur en faire part. Mais d'autant que leur part au plaisir que nous en auons eu, eust esté bien petite, ne leur donnant qu'un nud & simple recit de ce que nous auons oui dire, ou veu faire à chaque personnage sur le theatre: Je priay mes compagnons de me donner le Recueil qu'ils auoyent de leur costé des plus beaux vers
des

DES PERES IESVITES. 9

des poëtes que ces messieurs-la auoyent tiré par les cheueux pour les accommoder à leur suiet, leur promettant d'employer quelques heures de mon loisir à les traduire en nostre langue.

Bien vous aduouërai ie, que pour ce qui est du Prologue, la copie Italienne, de leur composition tomba entre mes mains : qui est cause que ie le vous donne plus entier. Celui qui le faisoit estoit habillé comme s'habillët nos gens de robbe longue au Palais, vn iour d'audience solennelle: & si on cognut bien qu'il estoit content qu'on le prist pour François. Car il n'eut la patience d'attendre que le peuple fust assis, ou, peut estre, par ce qu'il deuoit faire son plaidoyè comme deuant le Roy, la force de l'imagination lui fit croire que tout le monde demeureroit debout. Cependant sa precipitation lui seruit pour faire faire vn grand silence: parce que toute l'assistance se figura qu'il auoit quelque chose de serieux à proposer, qu'il importoit au public de sçauoir promptement. Il commença donc ainsi:

*En vne cause droite, vne defense oblique,
Laquelle on plastreroit d'un langage affecté,
Seroit comme du fard sur la face pudique,
Qui la rend vn miroir de l'Impudicité.
Le fard se voit tousiours, & si ternit la face*

*D'un teint beaucoup plus laid que celui qu'elle
auoit.*

*Et fardant le bon droit c'est alors qu'on l'efface,
Puis qu'on ne peut iuger que sur ce que l'on void.
On a fait ce tort là aux Peres Iesuites.*

*Ceux qui gardoiēt leur droit, l'ont si mal mesnagé
Qu'ils ont le desguisant démenti leurs merites,
Et sous un fard menteur leur honneur engagé.
De là vient ce soupçon, que pour peu qu'ils respirēt,
Pour peu que nos François ils ayent halenez,
Ils r'allument nos feux, & poussent & attirent
Le vent qui tant de maux nous auoit amenez.*

*S'ils reuenoyent pleurans, on diroit que leurs larmes
Coulent pour estouffer le flambeau qui nous luit,
Et enfler les torrens des malheureux vacarmes
Qui plongerēt nos iours dās l'obscur d'une nuit.*

*De peur qu'un tel soupçon en vos cœurs ne demeure,
Je cacherai le faux qui les rend odieux;
Et si la verité rend la cause meilleure,
On verra de combien ie plaide mieux pour eux.*

*Ce mystere est sacré: i'en serai l'Interprete,
Si vous daignez ouir les accents de ma voix:
Ores que vous iugiez leur besongne imparfaite,
Si verrez vous bien ce qu'ils ont fait aux François.
Grand Roy, à qui le Ciel fit la grace d'esteindre
Nos feux au fleuve d'or d'un e si douce paix,
A ce bōheur, sans eux, vo^o n'en suez sçeu atteindre,*

DES PERES IESVITES. II

*Ni guerir tant de maux, s'ils ne les eussent faits.
 Si nos bons Confesseurs, qui sçauent si bien prendre
 Les peuples par l'oreille, & les Rois par le flanc,
 N'eussent à l'Espagnol la France voulu rendre,
 Et bien voulu mourir pour vous tirer du sang:
 Non de vostre vertu, mais de vostre naissance
 Vous tiendriez seulement vn Royaume herité;
 Et cet auguste Nom de Sauueur de la France,
 Vivant en plein repos, vous n'eussiez merité.
 Vous en deuiez hommage à la secte diuine,
 Qui du mont Vatican les foudres apporta:
 Car plus de ces lieux là contre vous on fulmine,
 Le Ciel d'autant plus haut vostre gloire exalta.
 Entouré de Lauriers (qui n'ont pas peur du foudre)
 Vous auez l'ennemi esblouy & battu:
 Et ce foudre en esclair DIEV a biē sçeu resoudre,
 Pour d'un esclat de gloire armer vostre vertu.
 Ainsi plus à l'Estat ont-ils esté contraires,
 (Lequel s'ils n'ont perdu ils ont fort esgaré,)
 Tant plus a vostre gloire estoyent-ils necessaires:
 T ayans de long temps le suiet preparé.
 Vous donc, prisant l'honneur bien plus qu'une Cou-
 ronne,
 A leur sainte brigade estes fort obligé.
 S'ils vous en plaist encor, c'est celle qui en donne
 Sur le noir eschaffaut d'un Royaume affligé.
 Si vous n'en voulez plus, laissez en la semence,*

Et vostre successeur en cueillera le fruit.
 Tant que vos yeux seront les astres de la France,
 Leurs desseins retenus ils couneront sans bruit.
 Sur le plan retracé de leur route premiere,
 Sans bruit, ils mouleront un monde tout nouveau:
 Cuidans que du DAVPHIN la naissante lumiere
 Ils pourront estouffer au sortir du berceau.
 Mais puis que de ieunesse il faut de l'exercice
 A un Prince qui doit soutenir un grand faix:
 Laissez les establis avant qu'il entre en lice,
 Et puis ne craignez point qu'il en manque iamais.
 Il laissera bien là ces lointaines conquestes
 (Qui fatales aussi aux François ont esté)
 Voyant dessus les flots des ciuiles tempestes
 De son foible timon le pouuoir arresté.
 Aussi qui d'un DAVPHIN voudroit faire un Au-
 guste,
 Et qui par vostre espée un Royaume affermi
 Arrachast le second au possesseur iniuste,
 Afin que vostre Nom il n'eust point a demi:
 Ou qui delà les monts, la France estant paisible,
 Voudroit voir de son temps le François estendant,
 Par le ferme progrès d'une course inuincible,
 Faire la loy à ceux qui nous font nostre part:
 Seroit pris pour felon, ou pour quelque heretique,
 Et si seroit blasmé comme un homme trop vain,
 De vouloir qu'un François fust tousiours magni-

fique,

Au lieu qu'une grand' perte est souvent un grand gain.

Comme le Prologue en fut là , on apperçeut qu'il commençoit à hesiter. De ma part i'estime qu'il songeoit, sur quelle posture il se mettroit, conuenable au suiet qu'il alloit entamer. Mais ceux de sa compagnie cuidans que sa memoire fust allée à la picorée, firent passer deuant lui vn petit garçon qui tenoit à la main le pourtrait du miserable Nouice blessant le Roy. Quelque bõ-ne mine qu'il fist , on remarqua bien qu'il demeura estonné du coup qui auoit estonné tout le monde. Toutesfois ayant repris ses esprits, il recommença son propos, & dit:

SIRE, rendez nous donc nos Peres Iesuites,

Vous qui viuez sans peur craignez vous telles gēs?

Ils ne vous aimoyēt pas quād vous vous en desfites:

Mais ils changēt d'humeur de dix ans en dix ans.

Dix ans ils ont passē en vne dure absence:

(Or l'absence alentit le plus ardent amour.)

Mais ils monstrent assez qu'ils aiment bien la France,

Puis qu'ils pressent si fort le temps de leur retour.

Vne iuste douleur emporta la Iustice

De voſtre Parlement sur l'horrible attentat

D'un parricide enfant, qui n'estoit que Nouice,

*Et qui ne fit aussi qu'estonner cet Estat.
Ce fut un brusque amour du Roi & de la France,
Qui ne put sur le champ en France estre blasme:
Mais depuis peu de temps le monde s'en offence,
Et se plaint, en grondant, qu'on vous a trop aimé.
Qu'estrange fut le coup! mais l'Arrest plus estrange
Qui punit le Nouice, & les Maistres chassa!
Et qu'outrageusement vostre outrage se venge,
Dont la punition tant de gens embrassa!
Las! que tous d'une voix condamnent ce Nouice,
D'auoir ainsi à faux ce grand Roy assailli:
Meritant (disent-ils) trois fois ce grand supplice,
D'auoir en si grand coup si grandement failli.
Il vous aiment tout plein: mais c'est d'amour diuine:
Car ils font plus d'estat de l'ame que du corps.
Aussi veulent-ils fort que vos ans on termine,
N'estimās bien-heureux sinō ceux qui sont morts.
De peur que vous flattant au bon heur qui vous flatte
Il ne vous fust aisé de faire un mauvais pas.
Dans la prosperité (le plus souuent ingrate)
Ils veulent vous tuer pour ne vous perdre pas.
Afin de faire viure en vostre deliurance
Du secours immortal l'immortal souuenir.
S'ils peuuent, ils feront ceste grande assistance
Par nouueaux coups du Ciel de nouueau reuenir.
Et si bien tous leurs coups n'entament vostre vie,
Ils croyent neantmoins qu'ils seruēt de beau coup:*

DES PERES IESVITES. 15

*Et veulent que quelqu'un de leurs amis vous die,
Qu'il faut les contêter de peur d'un mauvais coup.
Puis l'auteur de la Paix, le grand chef de l'Eglise,
Les aimant mieux pour vous, que dās son hospital,
Dit en vous les rendant, que la France est soumise
A prendre de sa main, & le bien & le mal.*

Il vous a pardonné, il veut qu'on leur pardonne:

SIRE, cela n'est pas sans quelque bon dessein:

*Ils ne vous constent rien: C'est lui qui vous les
donne,*

Que doit-on refuser d'une si bonne main?

*Mais Harlequin ennuyé à mon avertis, de ce
que le Prologue le faisoit si long, levant à demy
la tapisserie, dit fort haut:*

Hac tua dote, Pater, filia dines erit.

C'est à dire:

France, vostre fille aisnée,

Saint pere, se vantera

D'estre assez bien appanée,

Quand on les lui donnera.

*Puis il se recacha pour laisser acheuer le prolo-
logue, qui continua ainsi:*

Ils sçauront leur leçon à leur retour d'Espagne,

Car ils ont mis le nez dans les cahiers sacrez.

Aussi depuis dix ans qu'ils battent la campagne,

*N'ont-ils point (qu'on ait sçeu) de grands Rois
massacrez.*

Que de biens produira leur longue penitence!

O qu'ils feront encor bien mieux qu'auparavant,

Pouruen que seulement réstabis par la France

Ils voyent démenti vostre grand Parlement!

Ils iront nourrissant la fleur de la Jeunesse

Sous le diuin respect deu à sa Sainteté.

Vous estes bien ensemble, aussi leur sainte adresse

Ne s'adressera plus à vostre Maïesté.

SIRE, *iamais iamais leur cousteau parricide,*

La vie de nos Rois n'osera retrancher:

Si vn Pape Espagnol iamais iamais ne cuide

La tige de vos Lis saintement esbrancher.

Mais vous pourriez vous biē nourrir en ceste craïte?

Plustoſt (second Cesar) de vos beaux ans le cours

Oblige la valeur qui en vous est empreinte

L'endurer vne fois, que le craindre tousiours.

En prononçant ces vers, ce coup & ceste crainte

Tout à coup m'ont saisi & l'esprit & le cœur.

*Viennent parler pour eux, ceux dont l'ame est si
sainte*

Que de vous pourchasser ou le coup ou la peur.

Et plus n'en dit le Prologue, qui tout changé de couleur se retira. A ce mesme instant voila Harlequin sur le theatre, moult content d'y auoir ainsi ses coudees franches, & bien resolu de resiouir la Cōpagnie: ce qu'il protesta d'entree, disant:

Receptis

Receptis mihi furere dulce est amicis.

C'est à dire :

Deusse-je vn coup de baston

Avoir la feste passee.

Je lascheray le bouton

A ma ioyeuse pensee:

Tant ie me sens hors de moy,

Quand mes amis ie revoy

C'estoit afin de garder que le peuple ne s'en-
nuyst, attendant l'Introduction des Peres Iesui-
tes, que le maistre des Ceremonies taschoit d'as-
sembler pour les faire voir à toute l'assistance en
gros & en honneur, comme de raison: puis que
c'estoit pour eux que la feste se faisoit. Aussi les
autres ordres Ecclesiastiques estoient demeurez
debout pour les recevoir & saluer, & regar-
doient de moment en moment s'ils entroyent
point. Quand Harlequin voyoit quelqu'un pas-
se, ou qui eust plus mauuais visage que les au-
tres, il lui demandoit, Monsieur, estes vous point
de ces messieurs-la, qu'il fait si mauuais voir en
France? Et fit tant d'autres petits traits de son
mestier, qu'il estoit desia au bout de son roolle,
& si ces messieurs ne parroissoient point. Alors
il se mit à les chercher, & à crier comme vn aueu-
gle qui a perdu son baston: Qui a point veu nos
Rapelez? Sont-ils dedans? Sont-ils dehors? Ont

ils pris la trauerse? Et voyant que personne ne lui en donnoit des nouuelles se mettant de plus en plus en action, le demande (dit-il) les ennemis iurez de l'ignorance, que feu sa Saincteté a fait reftablir en France, les bastons de vieillesse du Sainct Pere,

Quibus ille viros, quibus excitat vrbes.

C'est à dire.

Dont il se sert pour esueiller

Les peuples qu'il voit sommeiller

Et les villes trop à leur aise.

Personne me dira-il, s'ils se font point allez cacher, pour me donner la peine de les chercher?

Alors sortit il *Signor Pantalone*, tout en colère, qui lui reprocha, qu'à bon droit lui faisoit-on porter vn habit à la morelque, puis que tu es si fol (dit-il) de te figurer que ces messieurs-la, aujour'd'huy le phare de la leunesse, l'entretien des princes, la lumiere des hommes, se puissent cacher pour l'amour de toy: Que pour l'amour de de toy les plus pretieux ornemens de la Republique Romaine, les exquisés, tapisseries de l'Eglise triomphante, & les meilleures pieces de sa vaisselle de cuisine, soyent deuenues inuisibles. Ils ne te cherchent point, & n'ont que faire que tu les cerches. Ils n'ont garde de faire leur entree, qu'ils ne voyent d'autres gens que toy pour les ré-

ceuoir. Et prenant le galand par le poing le mit dehors, Puis se retournant vers le peuple, qui auoit assez ouy parler de la desconuenue de ces messieurs, l'oste (dit-il) ce fol de leur chemin, de peur qu'ils ne prennent ce rencontre pour vn desdain.

Omnes quibus res minus sunt secunda, magis sunt nescio quomodo suspiciosi. Ad contumeliam omnia accipiunt magis.

Omnes hi metuunt versus, odere poëtas.

C'est à dire:

Tous ceux qui portent sur le front

Le crime, la peine & la honte,

Quoy qu'on die se doubteront

Qu'on fait d'eux quelque mauuais compte:

Et craignent sur tout les reuers,

Que donnent ces faiseurs de vers.

Mais Harlequin, en possession de ne faire pas beaucoup d'estat des cōmandemens de son maistre, estoit demeuré derriere la tapissetie, & en s'auançant, le reuiens (dit-il) pour faire les honneurs de mon maistre, & prier la compagnie de ne lui faire pas ce tort de le prédre pour quelque grãd docteur, & de l'excuser si ceste fois-la il a allegué vne sentence qui ne vient point bien au subiect, auquel il l'a accommodée. Car de honte messieurs les Rapelez n'en ont point quãt au cri-

20 LE PASSEPAR-TOVT

me dont ils estoient accuséz, ils en font vertu : & de peine, il n'en est plus de nouuelles. Et n'ont plus ni doute ni goutte ni rien qui les puisse empescher de faire mieux que iamais.

Le *Signor Pantalon* ne fit pas semblant de s'estre apperceu de la reuirade du Compagnon, estant homme qui ne s'amusoit pas à peu de chose. Et à mesme instant il auoit l'œil sur vn seigneur qu'il voyoit venir de loin d'un voyage qu'il auoit fait pour le subiect de la question, lequel sa couleur, & sa taille rendoit recognoissable.

Et membris & mole valens,

Agmen àgens tacitus magnique ipse agminis instar.

Lors pour donner allegresse à la compagnie qui auoit esté long temps en l'attente de ces mesfieurs, ledit seigneur Pantalon dit,

*Ce gros garçon qui fait d'une Flesche vn estui,
Et pretend y tenir ces bonnes allumelles,
S'auance d'un grand pas, pour monst rer que
c'est lui,*

Qui nous en veut donner les premieres nouuelles.

Harlequin y ayant aussi pris garde, commença de contrefaire sa desmarche, & à la dépeindre.

*Ostendit que humeros latos, alternâque iactat
Brachia protendens, & verberat ictibus auras.*

DES PERES IES VITES. 21

Puis apres auoir fait quelques tours sur le Theatre, il adiousta,

Et personati fastus & regula morum.

Voulant dire,

Il vient d'un port audacieux,

Qui n'est propre qu'en mascarade:

Et toutesfois est gracieux

Pour conduire ceste brigade,

Reigle de toutes bonnes mœurs

Qui doit nous rendre bien meilleurs.

Le maistre des Ceremonies lui estoit allé au deuant, pour le faire entrer auant: mais il lui dit qu'il n'estoit pas à propos, qu'il ne falloit point mener de bruit, ni parler de faire entree aux Isles: que ces messieurs-la ne se menoyent pas en pompe comme les espousees: que ce sont eux qui meinent & rameinent les autres: qu'il les auoit desia fait glisser tout doucement parmi le peuple: qu'il auoit falu commencer ainsi, attendant mieux. Au surplus qu'il se pouuoit bien venter, qu'il n'y auoit bon François qui en eust sçeu tant faire.

Qui fut bien estonné, fut le maistre des Ceremonies, lequel auoit fait de grâds preparatifs, pour vne entree en parade à ces Messieurs, afin qu'une telle solennité seruist, à ce qu'aucun ne pretendist plus cause d'ignorance de leur Resta-

blissement. Entre autres choses on auoit fait habiller vne Dame, comme l'on peint l'Innocence, couuerte d'un grand crespé blanc, depuis la teste iusques aux pieds, laquelle deuoit marcher deuant eux. Apres elle, vne autre Dame pour représenter la **I V S T I C E**: à qui l'on auoit bandé les yeux & lié les bras, conduite par vne vieille dame Romaine, qui auoit la mine de ne la faire pas longue, appelée **N E C E S S I T E**. Sur vn haut escarté on auoit placé avec beaucoup de despence (comme si c'eust esté le mont Parnasse) **Phœbus** avec les neuf **Muses**, qui s'estoyent mises de rāg en vn bel ombrage au pied de la source **Castalide**, attendant les **Iesuites** au passage, pour leur en faire boire leur saoul: ensemble les faire reposer & dormir cet heureux sommeil, au reueil duquel on dit qu'on se trouue deuenü grand docteur. Puis en les licentiant, pour aller seruir leur maistre en France, elles leur deuoyent toucher à la main, & leur promettre qu'il n'y en auoit plus que pour eux. Au partir de là ils deuoyēt estre receus par tous les Bedeaux de l'Vniuersité de Paris, qu'on leur prestoit à la pareille, pour leur aller monstrier les ruines dont les Colleges des **Iesuites** deuoyent estre bastis. Et plusieurs autres belles choses que ie laisse sous silence: par ce que tout cela fut de reste.

DES PERES IESVITES. 23

Le peuple ayant senti le vent, qu'il ne se faloit plus attêdre de voir la magnificence de l'entree, qu'il s'estoit promise, commençoit à se remuer côme pour se retirer. Mais il fut retenu par le Signor Dottor, qui auoit pris l'habit d'un bō vieux Gaulois, pour represêter vn des premiers hōmes de son temps. Que faut il à ces Messieurs ? dit-il, n'ont-ils pas belle entree ? Nous la leur auons faite plus grande que nous ne faisons pas mesmes pour nos Rois.

Diuidimus muros, & mœnia pandimus urbis.

C'est à dire,

Nous faisons de toutes pars,

Pour eux, bresche à nos rampars.

Nous auons mesme commencé par le Palais de Iustice : puis qu'introduits ne pouuoyent ils estre que par la bresche, laquelle ils trouueroyent faiëte à ce sacré rempart des grands Royaumes. Toute autre forme d'êtree seroit superflue, & au si peu necessaire à la republique, que ce beau grâd pennache que vous vistes l'autre iour porter au Signor Mattamoros. Je ne di pas qu'avec le tēps nous ne les facions tout doucement passer par dessus ceste vieille police de l'Eglise Gallicane, pour examiner ses priuileges, iceux verifier, ou modifier si besoïn faiët. Je ne dis pas qu'avec le temps si l'Vniuersité de Paris faisoit trop la fas-

cheuse & la hargneuse, Messieurs les Rapelez ne la nous facent quitter tout à plat, & qu'ils n'attirent tous ses pigeons en leurs volieres nouuellement blanchies du blanc d'Hespagne, si propre à farder & desguiser la marchandise. Mais le terme vaut l'argent, & de ma part ie croy qu'ils sont contents quant à present, & qu'ils ne demandent pas tant d'honneur pour vn coup.

Comme il parloit encores, ce seigneur nouuellement imprimé, duquel a esté faite mentiõ, tira le maistre des Ceremonies par le menteau, & lui dit tout bas, qu'il falloit oster de leur compagnie ce nouveau docteur, ce compteur d'histoires, qui ne fauoit pas discerner quelles veritez sont bonnes à dire: & le chargea de defendre aux autres qu'ils ne parlassent aucunement ni d'entree ni de sortie, ni de Palais, ni de Iustice: qu'il valloit mieux en faire parler à Rome qu'à Paris. Qu'auccque ceste discretion l'on verroit pour vn matin que la Pyramide mettroit pied à terre sans dire mot.

Ce vieux bon homme de maistre des Ceremonies assembla soudain la plupart de leurs peronnages, & mit sur le bureau la proposition, de retrancher de leur compagnie le Docteur. Or d'un costé ils craignoyent de le despiter, & par consequent faire bresche à la grande reputation qu'estans

qu'estans ensemble ils ont par toute l'Italie. D'ailleurs ils le voyoyent si libre qu'il ne retenoit rien à dire, fust-ce en la presence des plus grands Rois : Aufquels, puis que les anciens auoyent tant recommandé les docteurs muets, ils sembloient leur auoir assez defendu de prester l'aureille à telles personnes, qui ne sont que causer. Et quant à cestui-ci, encores qu'il eust en main plusieurs petits prouuerbes, qui tout en riât font remarquer les fautes passees, & preuoir les accidents dont nous sommes menacez : toutes-fois il n'auoit pas la discretion de considerer que le monde se cõduit aujourd'hui par Expedients, non point par ces vieilles Maximes que les Anciens appelloient Axiomes, comme pour exemple, *Que de mesmes causes viennent mesmes effects. Que couppant le mal à sa racine, vous le gardez de croistre. Que le Prince doit punir le meschant, de peur qu'il ne soit puni pour lui.* Et vne infinité d'autres sentences, qui sont comme ces belles robbes du temps passé, qu'on garde dans des coffres, pourautât qu'elles ne sont plus en vsage. Qu'aussi toutes personnes qui disent si naïfue-ment ce qu'ils ont sur le cœur, & ne s'en retiendroyent pas pour le Pape, ne sont plus de saison. Tellement que le premier qui opina, conclud qu'il n'y auroit pas grand perte de licentier le

docteur, qui estant de ceste humeur-la n'estoit plus hominè du temps. Mais vn autre personnage, qui n'estoit pas habillé en courtisan François, maintenoit fort & ferme le contraire: disant que les Docteurs muets ne sont recommandez aux Rois & Princes, sinon pour autant qu'ès bons écrits ils ne trouuent personne qui les flatte. Ils y voyent les belles actions acquerir vne glorieuse & immortelle memoire, & les vices (que les flatteurs ont accoustumé de pallier pour faire leur fortune, & complaire à leurs maistres) representez nuement, blasmez & condamnez de toute la posterité. Qu'il est certain que ceux qui parlent deuant les princes, sans flatterie, rondement & franchement, sont equi-valants à ces Docteurs muets. Parrant qu'il falloit retenir celui de leur compaignie qui le sauoit le mieux faire, & avec telle grâce qu'il estoit malaisé de condamner en lui ceste naïfueté. En tout cas, si elle paroïssoit trop grossiere, qu'encôres seruiroit elle, quand ce ne seroit que pour dōnner lustre aux expedients plus subtils, & aux bricoles des hommes de ce temps.

Après plusieurs telles contestations, il fut en fin resolu que le Docteur demeureroit. Mais que pour monstrier qu'ils n'auoyent pas du tout mesprisé ce qu'ō leur en auoit mandé: le signor Pan-

talon (qui representoit le maistre du logis) lui remonstreroit à bõ escient que toute verité n'est pas bonne à dire, & encores qu'on la voye, que bien souuent il ne faut pas faire semblant de la cognoistre. Mais Pantalon ne voulut pas accepter ceste charge-la, iugeant (à mon aduis) en soi mesme qu'il n'auroit pas bõne grace de vouloir rendre vn autre plus fin que lui. Toutesfois pour s'en excuser plus honnestement, il remonstra que le Docteur n'auoit iamais bien pris ses aduis.

*Me quoque quod monui bene multa fideliter, odit.
Hac mihi libertas, hoc pia lingua dedit.*

C'est à dire,

*Touſiours quand ie l'ay rencontré,
Bien & beau lui ai remonſtré:
De la vient qu'il m'a pris en haine.
Ie n'ay que cela pour ma peine.
Tant ma naïfue liberté
Et mon beau dire m'ont couſté.*

Sur ces eſtrifs ſ'auança le Signor Dotore ſur le Theatre, & dit, ie voy bien que c'eſt: i'ay fait parmi noſtre compagnie ce que doiuent faire ceux qui deſirent d'eſtre bien à la Cour. Ie m'y ſuis rendu neceſſaire. Ils voyent bien que ſans moy ils ne ſauroyent faire à propos *vna franchezata*, c'eſt à dire, vne belle boutade à la Fran-

çoise: sans moy ils seroyent en ce brusque subiet
estonnez comme fondeurs de cloches. Ils n'appar-
tient qu'à moy à vous dire des nouuelles de
France: aussi suis-je ici pour cela, j'ay bien à vous
en cōpter: car puisque vous estes de loisir, & moy
de mesme, ie ne me veux pas contenter de vous
dire en vn mot que tout s'y est bien passé. Mais
ie vous représenteray aussi par où ce tout-la a
passé, pourueu que ie vous voye tous à vostre ai-
sé: car ie n'ay garde de cōmencer que ie ne voye
tous ces messieurs du Clergé auoir pris leur pla-
ce. Il voyoit que le maistre des Ceremonies n'e-
pouuoit venir à bout, quelque deuoir & diligen-
ce qu'il fist à placer tous les Ordres par bon or-
dre, & selon la datte de leur impressiō. Pour le
regard des anciens, qui auoyent quelque digni-
té, tout alloit *manque male*. Mais quand ce fut
aux nouueaux venus, on cogneut bien qu'ils n'a-
uoyent pas le sang si refroidi, qu'ils ne fissent en-
cor l'amour à madame Ambition, laquelle a au-
iourd'huy des seruiteurs par tout. Il leur en pre-
noit comme il fait ordinairement, lors qu'il y a
des gens de basse & vile extraction parmi des
nobles: ceux qui ne font que venir au monde,
croient que les anciens leur en doiuent de reste.
Or la plus grande difficulté fut pour les pauures
Capuchins: car on auoit laissé apres les quatre

ordres des mendiants vne place vuide pour les Iesuïtes, ausquels en leur absence on auoit bien voulu auoir esgard. Et apres ce vuide, l'on vouloit faire seoir les Capuchins: mais le plus anciẽ d'entreux, ne trouuant pas cela bon, ne s'y voulut pas accommoder, & en dit ses raisons au maistre des Ceremonies: entre autres que la fine fleur des beaux esprits, qui auoyent esté parmi les Iesuïtes, & generalement tous leurs hommes de seruice, qui n'auoyent pas voulu demeurer sans rien faire durant leur exil, s'estoyent iettez dans leur ordre, & auoyẽt prins l'habit de Capuchin. Que faire passer deuant eux les nouueaux rappelez, qui n'estoyent encore pour la plus part que meschans petis Regens & demi-Iesuïtes, seroit faire aller la charrue deuant les bœufs. Au lieu qu'eux estoyent ja Maistres passẽs: & que l'habit de capuchin qu'ils auoyent pris par le commandement du saint Pere ne leur ostoit rien du leur: Au contraire monstroït comme ils auoyent fait vn ou plusieurs voyages à Rome, & s'approprioyent ces vers d'un gentil Poëte, comme s'il les eust faits à dessein pour eux, & pour leur habit gris.

*Mœnia dum colimus domina pulcherrima
Roma.*

Mutarunt nostras Italia regna comas.

C'est à dire

Nous voulions voir sa Sainteté,

Et Rome la Roine du monde:

Mais nous y auons tant esté,

Nous y auons tant fait la ronde,

Et de la vertu tant apris,

Que nous voila deuenus gris.

Mais le maistre des Ceremonies , qui n'auoit point ouy parler de ceste metamorphose , prenoit cela pour vn artifice des Capuchins, qui auoyent enuie d'enjamber par dessus Messieurs leurs aînez. Toutesfois, peur de faillir, il ne voulut pas s'entremettre de juger ce differêt, lequel il aimia mieux rapporter à la compagnie: ce qu'il fit en ces mots:

Puis qu'on ne fait point d'autre entrée

A ceux qui nasquirent premiers,

Ceux de la dernière ventree,

Ces admirables beZaciers,

Sentans qu'ils n'ont moins fait d'offense,

Et qu'ils ont plus d'humilité,

Vn premier rang au moins en France,

Pretendent auoir merité.

Ioinct qu'estre premier en merite

Fut le propre de Saint François.

Mais, pour s'en resoudre plus viste,

Il en faut recueillir les voix.

DES PERES IESVITES. 31

Cet Incident estant sur le bureau, ils s'en voulurent promptement despescher, pour n'attiedir pas la compagnie: & chacun en dit son aduis, sans y songer. Le premier qui opina, dit,

*Faites assseoir, par preference,
Ceux qui plus ont fait pour la France.*

Vn autre repliqua,

*Mieux vaudroit donner le dessus
A ceux qui promettent le plus.*

Vn autre personnage habillé en Courtisan François dit,

*Qui aura la façon meilleure
La prefeance lui demeure.*

Mais le Signor Pantalon requit, auant que passer outre, que l'on discernast en quoy pouuoit consister ceste bonne façon-là. Il lui fut respondu,

*Ceux auront la meilleure mine,
Qui mieux la France mineront.
Ceux qui en denil la tremperont,
Auront la trempé la plus fine.*

Vn autre qui portoit fort impatiemment de voir qu'ils s'arrestassent ainsi sur la poincte d'une aiguille, & qui eust mieux aimé qu'on leur eust laissé prendre leurs places, sans s'en donner tant de peine, dit,

Afin d'euter tout desordre

*Placés en lieu plus eminent,
Ceux qui moins en voudront desmordre
Il n'est tel que d'estre impudent.*

Mais le maistre des Ceremonies voyant qu'on opinoit ainsi à bastons rompus, & qu'il n'en demeuroit ni plus scauant, ni mieux edifié, dit, en se faschant, qu'il falloit venir au but, & designer en vn mot les vns ou les autres. Lors Harlequin, lequel n'auoit iamais la patience de laisser parler les plus sages, fit quelques pas deuers vn Iesuite, qui n'estoit pas loing de là. Et pour monstrier à la compagnie qu'il donnoit la voix aux peres Iesuites, pour les preferer à tous autres, dit, *Ni-grantes terga ljuvencos*. Et en disant cela, il estendoit son bras sur le haut de sa robe, avec des caresses assez importunes & redicules.

Quand ce fut au Docteur à parler, il s'en excusa sur l'incompetence des Iuges, & dit,

*Nous n'en pouuons rien dire en somme.
La grande raison, la voici
Ce point se doit vuider à Rome,
Et Rome n'est pas toute ici.*

Mais le maistre des Ceremonies ne prit pas cela pour argent comptant, & protesta qu'il ne feroit pas ceste faute de laisser demeurer debout ces messieurs les Capuchins,

DES PERES IESVITES. 33

chins , qui estoient plus las que piece de la compagnie , pour les grands voyages qu'ils auoyent faits , ou qu'ils feroient ci apres. Et de deux choses l'une, ou nous les mettrons (dit-il) tous en mesme rang,

Et monachos vno nos ordine habebimus omnes:

Ou auant tout oeuvre, il faut opiner là dessus, de peur que le desordre se mettant vne fois entre les Ordres, tout aille à vauderoute. Et parce que ie me figure (dit-il) que vous autres messieurs du Clergé entendez presider en la decision de ceste question (laquelle est aussi proprement de vostre gibier) & serez biẽ aises de n'opiner qu'apres que d'autres l'auront esclarcie , ie prie le seigneur Dottore de vouloir estendre sa dextérité sur ce suiet.

Le docteur prenant la parole dit , que ceste question la seroit fort aisée à resoudre, pourueu que l'on prist la patience de l'esplucher, comme on fait des cerneaux. Premièrement donc qu'il falloit voir la Commission , l'enuoi ou deputation tant des vns que des autres. Ensemble leurs memoires & instructions. Considerer la prerogative qui leur auoit esté respectiuement attribuée, sans autrement s'arrester à l'autorité ou posterité de la datte. Je parle (dit-il) contre moi, qui suis desia de la vieille impression. Mais que

seruiroit il de mentir ? Il faut confesser que les ieunes & frais esmoulus vont bien plus viste que nous, soit à pied soit à cheual, à la cuisine ou à la dispute, à instruire, ou à destruire, à flatter, amuser, abuser, espier, tromper, trôpeter, brouiller, esmouuoir, gaster, embrazer, consumer, assassiner, & à faire tous autres tels exercices violés.

Après il faudra pour la decision de la question proposee, voir qui sont ceux du seruice desquels reuient plus de profit au public: au contraire qui sont ceux qui font plus de fautes aux Roiaumes & Estats qui en sont destitués.

Et parce que nous sommes en vn temps auquel l'apparence externe sert plus que toute la vertu du monde: mesmes qu'en France on fait ordinairement plus d'estat d'un rat pelé que d'un chat bruslé, ie suis d'aduis que nous facions vne sommaire apprise, iointe la commune renommée, sur l'apparence, bonne mine & louable contenance des vns & des autres. Tout cela sont questions de fait, lesquelles esbauchées, la question du droit ne retiendra pas long temps la compagnie.

Or messieurs, si i'estois saisi de l'original desdites Commissions, ie pousserois ce discours bien auant: mais ie ne l'ai pas. *Le signor Pantalon* dit qu'aussi n'auoit il pas lui. Mais *Harlequin* s'auançant dit qu'un iour entre Rome & Tiouli

DES PERES IESVITES. 35

vn capuchin auoit laissé tomber de la poche de ses calsons vne copie collationnee de la leur, laquelle il auoit amassée, & la pensoit auoir encor sur lui. *date la mi de gratia*, dit le docteur. Ce qu'il fit apres auoir fouillé entre plusieurs petis memoires, pour monstrier qu'il estoit homme d'affaires, aussi bien que les autres. Le docteur ayant prise & mis ses lunettes, la leut tout haut. elle contenoit ces mots:

Vos turpes, humilesq;, supplicesq;.

Plethorum sola basiate Regum.

C'est à dire;

Conuerts d'ordure & humbles supplians,

Allez des Rois les faueurs mendians:

Au surplus signée du nom du pape N. qui premier donna sa benediction au sacré patron, sur lequel leurs capuchons ont esté taillés depuis. Car encores que S. François soit leur ancien patron, toute fois depuis qu'il eut engendré ce nombre effrené de Cordeliers, les Capuchins ne prennent la source de leur institution que depuis la dernière reformatiō de l'habit, par lequel ils sont rédus conformes *sancto Francisco rediuiuo*. Car ils ne veulent pour rien du monde qu'on leur approprie la deuise que les galbontemps d'auourd'hui donnent aux Cordeliers,

Nos numerus sumus, & fruges consumere nati.

C'est à dire:

A nous compter nous faisons nombre,

Et si ne seruons que d'encombre :

Car on ne peut nous bien ranger,

Si ce n'est lors qu'il faut manger.

adioustant que le bon sainct François estoit

Paucorum hominum, & mentis bene sana.

C'est à dire :

Qu'il falloit peu de gens à leur noble prophete,

Et dont, comme la leur, la teste fust bien faite.

Voila quant à la commission & Reformation de l'habit : il faut venir au second point , & au fruiet qui reuient au public du seruice de ces messieurs:

Per quos de stygia domo erepta est

Siccis veritas rustica capillis.

C'est à dire:

Qui de l'ombre stygienne.

Ont en fin ressuscité

Ceste coiffure ancienne

Que portoit la verité.

Surquoi ie vous dirai bien, qu'ils ne sont pas tant admirés de nous qui les auons accoustumés comme ils sont des Alemãs, Anglois, Polonois, Escossois, Holandois, & autres nations qui n'ont pas ce credit d'en voir qu'à quelque bonne feste. Ie vis vn iour aupres de Mets vne troupe de

DES PERES IESVITES. 37

gentils-hommes Allemans, qui s'arrestèrent de pied coi pour considerer deux Capuchins qui s'estoyent rencontrés sur leur chemin :

Nil oriturum aliàs, nil ortum tale fatentes.

C'est à dire:

*Confessant n'auoir iamais,
En temps de guerre ou de paix,
Rien apperceu de semblable
En tout ce monde habitable.*

Cela soit dit en passant , pour monstrier l'estat, & l'estime qu'à plus forte raison nous deurions faire d'eux : puis qu'ils font tant de pas pour le public , quoi qu'ils n'y soyent non plus tenus qu'à porter la haire, la bezasse, ni ce triste capuchon fils ne vouloyent. Mais il leur plait bien de porter la marotte, pour seruir d'excuses aux autres Mendiants , deuenus si scandaleux , que le monde ne prenoit plus pied a leur badinage, Et ceux ci desirét que l'on voye, comme depuis les piéds iusques à la teste, & encores plus haut, ils sont autrement faits que le reste des hommes, & que cela leur serue de signe & de marque visible d'une grande abnegation de soi mesme, veu qu'ils ont mesme renoncé au priuilege qui est acquis à l'homme en sa creation:

*Os homini sublime dedit, cælumque videre
Iussit, & erectos ad sýdera tollere vultus.*

- C'est à dire,

*Dieu, en creant l'humain lignage,
Dressa son corps & son visage,
Afin que la voute des cieux
Fust tousiours l'obiet de ses yeux.*

Et ces messieurs sont si bons, qu'ils aimēt mieux porter la teste basse, regarder la terre, & se mettre au rang des autres animaux. Il est vrai (car il faut tout dire) qu'on doit attribuer cela à vne sainte simplicité, ou à vne simple sainteté, cōme vous aimerez mieux, iusques à donner à autrui, & ne garder pas pour eux les vertus Chreſtiennes, principalement la charité, de laquelle ils se tiennent pour tous dispensés, puis qu'ils ont renoncé à tous biens & à tous honneurs, voire se sont departis de l'vsage des biens que Dieu a créés pour l'homme, quittans la *dimitias operosiores*, pour n'auoir autre peine que d'en aller prendre chez autrui, & par ce moyen auoir l'entree de toutes les bonnes maisons, & y furer priuément, sur tout en l'absence de messieurs leurs aînés: mais nous ne deuons point prendre garde à tout cela, plustost demeurer continuellement ravis en admiration d'un port si humble & si rauallé, & d'un visage si mortifié,

Forma noui talis marmoris esse solet.

C'est à dire,

*Leur peau leur sert d'un grand emplastre,
 Qui les fait ressembler au plastre,
 Ou à un monsieur saint François
 De nouveau taillé sur le marbre,
 Ou bien sur le tronc d'un vieil arbre,
 Que le vent rompit autresfois.*

Item, Sic oculos, sic ille manus, sic ora ferebat.

Ce qui est le plus admirable, c'est que desha-
 lés & debiffés comme cela, ils ne laissent pas d'e-
 stre de grand service. Et un temps fut que s'il y
 auoit quelque bonne pratique & menée secret-
 te pour aller en Espagne, ou en Italie, c'estoit
 pour un Capuchin,

Qui longa potest dispendia ferre viarum.

C'est à dire,

*Ces messieurs, qui portent si bien
 Deçà delà mille despêches,
 Et donnent sans qu'il couste rien,
 De diners lieux nouvelles fraîches.*

Bref donnez à chaque Capuchin sa commissiõ,
Et volat admisis decolor agmen equis.

C'est à dire,

*Soudain à bride abatue
 L'escadron décoloré
 A sa cornette pointue
 En mille endroits arboré.*

Item, aliosque ineunt cursus aliosque recursus.

Harlequin , adiousta, quoi qu'on les face ainfi
tourner & retourner , cela ne leur estourdit au-
cunement l'esprit, ni la memoire:

Et retinent patula commissa fideliter aures.

C'est à dire,

Auecques leurs oreilles d'asne

Ils scauent prou bien retenir

Où il faut aller & venir.

Pour toutes ces louanges qu'on leur donnoit en
leur presence , on n'apperceut point qu'ils s'es-
meussent aucunement. Soit qu'il leur fust de-
fendu de rire, ou qu'ils ne prissent pas autremēt
plaisir à l'esbattement. Au contraire on reco-
gnoissoit bien qu'ils eussent voulu estre hors de
là , ne pouuans si long temps demeurer en vne
place, par les reigles de l'institution des Capu-
chins:

Non qui certum praecepte tenerent:

C'est à dire,

Desquels la troupe vagabonde

Ne s'attache point en ce monde

A quelque certain ratelier:

Et marmiteuse, ne s'arreste

Qu'au vireuoustes de sa questie,

Faisant de son dos son grenier.

Harlequin , apperceuant qu'ils se disposoyent à
donner sur la retraite, s'approcha pour prendre
congé

DES PERES IESVITES. 41

congé d'eux. Et voyant qu'ils ne lui disoyent mot, il dit aux plus anciens,

Agro quis statuit meo te triste lignum?

C'est à dire,

Qui m'a donné ceste souche,

Qui n'a esperon ni bouche?

Mais il ne peut tirer aucun discours d'eux,

Astrictum gelido frigore pectus erat. peut estre, estoit ce pour auoir couché mal vestus en lieu,

In quo nec Boreas ipse manere velit.

C'est à dire,

Ils sont ainsi debiffez,

Herissez & mal coiffez,

Car ils veulent sans chemise,

En lieux si froids s'heberger,

Que mesmes la froide bise

Ne voudroit pas si loger.

tellement qu'il se retire, & se tournant du costé du peuple, haussant les espaules dit,

Portentum est quoties cepit imago loqui.

C'est à dire.

Ce seroit vn miracle, voire

Des miracles de Purgatoire,

Si vne image m'en comptoit,

Et si Harlequin l'escoutoit.

Or le docteur ayant traicté le suiet du Capuchin., suiuant les trois principes des Philoso-

phes (*cioe, la formaloro, la materia & la priuatione*) il vouloit entamer le fait des Iesuites, & sur cet incident pour la preface traicter la matiere au fond. Mais le maistre des Ceremonies lui dit, puis que l'affaire des Iesuites estoit celui duquel on parloit aujour d'hui le plus, il vaudroit mieux attendre de le traicter à plein, iusques à ce qu'il n'eust plus l'obiet de ce petit différent. Et apres auoir requis messieurs les Ecclesiastiques d'en dire vn mot aux vns & aux autres, il fit pour cet effet entrer vn Iesuite, le premier de ce nom, homme d'assez bonne façon, & fort propre pour faire la planche aux autres. Puis le presentant d'vn costé, & les Capuchins de l'autre, vn des plus anciens du clergé, & qui toutesfois voyoit bien clair sans lunettes, dit, regardant premierement les Capuchins,

Je ne puis plus long temps vn estrif supporter

Qui naist entre des gens sortis tous d'une masse
Vous pour le bien de paix, porterez la besasse.

(Puis il dit, monstrant du doigt les Iesuites)

Et vous autres, messieurs, la nous ferez porter.

Telle fut la decision de cet incident. la, qui toutesfois en cuida amener vn autre. Car elle sembloit captieuse, voire suffisante pour rendre ennemis aux Iesuites ceux dont pour vn temps ils

DES PERES IESVITES. 43

pretendent de faire bouclier. Si est-ce que celui qui estoit là present ne voulut pas ponctiller là dessus, tant il craignoit que l'on lui demandast, s'il estoit desia venu pour mettre des troubles en France. Mais les autres qui festoyent glissez parmi le peuple ne se pouuoient tenir d'en murmurer entre les dents, dont le Maistre des Ceremonies (comme il estoit habile homme) fit si bien qu'on ne s'en apperceut que fort peu. Car il fit promptement iouer les instrumens de musique, ainsi que l'on fait ordinairement entre les actes des Tragedies & Comedies; de ma part ie prenois bien autant de plaisir à ouir ceste excellente musique la, que i'eusse fait à entendre les raisons, dont le Recteur des Iesuites de la Fleche eust peu endormir messieurs du Clergé, pour auoir leurs bonnes graces *ad tempus*.

Cependant sortirent les Capuchins: & Harlequin les suiuant de veuë, dit,

Duos si discordia vexet inertes,

Discedat pigrior vltro.

C'est à dire,

Quand vn debat s'esmeut entre tant de niais,

Les plus lasches de tous doiuent quitter la place

A ceux qu'ils voyent bien aller d'autre biais,

Et qui se paissent prou sans porter la besasse.

La Musique finie, voici de nouueau sur le

theatre le Maistre des Ceremonies, fuiui du Signor Dottore, auquel il dit d'un visage ouuert & content, puis qu'il estoit desueloppé de tout autre obiect, la compagnie se promettoit qu'il prendroit la peine de représenter nuement & naïuement la mine, les reparties, & les discours de messieurs les François, sur ce reſtabliſſement des Iesuites.

Il faut que ie commence ce discours (dit-il,) *Signor Dottore* par le meilleur compte du monde. C'est d'un bon vieillard de Saint Quentin qui n'auoit pas esté à Rome l'an de Iubilé, & toutesfois souſtenoit obſtinément, que Clement huitiesme aimoit trop la France pour la vouloir maintenant coiffer de tant de brouillons & dangereux espions, desquels on s'estoit si mal trouué, que le seul bruit de leur reſtabliſſement faisoit desia penser tout le monde à sa conscience. Qu'il n'estoit pas croyable, qu'un si bon Pape, qui nous auoit fait tant de bien, se voulust ainſi deſmentir ſoi-mesmes. Le voyant en cet erreur, ie ne l'y voulus pas laisser, & pour le mieueux aſſeurer qu'il n'en falloit mie douter, ie lui fis ceste queſtion:

Venator leporem, colonus hædum,

Piscator feret æquorum rapinas:

Si mittet sua quisque, quid beatum

DES PERES IESVITES.

45

Missurum tibi credis esse Papam?

C'est à dire,

*Le pescheur sortant de sa nasse
Vous fera present d'un barbeau,
D'un beau leurant celui qui chasse,
Et vostre fermier d'un cheureau.*

*Si chacun vous fait vne rente
De ce qu'il a, qu'auez-vous creu
Que le Saint Pere vous presente,
S'il vous veut donner de son creu?
Ne cognoissez-vous pas encores*

--- Amici dona Quiritis,

Qui solet insidias dona vocare suas?

Voulant dire,

*Apprenez aujour d'huy, bon homme,
Que les Papes, de telles gens
Font leurs honneurs & leurs presens,
A parler comme on parle à Rome,*

où toutes choses vont par vne succession infail-
lible.

Sic tonat iste Deus qui sine nube tonat.

C'est à dire,

*Ce sont les pierres de foudre,
Dont leurs canons & leur poudre
Bouleuersent les Estats,
Sans apparence d'orage:
Car lors qu'ils font beau visage,*

C'est lors qu'on sent leurs esclats.

Ceci soit dit en passant pour tenir la compagnie en allegresse, attendant mieux. Or pour entrer en matiere, il faut que vous scachiez qu'au commencement qu'on ouit parler en France de ceste diuine societé, on trouuoit fort estrange que le Pape Paul troisiésme eust choisi vn Espagnol estropié, *Ignacio Loyola*, & voulu que ce boiteux-la fist aller les François de droict. Et encore plus estrange la commission qu'il auoit fait expedier tant pour lui, que pour ses sectateurs, successeurs, & heritiers quelconques, contenant ces mots,

*Tu iuuenes, inquit, fracto colito crure magister,
Et rapito immeritas sordidus vnctor opes.*

C'est à dire,

*Pour bien mieux iouer vostre rolle
Faites moi des maistres d'escole,
Et des doctes escornifleurs,
Et des gentils petis hableurs,
Qui s'acquierent de la richesse
En befflant la tendre Ieunesse.*

Ceste belle commission là fut encores depuis amplifiée & augmentee par le Pape cinquiesme, qui prenant goust à leurs seruices (car on ne le vit iamais desgousté) voulu que ces maistres d'escole missent le nez aux affaires, Re-

DES PERES IESVITES. 47

Etiores Iuuenum & rerum dedit esse magistros. Depuis quand il vit qu'ils s'y fourroyent d'eux-mesmes, il les voulut autoriser, afin de les obliger de plus en plus au saint siege: & leur donna entree aux cabinets des Rois, *Penetrate aulas & limina Regum.* Apres il y eut certain departement general, qui les distribua par toute l'Europe: mesmes en fin fut leur ressort estendu iusques aux Indes, mais les mieux entendans les mysteres de la Cabale furēt despechez *Nimborum in patriam*, c'est à dire en la France, *Quæ tot populorum continet æstus.*

C'est à dire,

*Qui voit tousiours ses sillons
Couuerts de quelques nuages,
Ou battus de tourbillons
Des grands vents & des orages.*

Item, *Quæque vomit totidem fluctus totidemque resorbet.*

C'est à dire,

*Qui vomit vn mal present
Sentant au vis qu'il la blesse:
Puis en appelle vn absent
Si tost que l'autre la laisse.*

Bien est vrai que ce ne fut pas indifferemment par toute la France qu'on les distribua. Car on n'en establit point aux hautes montaignes d'Au-

uergne, Rouergue, Prouence, Dauphiné, Gi-
vaudan, Velay, Forests, & autres de difficiles ac-
ces: Et ce pour quelques bonnes considérations
desquelles i'appris le fondement par occasion,
passant Sain& Flour au haut Auuergne, où les
habitans ayans demandé vn College de Iesuites
il leur fut fort bien refusé, & respondu

*In steriles campos nolunt iuga ferre iuueni,
Pingue solum lassat: sed innuat ipse labor.*

C'est à dire,

*Ils ne labourent point la campagne infertile,
Plustost le plan secon& d'une opulente ville.*

*Vrai est qu'un terroir gras les tiét plus harassez:
Mais d'un travail qui plaist on n'en peut pren-
dre assez.*

Or ayant appris la raison pour laquelle ces mes-
sieurs ne s'aiment qu'és endroits

*Vbi pinguem diues opacat
Ramus humum,*

C'est à dire,

*Où les champs que Ceres aux blonds cheueux nous
dore*

Rehaussent leur honneur du riche email de Flore.

Comme c'est le propre de nous autres Philo-
sophes, non seulement de sçauoir que la chose
est, mais aussi de cognoistre la cause pour laquel-
le elle est: Je voulus sçauoir d'où vient que ces
messieurs

DES PERES IESVITES, 49

messieurs sont ainsi esparpillez par le monde, & esloignez les vns des autres? Ce qui me sembloit estre contraire à la profession qu'ils font de viure en S O C I E T E. Et faisant vn iour ceste question à vn homme qui les cognoissoit bien, il me respondit,

*Quid mirum toto si spargitur orbe? iacere
Vno non potuit tanta ruina loco.*

Voulant dire,

*Il faut bien que leur troupe abonde
Iusques aux derniers bouts du monde.
Car de prendre au monde vn milieu
Ou toute leur bande s'assemble,
Ce seroit en trop peu de lieu
Loger trop de malheur ensemble.*

Sur le champ Harlequin, qui est fort prompt en toutes ses reparties, adiousta,

*S'ils sont espars par l'vniuers
D'une Catholique affluance,
Nous serions bien faicts de trauers,
Si nous n'en auions point en France.*

Le docteur reprenant la parole, la premiere fois, dit-il, qu'ils y vindrent, leur histoire fut fort triste pour vn temps. Car l'vniuersité de Paris ne vouloit pas d'eux, la Sorbonne non plus. Et les Ecclesiastiques crioyent qu'il faloit pratiquer la regle qu'on donne à ceux qui plantent, Indul-

gendum ordinibus: & non pas mettre les ordres si espais les vns sur les autres. Et des lors ils eussent esté renuoyez chez leurs parens, sans la protection de feu monsieur le Cardinal de Lorraine qui auoit enuie de faire d'une pierre deux coups. Ce fut lui qui les mit au monde auant qu'en partir, & qui les laissa ancrez en beaucoup de lieux, & installez aux bonnes graces de ses plus proches parents, & iceux dans les premieres charges de ce Royaume. A ceux-là ils acquirent depuis par leurs diligences force bonnes villes, & des prouinces entieres, tant ils atoyent bien instruit les peuples à receuoir le *Brutum Fulmen* du Pape Sixte, & à y deférer d'auantage qu'aux loix fondamentales de ce Royaume. Je ne vous diray point ce qu'ils ont fait durant la guerre. Car mon dessein est de passer sous silence toutes les annees de la Ligue, dont le souuenir est trop cuisant pour estre ramené sur ce Theatre. Mais depuis la paix ils ont esté portez de ceste belle ambition de faire voir à toute la Chrestienté qu'un bon apprenti, au partir de leurs mains, en fera plus que le plus hardi moine qui ait iamais esté, iusques à se mettre en effort d'esteindre la lumiere de ce grand Roy.

Or la Iustice souueraine, punissant vn tel paricide, ordonna la structure de la PYRAMIDE,

DES PERES IESVITES. 51

de laquelle vous auez tant ouy parler, pour vne
perpetuelle memoire que ceste face Royale, la-
quelle s'estoit infinies fois portee dans le danger
pour le salut de la France, auoit esté par vne ad-
mirable deliurâce garentie d'une si horrible tra-
hison. Ceste structure ne fut pas faite sans parler
de ces messieurs, mesmes on dit quelle fut prin-
cipalement dressée pour eux, & pour leur don-
ner à tous leur congé auant qu'ils le demandas-
sent. Et sans cela ils n'auroient pas cet honneur
d'estre aujourd'huy *Rapelez*, alias *Renuoyez*, pour
seruir leur quartier. Car il seroit malaisé de dis-
cerner qui sont ceux qui ont plus auancé leur re-
stablissement, ou ceux qui tiroient du costé de
France, ou ceux qui pouffoyent à la roue en Ita-
lie: tant vous eussiez veu les peuples embeson-
gnez pour eux, pattelinez de longue main de
leurs promesses. *Pollicitisque fauens vulgus*: le
monde, qui croit en paroles, les esleuoit iusqu'au
troisieme ciel: ce qui donna occasion à vn fort
habille homme Espagnol de s'en moquer plai-
samment, & d'accommoder à ce subiect ce vers.

Quos penna stridente grues ad sydera tollunt,

C'est à dire,

Le prouerbe s'est trouué faux

Que le monde ne soit plus grue,

Faisant cas apres tant de maux.

D'une secte si malotruë.

S'ils ne pouuoient aller, je croy que les François les porteroient, en recognoissance de leurs seruices si signalez. Mais que trainez, que portez vous les verrez tantost,

Attulit ipse viris ablatum casus honorem.

C'est à dire,

La perte de tout honneur

Les a remis en faueur

Car il voyoit venir le Signior Pantalon avec quelques vns de ces Messieurs, qui passés, ou du moins bazanez & recuits du Soleil d'Espagne, alloient faire les logis à Lyon, Dijon, & la Flesche. Il les entretenoit en chemin, & entre autres choses parlant de leur faueur, il dit au Recteur de la Flesche, pour lui donner courage, & r'asseurer son visage, qui sembloit encor tout farouche,

Ante fores stantem dubitas admittere famam?

Voulant dire,

Quoy? vostre gloire est-elle morte?

Non, non: vous estes trop accorts.

Voudriez-vous laisser là dehors

L'honneur qui heurte à vostre porte?

Peu à peu ils commencerent à s'esparpiller, r'assurez par tels & semblables discours dudit Signor Pantalon, lequel auoit en ses mains vn grãd

parchemin, où estoit escrite en bons termes la loy d'Amnistie, où il leur monstroit toutes leurs offences, mises au rang des pechez oubliez, & nō aduenus. Et de l'autre costé, renuersant son parchemin, il leur faisoit voir force belles esperances. Puis il les licentia, afin qu'ils s'allassent accommoder. Apres il voulut bien faire part à la compagnie des discours dont ces messieurs l'auoient entretenu en chemin, principalement des faueurs que sa Saincteté leur auoit fait spécialement: comme les r'enuoyant en France, elle leur auoit dit,

I decus, i nostrum, & melioribus vtere factis.

Comme qui diroit,

Allez enfans à la bonne heure.

Allez sous planette meilleure.

Et en leur donnant leurs derniers memoires avec sa benediction:

✠ *Ferte citi flammis, ✠ date vela, ✠ Impellite remos.*

Mais comme ce vers là ne fut pas mis en Italien, ie ne le mettray pas en François: peut estre contient-il vn secret qu'il ne faut pas que tout le monde entende. Le signor Pantalon voyant qu'il n'y auoit François, ou qui ne dist sa ratelee là dessus, ou qui n'en secouast les oreilles, remonstra avec beaucoup de grauité, queregar-

der plus à l'offence qui pouuoit auoir esté faite
au Roy par ces pauures bonnes gens-la seroit
deformais (voyez comme le monde va) offen-
fer la dignité d'un si grand Roy,

Aduersis rerum immersabilis undis,

C'est à dire,

Duquel on n'a point ven au plus fort de l'orage

Les flots impetueux engloutir le courage.

Et qui porte autour de son diademe , *folia haud
vllis labentia ventis,*

C'est à dire

Les feuilles du laurier, qui superbe enuironne

Le dosme triomphant de sa double couronne,

Au vent & à la pluye on void le plus souvent:

Et si ne dechet point pour pluye ne pour vent.

Toutesfois vous direz (dit il) au langage & à
la contenance de messieurs les François, qu'il n'y
a si meschant petit disciple de Iesuite qui ne soit
capable de faire tomber ce chapeau de triom-
phe, lequel met aujourd'hui la France en plus
d'honneur qu'il n'en demeure à tous les autres
Estats du monde. Au lieu qu'il faudroit argu-
menter ainsi, à *maiori ad minus*:

Si plusieurs grandes armées, que sa Maïesté a
euës sur les bras l'espace de dixsept ans, & les
dangers de plusieurs grands sieges où il n'a point
espargné sa vie, n'ont peu esbranler la dignité

DES PERES IESVITES. 55

d'un Prince si Auguste, moins doit-on craindre quelle le puisse estre par vn pauvre prestre rapelé, qui n'espere ni part ni quart en sa succession:

L'antecedent est veritable:

Aussi est donc ceste consequence necessaire, Qu'il ne faut pas qu'un grand Roy craigne un petit couteau.

Ce poinct donques est vuidé par la loy publique, qui fait oublier tout le passé. Par l'Experience, qui nous faict voir qu'un malade reuenu en conualescence ne se souuient plus quelles choses lui sont contraires: & par la necessité de ce dernier argument. Par ainsi qu'on ne parle plus de blesser ni d'assassiner les Rois. Car si vous me veniez encor charger l'estomach de ces viandes de dure digestion,

Ventre Sainct George,

Vous me feriez rendre ma gorge.

Gardez vous en-bien, Signor Pantalon (dit le Docteur, qui r'entroit lors au Theatre) car il n'est plus nouvelle de tout cela en France, les François ne sauroient pas mesme garder vne dent à ceux qui font rompre celles de leur Roy. Ils ne parlent plus que du lieu, du temps, en quel nombre, & par quels moyens ils restabliront ces arracheurs de dents.

-- *ea cura quietos*

Sollicitat:

C'est à dire

Sans cet affaire qui leur pese,

Ils seroyent par trop à leur aise.

Je cognois bien qu'ils en sont fort empeschez.
Car de les enuoyer en gros à la Cour, où l'on
dit qu'ils sont si bien venus, ce seroit trop ouuer-
tement les exposer en risec.

Atria magna colant: vix tres aut quattuor ista

Res aluit: pallet cetera turba fame.

C'est à dire,

Qu'ils allassent en gros en ces chambres Royales!

*Trois ou quatre peut estre y seroyent bien leur
main.*

*Mais un nombre confus, d'hommes maigres &
pastes*

Affameroit la Cour, ou y mourroit de faim.

Item,

Rexque salutantum totis vomat adibus undam.

C'est à dire,

Et le Roy voyant sa Cour,

De nouueau ainsi bordee,

Vomiroit toute l'ondee

De ces donneurs de bon iour.

Il vaut

Il vaut donc bien mieux qu'il n'y en demeure
qu'un.

Melior vacuâ sine regnet in aula.

C'est à dire :

*Aumoins que le meilleur regente en ceste Cour,
De tout autre Docteur à present desmeuble.*

Omnia solus erit,

Et tacitus pasci, si possit coruus, habebit

Plus dapis, Et rixa multò minus inuidiaque.

C'est à dire:

Et s'il eust esté si habile

De se paistre, sans tant crier,

Il n'en eust pas attiré mille,

Qui ne font que le descrier.

Combien qu'en auoir plusieurs, seroit bien
le plus certain moyen pour reformer la Cour.
Car il n'y a courtisan qui ne deust auoir son Ie-
suite, qui seroit vn beau commencement pour
entamer vne reformation generale. Vn hom-
me seul n'est rien : & vn Iesuite à la Cour se-
roit la lentille d'Esope. Mais quand lui seul
auroit plus de vertu que tous les autres Cour-
tisans ensemble, tousiours aurois-je peur qu'à
la longue on lui vinst faire ceste question, autre-
fois faite à vn qui estoit trop homme de bien.

58 LE PASSE-PAR-TOVT
pour vn Courtifan:

*Vnde miser viues? homo fidus, certus amicus:
Hoc nihil est.*

Qui vaut autant à dire que,

*Mon pauvre ami, que fais-tu à la Cour,
Toy qui m'as tant la mine d'un preudhomme:
Tu as choisi vn fort mauuais seiour,
Où la vertu ne sert de rien en somme.*

Il est vray que si vn autre auoit fait le voyage des Indes, & qu'il sceust tous les tenans & aboutissans de ceste sanglante histoire de tant de millions d'ames qui y ont esté esgorgées par les Hespagnols, & qu'il en sceust bien faire le compte, & discourir en si bons termes des singularitez qu'il a veues en sa nauigation, qu'on aimast mieux le croire que d'y aller voir: Peut estre qu'on le tiendrait pour homme de bonne compagnie: mais encores, au bout de tout cela, si Harlequin le rencontroit avec trois ou quatre courtifans, il ne se pourroit tenir de lui dire,

Delectas Philomusc, non amaris;

C'est à dire.

*Vos discours sont moult delectables,
Mais scachez que nos courtifans*

Ne seront pas vos partisans,

Pour tous vos contes admirables.

Ce n'est donc pas leur plus court, d'estre à la Cour, encore que pour vn commencement ils s'en trouuent le mieux du monde, & quelle soit plus belle que la moitié de leurs colleges, voire que,

Dimidium facti qui bene cœpit habet.

C'est à dire,

Ceux qui ont si bien commencé,

Ont à demi l'œuvre aũancé,

De leurs connillantes approches.

Mais vous, Signor Pantalone, qui auez eu tout loisir de les entretenir, qu'auuez vous en cela recogneu de leur inclination? en quel lieu est-ce qu'ils s'aimeront le plus? Car cela depend d'eux, puis que les François sont resolu de les contenter. Je leur ai bien fait, (dit le Sieur Pantalon) plusieurs autres questions, mais ie ne leur ai pas demandé cela. Car des que ie les ay abordez, ie leur ai demandé des nouuelles: Entre autres choses, A quoy ils auoyent passé le temps à Rome? Si vn meschant homme amande pour y aller? S'ils en sont reuenus comme ils y estoient allez? S'il faisoit point meilleur en Hespagne? Quelle bisbille ils auoyent eüe avec les In-

quisiteurs ? S'il faudroit point assembler de Concile là dessus ? S'il se parloit point de nous rendre le Royaume de Nauarre, ou s'il nous faudroit caler la voile, & laisser le monde comme il est ? Si les bleds de France leur ont fait grand bien l'an passé ? Combien les Pais bas leur coustent tous les ans, l'un portant l'autre ? Si la perte de l'Ecluse auoit point gasté les moulins de l'Archiduc ? Si on a point descouuert que le Comte Maurice eust enuie de prendre Anuers ? Si monsieur de Sa- uoye aimeroit pas mieux faire son entree à Geneue de iour que de nuict, afin qu'il n'y ait plus de tromperie en son faict ? S'il est vray que les Iesuites ayent fait le trou, par lequel le Turc est entré si auant en la Chrestienté ? Si l'Empereur n'en veut point ouïr parler, comme l'on dit ? Si avec le temps les affaires iront mieux ? Et plusieurs autres questions que ie leur ay faites, pour recognoistre s'ils sont si sçauans qu'on en fait courir le bruit. Mais, croyez moy, qu'il n'en faut point chercher d'autres pour l'instruction de nostre Ieunesse : car ie ne pense pas qu'il y ait gens au bout du monde qui en sachent tant qu'eux, ne qui fassent mieux valoir leur marchandise. Et si ie croy fermement, que pour peu qu'on les en presse, on les disposera à mon-

DES PERES IESVITES. 61

strer à nos François tout ce qu'ils en sçauent, & qu'il sera bon de les occuper à cela, suyuant cest e belle regle,

Da vacua menti quo teneatur opus. C'est à dire
Donnons leur quelque affaire en France,

Qui leur serue de contenance.

N'auriez vous point peur (dit Harlequin) qu'ils prennent opinion que nous nous voulions mocquer d'eux, & les ramener *ab equis ad asinos*, des affaires d'estat à vne instruction puerile?

-- *Quos maioribus ire per altum*

Auspiciis manifesta fides.

C'est à dire

*Il faut n'auoir plus de memoire,
Ou certainement il faut croire,
Puis qu'ils font voile en nostre mer,
Que c'est sous plus grande conduite
Que l'on void leur flotte reduite,
A nostre ieunesse escumer.*

Flaminibus venti maioris ituri.

Mais le Docteur prenant la parole dit, que nonobstant tout cela il s'asseuroit bien que les Iesuites ne seroyent pas si desdaigneux, qu'ils ne se missent à enseigner nostre ieunesse comme en passant leur temps, & en esperance que le fruiet des premieres impressions croistroit avec l'aage de leurs escoliers.

Que la peine seroit à y disposer les François lesquels ils auoient appris faire des grandes considerations là dessus. Car quant au general de la France, vous diriez qu'apres tant de ruines elle demenderoit plustost que force ieunes gens se missent à estre maçons, charpentiers & recouureurs, que non pas à apprendre à faire les Philosophes & les suffisans. Puis les grandes villes, qui ont senti que vaut l'aune des seditions, ne s'accordent pas lors qu'ils sont en leurs maisons de la ville pour receuoir, loger, establer & establir ces messieurs, comme à eux appartient. Les marchans ne parlent plus de faire quitter leur trafic à leurs fils, pour apprendre les finesses & les distinctions des Iesuites, sans esperance d'autre fruit que d'estre mieux duiçts à la dispute contre les Protestans. Voir l'vsage de telles disputes ne leur agree aucunement, pour la crainte qu'ils ont qu'elles se changent en ces vieilles querelles qui ont si souuent fait rompre le commerce, & produit entre les marchans tant de banqueroutes. Or marchant qui pert ne peut rire. Ioint que dans les grandes villes il y a des hommes d'entendement, qui regardans plus loin, disent, que nourrir ainsi les ieunes gens à la dispute, c'est former en leurs esprits vne habi-

DES PERES IESVITES. 63

tude à contention, engendrer en leurs ceruelles des semées de diuisions, & principalemēt nourrir & animer en eux ceste haine contre aucuns de leurs concitoyens, laquelle aux prix de tant de sang la prudence & sage conseil de nos Rois ont en fin estouffée, pour nous amener à la tranquillité presente.

Par ainsi que tout homme qui voudra faire comparaisō du temps present avec le passé, conclurra qu'il ne faut pas acheter si cher toute la science des Iesuites, de laquelle ceux qui ont voulu voir le fonds, nous rapportent qu'elle consiste en trois choses : la premiere est, de contenter fort leurs escoliers : la seconde, de contenter leurs parents : la troisieme (que ie deuerois auoir mise au premier reng) de se contenter eux mesmes.

Et pour vous dire comme ils interpretent & accommodent tout cela, il faut que vous entendiez, encor que leurs escoliers ne soyent qu'à peine grammariens, ils leur font accroire qu'ils sont desia grands docteurs, & qu'ailleurs ils n'en eussent pas tant appris en dix ans, qu'ils ont fait en deux, sous eux. Et ce n'est pas merueille aussi, si au partir de leurs mains ils se trouuent tous aussi grands personages les vns que les autres.

Dant inania verba: dant sine mente sonos.

Comme qui diroit,

C'est la plus grande de leurs peines,

De donner des paroles veines,

Et remplir les esprits de vent.

Ils contentent aussi tout plain les peres & les meres, par le bon & louable recit qu'ils leur font de leurs enfans. Ils les en font pleurer de ioye, attendant mieux. Car les bonnes gens croient fermement que leur tesmoignage en vaut deux, & afin qu'on les leur laisse plus long temps, ou qu'on leur en donne d'autres,

Pingue pecus domino faciunt,

C'est à dire,

Vostre bestail, fust-il hectique,

Par leur nouvelle Arithmetique

Ils vous font trouuer gras & plein.

Ils se contentent aussi fort eux-mesmes, entant que, pour la pluspart, leur GRATIS: c'est de gratter si bien qu'ils se payent en fin par leurs mains, neantmoins avec telle adresse, qu'un bõ homme, ou vne riche vesue, qui leur auront donné, ou promis laisser là pluspart de leurs biens, croiront encor estre grandement obligez aux Iesuites.

Hæredem Fabius Labienum ex asse reliquit,

Plus meruisse tamen se Labienus ait.

C'est à dire.

Vn riche vieillard autresfois

Leur laissa tout son heritage:

Ces messieurs disoyent toutesfois,

Qu'il leur en deuoit d'auantage.

Mais ie vous dirai, couste & vaille, puis qu'ils ont vne si bonne methode en leurs instructions, qu'ils font apprendre & croire à la ieunesse tout ce qu'ils veulēt, iusques à l'obeissance que nous deuons à nos Rois exclusiuement: voire par vne miraculeuse operation, qui n'est propre qu'à eux, ils sçauent si bien alambiquer les esprits de la ieunesse, qu'ils lui ont fait comprendre vne leçon ci deuant incognue à nos François, c'est à sçauoir que *l'aune à laquelle se mesure l'autorité des Rois de France sur leurs suiets, ne bouge de Rome, & n'en bougera, si quelqu'un ne l'en oste.* Iugez si c'est sans cause que leur maistre presse tāt leur restablissement, & s'il ne monstre pas bien par là comme il aime la France, voire qu'il veut & entend que toute nostre ieunesse passe par leurs mains. Tellement qu'encores que les François se passeroient aussi bien des Iesuites, qu'un gendarme de sabots, si faut-il conclurre, qu'il nous en faut tout plein, puis qu'ainsi en a esté arresté par le saint Pere, *Quo multa magna que se-*
cantur indice lites:

C'est à dire,

*Qui sçait à son profit, d'une grande prudence,
Saintement decider les causes d'importance.*

& qui à present que le ieu est descouuert , n'a trouué aucunes personnes, à qui plus confidement il peust donner ceste honorable commission de pourvoir, *nequid respublica detrimenti capiat*, qu'a ces messieurs, qui en l'acceptant ont promis merueilles, & de faire tât par leurs iournees, qu'une puissance absolue demeure au S. Pere, *tam in temporalibus quàm in spiritualibus*, suiuant ceste sainte deuise qui lui est meritoirement attribuee,

*Cui uolet hic fasces dabit, eripietque curule,
Cui uolet importunus, ebur.*

C'est à dire,

*Bien seruis, comme seront
Les Papes qui nous auront
Pour leurs esclaués fidelles,
Des Rois ils se desferont,
Et, s'il leur plaist, nous feront
Force Royautez nouuelles.*

D'abondant,

*Illa inclyta Roma
Imperium terris, animos aquabit Olympo.*

C'est à dire,

*Rome qui a tendu les bras de son empire,
Autant que le grand rond de la terre s'estend,*

DES PERES IESVITES. 67

Sur le niueau des Cieux adiuſtera ſa mire:

Au pouuoir du grand Dieu ſon pouuoir limitant.

Ce que ie vous en diſ, eſt pour vous faire cognoiſtre en quelle eſtime ils ſont à l'endroit de ſa Sainteté, afin que les François ne facent pas leur compte de les mettre à tous les iours, & ne ſe figurent nullement que les Ieſuites puiſſent ci apres receuoir indifferemment les enfans de baſſe extraction qu'à toute extremité, & faute d'autres. Car ils ont bien reconnu la faute qu'ils ont faite ci-deuant de ne ſeſtre adreſſés à des enfans de bonne maiſon, & en ont eu vn grand regret : ayans bien veu depuis que la force de ce grand Royaume conſiſte en la nobleſſe, laquelle a eſté ſuffiſante pour reſiſter aux confuſions & reuoltes que les deux autres ordres y auoyent introduits: au lieu qu'ils ſeſtoyent figuré que le peuple vne fois ſorti des limites de raiſon, & bourſoufflé du vent de leurs predications, pourroit non ſeulement donner la loy au reſte du Royaume, mais le royaume meſmes au meilleur ami des Ieſuites. Et ſçauiez-vous comment ils plaignent les leçons tant elabourées qu'ils faiſoyent ? Elles euſſent bien eſté aſſez bonnes pour les enfans les mieux nés & iſſus des premieres maiſons de France. Car ils enſeignent touſiours ſur toutes choſes à leurs eſcoliers,

Magnificè de se sentire, c'est à dire, d'auoir grande opinion d'eux-mesmes. Or il se rencontroit par malheur, qu'ils estoient pour la pluspart enfans de frippiers, banqueroutiers, vsuriers, crocheteurs: en somme, ou de grands trompeurs, ou de grandement trompés. Tellement que ce n'est pas merueilles s'ils n'en ont peu retirer le fruit digne de leur labeur, *Illa erat agricola mēsis iniqua suo*. Toutesfois encor qu'ils trauaillassent sur vn mauuais suiet, si n'ont-ils laissé de faire tout ce qu'ils ont peu: & si leurs escoliers ne sont pas deuenus grands Philosophes, pour le moins l'ont-ils bien cuidé estre. Et s'ils n'ont esté des plus capables, si n'ont-ils pas laissé d'estre tousiours des premiers & des plus coupables en toutes les esmotions, reuoltes & attentats, dont vous auez oui parler. Mais, croyez moi, que la lie du peuple, ceste canaille qui n'a pas eu le courage ni l'assurance, quand ç'a esté au fait & au prendre, de se laisser mourir de faim, ni de subir le ioug de l'Espagnol (quoi qu'on ait sceu faire) n'auront deormais autre chose d'eux que des exhortations publiques: encor ne leur diront-ils que ce qu'ils voudront que tout le monde sçache, & ne prescheront pas deuant le peuple, comme ils feroient bien deuant les grands. Ils n'ont pas en toutes chaires vn mes-

DES PERES IESVITES. 69

me discours : ils ont trop d'esprit pour y aller ainsi *grosso modo*.

Est vox mutandis ingeniosa sonis.

C'est à dire,

Ils sçauent fort bien manier

Et leurs langues & leur gosier,

Et faire force beaux passages

De mille discordants accords,

Et de mille accordants discords,

Animans leurs nouueaux ramages.

Desormais ils se laisseront principalement posseder à la Noblesse. Car ils ne sont pas si degoustez, ne si despités, pour chose qui se soit passée, qu'ils ne soyent contens de se lier de nouueau aux plus grandes maisons, & aux parties dominantes, faites seulement passer par leurs mains ce qui vous est le plus cher.

Et quoscunque feret cultus tibi fundus honores.

C'est à dire,

Mais faites leur donner de grace

Des enfans de meilleure race,

Les beantez de toutes vos fleurs

Et entre vos fruiçts les meilleurs.

& en vn mot,

-luménque Iuuenta

Purpureum:

Le respons pour eux qu'ils les receuront à la charge que vous-vous en reposerez sur eux en

tout& par tout, sans que vous-vous enqueriez si vos enfans oublient point à bien faire la Reuerence. Car puis que les Iesuites pratiquent la Cour, vous deuez croire qu'ils apprendront assez de ciuilité pour eux & leurs escoliers.

A ceste proposition vous eussiez veut tout le monde s'en entre-regarder. Les vns s'en rioyent, les autres s'en faschoyent: mesmes ceux qui auoyēt leu autresfois aux histoires de France, que ce qui auoit principalement mis nostre nation en honneur, auoit esté ceste louable coustume, pratiquée du temps de nos peres, à sçauoir de mettre les enfans des gētilshommes pres des Gouverneurs, Seigneurs, Cheualiers & Capitaines, que leur valeur & merite auoit rendus signalez, afin que par ce moyen nourris entre leurs trophées & dans la gloire de leurs armes (*vt laurus Parua sub ingenti matris se subijcit umbra.*) Ils se trouuassent par vne continuelle habitude portez à la generosité, & maintenant au lieu de cela voir que nostre ieune noblesse s'attache à l'agrasse des Iesuites, lesquels il n'y a que trois iours que nous appellions postillons d'Espagne! Qui eut lors bonne grace, ce fut Harlequin, lequel apres vne grande exclamation à l'Italienne, vint faire ceste question,

Quod non das Equiti, vis dare (Prætor) equo?

Comme qui diroit,

*De Courriers Espagnols la ieunesse s'accoste:
On ne la nourrit plus à l'ombre des lauriers.
Vous ne la donnez plus aux anciens Cheualiers,
Est-ce pour la donner à ces cheuaux de poste?*

Mais ceste question eut promptement sa reparation par la bouche d'un personnage qui sçauoit bien comment il falloit auoir les François. Ice-lui donc redressa le tout ainsi,

*A l'ombre des lauriers vne verte ieunesse
Eust par trop resenti ceste vraye noblesse,
Dont le cœur genereux estonnoit l'Vniuers.
Mais pour bien tost domter vne gent si superbe:
L'honneur de sa moisson il faut couper en herbe
Mettant ces bons ouuriers à tort & à trauers.*

La verité est (dit lors le Docteur) que les François mettent tout le monde en besongne. Mais en ceste-ci ils ont si belle peur de faillir, qu'ils se tiennent sur leurs gardes, comme gens qui ont eü souuent des alarmes. Il y en a qui vous feroient pitié, tant ils sont en grandes appréhensions. Tel qui proposera d'entretenir plustost ces bons ouuriers en Espagne, voire faire aux despens de la France instruire la ieunesse Espagnole, que de donner au Roy d'Espagne cet auantage, & ceste gloire de le faire en France.

D'autres qui ne seront pas si glorieux, & se-

ront meilleurs mēsnagers, diront pour leur ad-
uis qu'il faut faire seruir les Iesuites & les Capu-
chins par semestre alternatiuement : que par ce
moyen ne les vns ne les autres n'auront pas tant
de peine, *alternis facilis labor* : & qu'apres auoir
prattiqué cela quelque temps, l'experience fera
voir ausquels il vaudra mieux se tenir, & que
lors on pourra prattiquer ceste reigle,

Elige quos nolis : quis enim est pudor omnia velle?

C'est à dire,

Contentez-vous d'auoir la cressme,

Et laissez en au moins l'esgout.

Encor qu'on vous ait mis a mesme,

Quelle honte de prendre tout?

Autres proposeront tout plein d'inconueniens,
qui sont à craindre, abandonnant ainsi la leunes-
se à gens d'une confrairie purement Espagnole,
disans,

Quis sua non notis arua tenenda dabit?

Comme qui demanderoit,

Est-ce un traitt de bon mesnager,

De donner son domaine à ferme

A quelque incognu estrange

Qui n'a point de demeure ferme?

Qu'à plus forte raison les François doiuent pren-
dre garde sur qui ils se reposent de leurs enfans,
qui leur doiuent estre bien plus chers que leurs
biens.

DES PERES IESVITES. 73

biens. Ioint qu'il est plus aisé d'arracher les
espines d'un champ, qu'oster vne mauuaise im-
pression à vne ieunesse,

Quo semel est imbuta recens seruat odor
Testa diu.

C'est à dire,

Long temps un vaisseau neuf retient l'odeur im-
bue:

Le drap vne fois teinct ne devient iamais blanc:

Et d'un arbre parcreu en sa forme tortue

On tascheroit en vain de redresser le flanc.

Il y en a encores qui passent plus auant : & di-
sent que posé le cas que la meilleure nourriture
du monde pour la ieunesse fust de la ietter au
sein des Iesuites, comme on le tient ainsi,

Iudice quo? populo, qui stultus honores

Sape dat indignis, & fama seruit ineptus.

C'est à dire,

Au iugement des peuples ignorans

Qui font souvent honneur à l'ignorance,

Et au seul bruit de quelques charlatans

Font de tout loin vne grand' reuerence.

Quand ainsi seroit (disent-ils) que de reputa-
tion & d'effet les Iesuites fussent *les primes del*
mondo, tousiours seroit-il fort à craindre qu'une
infinité de personnes ramassées ie ne sçay d'où,
qui ne seroyent ne Iesuites ne demy, voyans

qu'on estime tant ceux qui le font , en vinssent prendre le nom, & par cé moyen faire les grands docteurs : qui seroit vne manifeste piperie , à laquelle il faudroit exactement obuier. Pour cet effet aucuns trouuoient à propos l'expedient que ie vous dirai. C'est que, deuât qu'on mist aucuns de ces ouuriers en besongne , ils passassent par l'examen de messieurs de l'Vniuersité pour les lettres humaines, & de Messieurs de Sorbonne pour la Theologie. Puis qu'avec attestations suffisantes de leur capacité ils vinssent prester serment de fidelité entre les mains de monsieur T. ou autre des anciens conseillers de la Cour, qui en voudroit prendre la peine & en tenir registre , & qu'il n'y eust que ceux qui auroient passé par là qui peussent auoir ce titre sans tromperie.

Mais le Signor Pátalon se prit à rire gros comme le bras, & dit que les François, lors qu'ils entendent l'horloge, demandent quelle heure il est. Qu'ils en font autât oyans parler du retour des Iesuites, ils demandent les vns aux autres , quel moyen de parer à leurs coups? & n'ont pas la patience de voir comme par les conditions , sous lesquelles ils sont rappelez , il a esté pourueu à tout , voire tellement qu'on tirera en France seruice d'eux, avec assurance qu'ils ne nuiront

DES PERES IESVITES. 75

aucunement : parce qu'on leur en a retranché tous moyens.

Harlequin respondit à son Maistre: Signor Patalone, tandis que vous gouverniez les Iesuites, ie gouvernois de mon costé les François: Je taillois, ie cousois, ie retranschois, ie r'habillois : en somme ie pensois auoir fait merueilles. Mais à la fin du jeu ie me suis trouué bien loin de mon compte. Car les François m'ont renuoyé avec ceste responce,

*Non possunt istos plures, mihi crede, lituræ
Emendare viros: una litura potest.*

Comme me disant,

*Je ne vois pas que tu retranches
Tout le mal qui peut estre en eux.
Car s'il est au tronc & aux branches,
Il n'en faudroit pas faire deux.*

Lors le docteur voulant glozer sur les cōditions du rappel des Iesuites, l'entens (dit-il) qu'on y met des restrictions telles , que si elles auoyent lieu, autant vaudroit-il quasi n'auoir point de Iesuites en France, que d'en auoir à ce prix-la,

Quid mihi fortuna est, si non conceditur uti?

C'est à dire,

*Mieux eust valu leur refuser
La fortune qu'on leur presente,
Car qui leur defend d'en user,*

Il la leur rend encor absente.

Et quoi ? que leurs principaux exercices, qui concernent tant le general que les particuliers, leur soyent interdits ? qu'ils s'abstiennent de toutes pratiques & menées : & qu'ils n'entrent plus si auant dans les maisons, & dans les cœurs des suiets du Roy qu'ils faisoient par le moyen de leurs Confessions ? C'est bien loin de les enuoyer rafraischir parmi leurs bonnes & anciennes cognoissances, & conter priuément à leurs amis tât de fatigue, de tracas, vireuoustes, tours, tourdions, destours, soubrefauts, equippees, promenades & reuerences, qu'il leur a falu faire, auant que pouuoir esclatter ceste parole de resiouissance, avec grands souspirs, comme gens hors d'haleine,

-- *Vicit iter durum Pietas,* c'est à dire,

La pieté au milieu des trauaux

Nous a conduits & par monts & par vaux.

Après cela vous les verriez aussi deslassez & rafraischis que fils n'auoyent bougé d'une place : au lieu que les oppressant & resserrant par telles restrictions, nous ne verrons autour de nous que gens refrongnez, songe creux, haues,

Et nostro vltices stabunt in limine dira.

C'est à dire,

Autant d'harpies a nos portes,

*Qui attendront, pour se venger,
Qu'elles se sentent assez fortes
Pour nous donner à l'étranger.*

Il sen faut bien garder: car ce seroit les mettre en vn estat & miserable & tref-dangereux tout ensemble: leur oster tout moyen de faire leurs affaires, & de rassembler les pieces de leur naufrage, ce seroit essayer ce que pourroit sur eux,

Et metus, & malè suada fames, & turpis egestas,

C'est à dire,

*Seroit les tenir trop en crainte,
Les vouloir reduire à la faim,
Et rendre leur bande contrainte
De mal faire encor plus soudain.*

Vous verrez qu'il vaudra donc mieux leur donner moyen de faire tous les iours quelque beau petit seruice au Roy Catholique, secrettement & discrettement, plustost que de les penser tenir de court.

Quand Harlequin entendit qu'on parloit de tenir en bride les Iesuites, ie croy qu'il eut peur qu'on lui en donnast la commission. Car il commença ses propos, comme tout en colere: Ne le prenez pas là, Messieurs les François: vous y ferez les premiers trompez, parce qu'il me faudroit toute la troupe du Cheualier du guet,

pour tenir vn seul Iesuite en ceste subiection-la. Et deuinez, pour contenir tous les autres, combien d'alarmes on donneroit à tous propos à la France. Ceux qui entreprendroyent de les veiller, deuiendroyent fols eux-mesmes.

Mais le Seigneur Pantalon ne voulant pas laisser son pauvre Harlequin long temps en ceste trance, le paya de raison: & lui fit entendre que tout cela n'auoit esté mis en auant que pour seruir d'un premier appareil sur la playe qu'on faisoit à la France: d'un lenitif à l'arrest des Parlemens: & d'une billeezee à ceux qui voudroyent que les François deuinssent faiseurs d'Almanachs, & apprissent *non tantum quod ante pedes est videre, sed etiam futura prospicere, & consulere in longitudinem*. Qu'il y auoit tout plein de certains melancholiques hypochondriaques, qui consideroyent desia les Iesuites, non pas en l'estat qu'ils viennent pour cet heure, mais tels qu'ils seront si tost que,

Maiores nido pennas extendisse licebit.

Comme qui diroit,

Ils ne sont qu'au poil fol encores.

Mais tout autres qu'ils ne sont ores

Vautours de l'aire ils sortiront,

Et sur leur gibier s'en iront.

Aussi bien que seruiroit il aux pauvres Iesui-

DES PERES IESVITES. 79

tes, qui ont desia entr'eux tant de beaux statuts,
vn serment si particulier, vne reigle si generale,
de faller miserablement assuiettir à des nouue-
aux edicts, cuidans par ce moyen receuoir la
bonne grace des François, qui ne les sauroyent
iamais aimer d'amour enragee? Au contraire, as-
seurez-vous qu'ils ne viennent qu'en ceste reso-
lution de faire estat qu'autant vaut bien battu
que mal battu. Qu'ils auroyent beau faire, que
toufours les François diront d'eux,

Omnia quum fecit, Thaida Thais olet.

Comme qui diroit,

*Ils ont beau faire la croix
Aux differents des grands Rois,
Et quitter là les bobilles
Qu'on leur faisoit deuider,
Pour desormais ne cuider,
Plus sortir de leurs coquilles:*

*Ils ont beau tenir leurs yeux
Tout rouges & chassieux
Dans de grands liures antiques,
Et puis au partir de là
N'enseigner rien que cela
En leurs escholes pudiques:*

*Quitter leurs Confessions
Et tant d'autres actions,
(Helas qui sont si gentilles!)*

80 LE PASSE-PAR-TOVT

Et les douces priuantez.

Et les saintes primantez,

Qu'ils prenoient dans nos familles:

Nonobstant leur grand deuoir

Et ce qu'ils pourroyent auoir

De sainteté & merite,

Ceux qui les ont vus venir,

Voudront tousiours soustenir

Qu'ils sentent le Iesuite.

Tellement qu'a ce conte la vous verrez qu'il ne feroit pas mesmes au pouuoir des Rois de leuer ces mauuaises impressions à la meilleure & plus saine partie de leurs suiets, C'est à dire à ceux qui iugeront de la bonté de l'arbre par le fruit: des hommes, par leurs actions: & des affaires du monde, par l'experience.

Quibus aspera quondam

Visa maris species.

C'est à dire,

Que le danger prochain à bon droit espouuante

De nouueau reschappez d'une grande tourmente.

Je croy que l'aduís de tous ces Messieurs la feroit de donner de l'argent aux Iesuites pour aller viure ailleurs: tout ainsi qu'en leurs affaires particuliers ils aimeroient mieux exposer vne partie de leur bien sur vn vaisseau qui va en voyage, que de courir fortune eux-mesmes. Et

nous

enseigneront avec reproche le proverbe,

Credite, credenti nulla procella nocet.

Comme qui diroit,

Celui qui sur le nauire

Aura presté son auoir,

Prudent du danger se tire

Et cuide son bien r'auoir.

Mais nous apres vn orage

Voyans vn iour de beau temps,

Reiettons dans le naufrage

Les peres & les enfans.

Si tous les autres François estoient faits comme ceux-la, l'on n'auroit rappelé les Iesuites en France, que pour les regarder au nez: en effect les peler, les pelauder, & en fin de compte les amener en vn pays auquel la paix est estable, & ou par consequent ils trouueront besongne faite pour long temps.

Lors Harlequin repart, comme estant de leur parti, & du nombre de ceux qui aiment tant & plus besongne faite: & dit,

At si cessendum, Veneris cessemus in umbra.

C'est à dire,

S'il nous faut estre sans pratiques:

S'il faut viure les bras croisez:

Que nous demeurions pour reliques,

De vos dames apprinoisez,

Pourquoy non?

Nos hilarem populum femina lata capit.

Aussi bien ceste pauvre France est aujourd'huy si miserablement despeuplee, depuis ces guerres, qu'elles a bon besoin de personnes de seruice, qui trauaillent à bon escient à la remettre: comme ie respondrois bien pour eux, corps pour corps, qu'ils ne s'y espargneroyent point:

Paruosque Quirites Sufficient

C'est à dire,

Ils s'y prendront bien si matin,

Qu'ils feront germer de leur grace,

En France vne petite race,

Qui entendra bien le Latin.

Lors le Signor Pantalon, apres auoir fait vne grande exclamation; C'est grand cas (dit-il) qu'en tout proces criminel celui qui a accordé à partie ne fait plus de difficulté de preséter sa grace: Et que ces messieurs qui ont satis fait à la leur à laquelle la douleur est passée, & la douceur est naturelle, qui ont gagné son cœur, & croient l'auoir quoy qu'il tardé: neantmoins, à ouïr parler Harlequin, qui cognoit tout le monde, vous diriez qu'en France chasque particulier pretend deuoir venger contr'eux vn interest public. Encores si on ne les prenoit que par iustice, ce ne seroit pas grand chose: il y auroit moyen de

rendre illusoires les arrests des Cours souveraines. Il n'y a que la premiere pinte qui en soit chere. Mais ie voy bien qu'on leur veut dresser des querelles d'Aleman, mettant en ialousie cōtr'eux les maris & les peres qui auront de belles femmes ou filles; afin que,

Inferat ultrices virque patérque manus.

De ma part ie say par experience la force de ceste furieuse passion: laquelle ne se bride pas par les agraffes que portent ces Messieurs, qui ne ceignent rien qui ne soit ceint. Car le monde est si malheureux de dire que la sainteté sert aujour-d'huy de teinture, de robbe, de manteau & de masque aux grands desbordemens, tesmoin le proverbe, *Qu'il n'est pire eau que celle qui dort.* Cependant de peur d'inconuenient, ie m'en vais en aduertir ces messieurs qu'ils y prennent garde. Vn aduerti en vaut deux.

A ce depart du signor Pantalon sonnerent tous les instrumens de musique, pour resiouir le peuple, pour donner moyen aux personnages de aller rafraichir, & à Harlequin d'aller boire vn coup.

Aussi le Docteur, qui pensoit auoir suffisamment representé en general ce qu'on disoit en France par ci par là, du retablissement de mes-

sieurs les rappelez, vouloit (pour amener cet affaire à sa perfection) les incorporer dans le corps de messieurs du Clergé, le plus proprement qu'il lui seroit possible, afin que l'apiecement ne parust point à l'aduenir. Et par ce que ce seroit vn coup d'Estat, il pretendoit aussi faire passer le tout par deuant ceux qui voyent clair aux affaires d'Estat, afin qu'il peust rapporter ce contentement de n'y auoir rien oublié, & d'auoir fait d'un fort beau Royaume vn fort bel azyle pour des Iesuites, & leurs associez, adhérens, fauteurs, partisans & apprentis, presens & à venir quelconques.

Il en voulut donc aller au conseil: mais vous le verrez bien tost reuenir pour faire son rapport à la Compagnie, de ce qu'il a appris là dessus, ensemble représenter le fruit que la venue de ces Messieurs infalliblement rapportera à la France tant Ecclesiastiquement, que temporellement, pour la conseruation de l'Estat.

Comme les personnages reuenoyent sur le theatre, Harlequin se mit quelques pas deuant, & estant au passage s'y arresta, & se tenoit par les costez, en sorte qu'il tenoit tout l'espace de l'huys, & se print à dire, Messieurs, nous auons bien trauaillé depuis que vous ne nous auez veus Moy, & mon Maistre, & le Docteur, n'auons ces-

fé de prescher à ceux qui deuroyent prescher aux autres. Mais il est bien vray ce que dit le prouerbe,

Il est prou resolu, qui n'a cure de bien faire.

Le signor Pantalon qui le suiuiot de pres voyant son valet en ceste posture, le poussa d'un coup de pied iusques au milieu du Theatre, & lui dit, en le gourmandant,

Potatti, scelus, quasi re bene gesta.

C'est à dire,

Ce vilain a beu fort & ferme,

Et puis vient faire le content,

Comme si tout en buuetant,

Il eust mis l'affaire en bon terme.

Le signor Dottour prenant la parole, Le viens (dit-il) de m'acquitter d'une Commission qui m'auoit esté fort recommandée, ie vien de rendre à messieurs du Clergé des lettres que sa Sainteté escrit en faueur des Iesuites: & en y animé le suiet de toutes les raisons, dont ie me suis peu aduiser: voyant qu'il n'y auoit que ces deux mots,

Mitte tuas messes: accipe, clere, rosas.

C'est à dire

N'oubliez pas de m'enuoyer

Mes annates, sur toutes choses:

Et receuez pour le loyer

De vos moissons mes belles roses.

Mais la premiere chose que m'a dit vn des plus apparens de ce corps, ç'a esté de me demander, s'il y en auoit nombre. Le lui ay repliqué tout en riant, pourquoy il me demandoit cela? Parce (m'a-il respondu) que ie serois d'avis que l'on se contentast de raison, & qu'au moins pour vn commencement l'on n'en prist que ce qu'on en pourroit debiter & distribuer avec quelque profit, soit public soit particulier. Et n'ay iamais esté de l'aduis de ceux qui voudroient tous les iours de nouueau surcharger sainte mere Eglise la voyant desia deuenue,

--Vt palladis arbor

Inclinans varias pondere nigra comas.

C'est à dire,

Comme l'arbre de Pallas,

Dont les rameaux sont si las

Qu'on void sa noire perruque.

Chargee de trop de fruits,

Que (second) il a produits,

Lui faire pancher la nuque.

Toutesfois combien que l'Eglise soit ainsi surchargee, ce n'est pas fait encôres,

Omnis habet sua dona dies.

C'est à dire,

Car chasque iour se ressent

*D'une nouvelle abondance,
Par quelque nouveau present.*

D'un ordre, ou d'une ordonnance.

Au lieu qu'il vaudroit mieux la soulager & descharger. de ce que ie vous dirois bien, si vous estiez homme pour m'en faire raison, que non pas l'agruver d'aucune charge nouvelle, laquelle on ne me scauroit faire croire que l'on puisse accommoder sans fouler & les autres branches, & les fruiçts dont elles sont chargees.

Ie n'ay pas manqué (dit le Docteur) à lui représenter comme les peres de ceste Societé ne demandoient pas vn lieu eminent, ni de paroistre entre les plus hautes branches de cet arbre, & ne vouloient estre que l'eau pour en arrouser le pied, afin de le faire fructifier, & laquelle s'en va toute en la substance de ses racines. Ne vouloyët estre tenus que pour o en chiffre qui ne fait point de nombre, mais fait valoir tous les autres nombres. Ou comme vne meule à aiguïser, qui n'a point en soy le lustre des tranchans: mais le donne à tout le fer qui se frotte autour d'elle. Quoy que ie sceusse dire, le bon homme ne se vouloit aucunement payer ni de raison, ni de comparaison. Et glozant sur nos similitudes m'assëura que l'on tient en France que l'arbre que telles gens auront arroüsé de ieunesse ne porte iamais

fruit qui vaille. Que leur zero n'est propre qu'au chiffre d'Hespagne, & que les tranchans aiguisez à leur meule blessent les Rois.

Au reste que si les Ecclesiastiques vouloyent croire son conseil, ils s'assuiettiroient d'eux mesmes à l'exacte obseruation des bonnes regles de leurs chappitres, & se rendroient désormais assiduels à l'estude, & pour son regard, encor qu'il fust fort vieil, il estoit content de monstres exemple aux autres, & imiter Caton le Censeur, qui à soixante ans apprit les lettres Grecques. Que cela seroit bien plus seant disoit-il, à ceux qui doiuent donner instruction au peuple, que de bailler leurs chaires à ces Grammariens & Dialecticiens, qui au partir de là deuiennent si audacieux d'appeller les anciens Ecclesiastiques, *Molle pecus mutumque metu*: & les qualifier *Bruto consule natos*. Comme s'il appartenoit bien à ces nouveaux rappelez de parler ainsi des principaux de l'Eglise, lesquels nonobstant la confusio qui a esté generale, n'ont pas laissé de faire le seruice, d'entretenir les bastimens, de soulager en plusieurs endroits les pauvres, & tousiours donner moyen d'estudier à quelques vns de leurs pauvres parents. Au lieu que les Iesuites ne se fauroient vanter d'auoir iamais fait bien à personne, ni auancé autre chose en France par leurs iournees

DES PERES IESVITES. 89

iournees & artificés, que d'auoir mis à la faim vn
million de familles, encores apres tout cela se
font-ils donnez ceste deuise:

*Quicquid sub terra est in apricum proferet atas
Desodiet, condetque nitentia:*

Voulant dire,

*Ceux qui sur la fin de la guerre
Auoyent donné du nez en terre,
Reſtablis auront tout l'honneur
De la conduite de l'Eglise:
Et le temps mettra en chemise
Les riches qui sont en faueur.*

Et qui les laisseroit faire ils iroyent bien viſte
en ceste beſongne-la,

*Quo magis exhausti fuerint, tanto acrius omnes
Incumbent generis lapsi sarcire ruinas.*

C'est à dire,

*Car plus ils sont espuisez,
Et plus ils sont accusez,
Plus on leur a fait de honte,
Plus on les a deboutez,
Plus on les a desmontez,
Plus ils sont loin de leur compte,
Et tant plus diligemment,*

M

*Tant plus courageusement,
Pour reparer leurs ruines,
Ensemble ils se roidiront,
Et les ressorts banderont
De leurs despites machines*

Item

*--Collecta fatigat edendi
Ex longo rabies.*

C'est à dire

*Et depuis la fin de la Ligue,
Qui les reduisoit a la faim,
Ce grand appetit les fatigue
Amassé de si longue main.*

Le pis est que pour paruenir à leur but ils vous fauent les artifices de ce temps pour s'insinuer aux despens de qui que ce soit, & comme on dit, qu'il se trouue des hommes de nostre temps, qui commencent à se farder aussi bien que la plupart des dames, vous diriez aussi qu'ils ont vne dexterité particuliere a plastrer leurs vices, & a donner lustre à leurs actions:

Dum melior vero queritur arte color.

C'est à dire,

*Ils vont d'une grace subtile,
Mettans du fast en leurs façons,*

Et du fard dessus leurs leçons :

Bref le plus beau deuers la ville.

Tellement que ie croi que deormais il faudra estre Iesuite pour estre estimé en nostre France,

Quam non offendit toto fex illita vultu.

Il me souuient d'un traict qu'ils firent à tout le Clergé, la premiere fois qu'ils se presenterent pour estre receus en France, qui au commencement n'en vouloit point pour tout ; tant ceste nouveauté & de leur nom & de leur institution estoit suspecte à tout le monde. Ils n'eurent pas honte deslors de s'accomparrer aux plus anciens ordres, disans à la France,

Nec me quòd tibi sum nouus recuses:

Omnes hoc veteres tui fuerunt.

Voulant dire,

Et quoy, serions nous forclos,

Nous dresseroit-on querelle,

Seulement pour estre esclos

D'une couuee nouvelle?

Tous tes vieux l'ont bien esté,

Que l'on n'a pas reietté.

Tellement qu'à leur compte ils n'en deuoyent rien aux carmes, Celestins, Augustins, Chartreux, ni peut-estre à tous nos chapitres. Mesmes ie croy qu'il n'y en aura tantost plus que pour

eux. Pour renbarrer les Protestans il faudra estre Iesuite. Pour prescher les peuples, il faudra estre Iesuite. Pour bien instruire la ièunesse, il faudra estre Iesuite, en somme pour faire rage, il faudra estre Iesuite. Je ne dirai point ce qu'ils sçauent faire pour le public: mais quant à l'Eglise, elle ne se doit promettre d'eux que desastre, brouillerie, ruine & confusion. De fait ne se sont ils pas desia attaquez à la principale Eglise de la Frâce, pour auoir à la Flesche le depost qui de toute ancienneté a esté à nostre Dame de Paris? Je ne say pas ce qu'en peuuent dire les autres. Mais de ma part ie pren cela pour vn presage qu'il faudra de deux choses l'vne: ou qu'ô face venir de la Fleche des Iesuites pour seruir à nostre Dame de Paris, ou que nostre Dame de Paris s'en aille à la Flesche. Tesmoin la question qu'on dit leur auoir esté faite par vn gentilhomme, sur ce que le cœur du Roy y deuoit estre mis en depost,

*Dis-nous vn peu, secte resuesche,
Veux-tu flattant ce Roy vainqueur
Mettre son cœur dedans la Flesche?
Ou bien la Flesche dans son cœur?*

Et leur magnifique responce:

*Nostre fer fait si peu de bresche
Au chef de ce grand Roy vainqueur:*

Que ce n'est rien d'auoir la Flesche,

Si nous n'auons aussi le cœur.

En somme, depuis qu'ils se sont fourrez parmi nous (disoit ce bon homme) on a veu déchoir la dignité des Ecclesiastiques de la moitié: parce qu'on attribuoit à tout le corps les fautes insupportables, lesquelles n'appartenoient proprement qu'à l'ambition, & aux pratiques de ces remueurs de ménage: tât ils ont tasché de les rendre communs à ceux du Clergé, qu'ils ont trouuez plus susceptibles de desseins extrauagans. Et pour le regard des plus gens de bien, & plus pacifiques, ces brouillons disoyent, parlans d'eux,

Pigra situ securaque pectora torpent

Mole sua.

Bref on ne sçauroit croire, combien ou leurs artifices ou leurs actions ont fait reiaillir d'opprobre & d'ignominie sur le Clergé. A ceste occasion plusieurs grands personnages Catholiques nous reprochent qu'il faut bien que Messieurs les Ecclesiastiques n'en puissent plus: veu qu'apres tout cela ils font encore bouclier de la doctrine des Iesuites, & que,

Sentant nos forces defaillir,

Estouffees dans l'Ignorance,

Auons si grand peur de faillir,

Que nous recerchons leur science:

*Quoy qu'il soit bien aisé a voir
Que ce nous est chose honteuse
De priser le rogue savoir
D'une secte si malheureuse.*

Et si disent bien d'avantage: que la cause efficiente de laquelle s'estoient engendrez les Iesuites, estoit l'aveuglee corruption de ces derniers siecles: ainsi que les vers s'engendrent de la pourriture d'un corps. Mais qu'après y avoir esté engendrez, ce sont ces mesmes vers qui l'acheuent de corrompre & consumer iusques à en infecter l'air circonuoisin. Et pour confirmation de leur dire ils adioustent, que ce grand-corps auoit repris bonne couleur & bonne habitude, depuis qu'il s'estoit vëu nettoiyé de la rongerie de ceste vermine-là. Ce discours pourroit sembler estrange en ma bouche: mais il faut aduouer que si ceux de nostre ordre se fussent dignement & religieusement acquittez de leurs charges, la corruption & l'ignorance ne nous eussent pas portez à ceste prodigieuse & honteuse extremité de r'allumer nos lampes esteinctes aux flambeaux de ces bouteux, & de faire nos bastons de vieillesse de ceux qui renuersent les Estats les plus affermis. Où est le tēps que ceux qui auoyent nos charges fleurissoient en pieté, doctrine, integrité & sainteté de vie!

DES PERES IESVITES. 95

ces belles roses qui estoient anciennement de si bonne odeur, qu'elles attiroient & payens & heretiques! Il n'est plus de nouvelle.

Nunc riget amissa spina relicta rosa.

C'est à dire,

Le rosier qui pert sa rose,

Ne porte plus autre chose

Sur son dos cicatrice,

Que ceste poignante espine

Qui dentelant son eschine,

Arme son corps herissé.

Ainsi ces belles roses qui faisoient fleurir la pureté de l'Eglise, & qui ont serui d'un precieux & excellent parfum à plusieurs siecles, ont passé saison, ou la saison les a passées: on ne void plus en leur place que les espines de ceste maudite avarice, qui s'attachent à tout ce qu'elles touchent, deschirent ce qui s'en approche, & souvent emportent la piece. Quand i'y songe, il me prend quasi enuie de pardonner aux Protestants, qui ne trouuās plus riē en nostre ordre de ce qui le rendoit agreable à Dieu & recommandable aux hōmes, n'ont iamais eu bon temps qu'ils ne nous ayent quittez tout à plat. Et si sont tous les iours apres à nous reprocher les fautes que font les Iesuites: & disent que pour n'auoir bien labouré le champ, qui nous auoit esté commis,

s'y sont engendrees ces mauuaises herbes, capables de ruiner & le champ & le laboureur.

Incultis vellenda filix innascitur agris.

C'est à dire,

Parmi ces champs demeurez

Naist la fougere nuisante,

Puis quand vous les labourez,

Vous en arrachez la plante.

Qu'au premier beau temps que la France auoit eu apres les troubles, elles les auoit arrachees: mais puis que nous les y laissons de nouveau enraciner, cest bien signe que nous ne voulons plus faire nostre deuoir à labourer ceste vigne spirituelle, laissans estouffer ces vieux seps à ceste fougere, qui de soy-mesme se pouffe & se iette ainsi en vn instant: & laquelle,

Multa dedit populo vulnèra, multa dabit.

Voila sommairement (dit le docteur) le discours de ce bon vieillard , homme docte , desireux du bien public , & avec lequel ie trouuois qu'il y auoit beaucoup à apprendre. Mais l'attention que vous m'avez rendue à ce recit me promet que vous aurez agreable que ie ne passe pas sous silence les propos d'un de sa cōpagnie, qui estoit bien autant ignorant.

Car

Car c'est en ceux la qu'au lieu de fard reluit ordinairement ceste agreable naifueté, laquelle est si bien venue aux bonnes compagnies. Comme il vit que nous estions sur le reſtabliſſement des Ieſuites : le croi (dit-il) que les Proteſtans ſ'en ſont plus reſiouis que nous. Car nous n'auions iamais voulu entrer en conference avec ces Proteſtâs, & auions touſiours ſouſtenu qu'il ne ſaloit point diſputer avec ceux qui nient les principes. Mais aujour d'hui vous voyez à tout propos les Ieſuites en diſcours avec eux. Ils n'ont pas tellement donné toute l'humanité à leurs eſcoliers, qu'ils n'en ayent gardé leur part, laquelle ils deſployent avec vn viſage riant & gracieux en toutes les conferences qu'ils vont faiſant avec ces Proteſtans. Tellement que vous diriez qu'ils ſont deſia d'accord avec eux pour les principaux fondemens : & que *ſenſim ſine ſenſu* ils ont reſpectiuement conueni de n'auoir autre Iuge que L'ESCRITVRE. Au lieu de demeurer touſiours fixes & fermes ſur ceste reſolution, qui nous auoit ſi bien ſerui, aſçauoir d'eſloigner du monde vne choſe toute celeſte, en tenir le ratelier ſi haut aux hommes qu'ils n'y peuſſent atteindre, & faire que ceux qui voudroyent ouvrir les yeux pour en conſiderer les threſors, ne la peuſſent voir qu'au trauers d'un maſque fait

en Latin. Il est vrai que depuis les Iesuites ont bien reconnu leur faute, & l'ont voulu aucunement repa  rer & rabiller par la nouvelle distinction de l'Escriture ou parole   crite & non   crite. Mais elle n'agu  res serui: car ils l'ont pliee sous leur manteau des qu'ils ont veu que S. Aldegonde s'en mocquoit. Encores le pis est, que se reposant totalement sur les distinctions qu'ils portent ordinairement en leur pochette, ils font gloire de conferer en la presence de plusieurs Catholiques qui comprendront souuent des passages de l'Escriture esclairs des rayons de ceste lumiere, & ne verront goutte en l'obscurit   de leurs distinctions, qui ne sont diaphanes qu'   ceux qui ont   t   leurs escoliers de ieunesse. Au moyen de quoi vous en verrez plusieurs qui se mettront    lire pour s'instruire en la connoissance de leur salut, & employeront leur temps    cela sans bouger de leurs maisons, & sans aller chercher de la deuotion aux pelerinages    ce destin  s. Qui est (   mon aduis) la cause pour laquelle vous voyez ainsi croistre l'herbe tout le long des grands chemins de S. Iaques, de S. Claude, de S. Michel, de S. Mathurin & autres: mauuais commencement, ne leur desplaist, & qui ne promet rien de bon.

Non hac (  t fama est) secta salubris erit.

Toutesfois , puis qu'il a esté aduisé en cour de Rome qu'ils seront restablis en France , ie trouuerois à propos que cela se fist suivant & conformément à l'interpretation Françoisse qu'on donne à ces quatre lettres hieroglyphiques qu'on mettoit au commencement des arrests Romains, S. P. Q. R. *Si peu que rien.* Aussi bié m'afseure ie que fueilletant soigneusement les priuileges de l'Eglise Gallicane , & les annales des plus magnanimes d'entre nos Rois, on trouueroit que nous auons pouuoir d'interpreter en François ces matieres-la , aussi bien que les Cours de Parlement interpretent les Edits.

Il ne se peut dire combien le Docteur rapporta les discours de ces Messieurs, d'une façon cōuenable, représentant la grauité du premier, lequel il faisoit parler lentement & posément , & l'action du dernier , avec plus de vehemence & promptitude. Alors le Maistre des ceremonies dit , Nous auons fait chose inusitée en fait de Comedie. Nous auons escouté des absens. Mais vous, Signor Doctore, parlant pour ces personages-la, ne iouëz point le vostre, & ne nous auez point recité ce que vous leur auez dit , qui seroit beaucoup plus agreable à ceste compagnie.

Messieurs, dit le Docteur, n'avez vous point

oui parler d'un voyage que ie fis au pays bas, tan
six cens & quatre, & comme ie demeurai quin-
ze iours pres du Comte Maurice en telle repu-
tation, qu'il pensoit auoir recouuré vn Prosper
Colonne, tant ie lui disois de beaux traits de son
mestier, qu'il sembloit à tous ses capitaines, que
mon esprit fust vn abregé de la perfection mili-
taire: Et n'eust esté que ces Holâdois-la se trou-
uerent lors bien empeschés à prendre l'Escluse,
ie croi qu'ils eussent voulu venir en mon esco-
le. l'en fis de mesme, 'me trouuant entre ces
Messieurs du Clergé. Je leur donnai autant de
traits de la Theologie des Iesuites, que si i'eusse
esté vn Bellarmin toute ma vie, & sans cela, ie
croy bien que ie n'eusse pas tant sceu de leurs
affaires. Or afin que la compagnie voye que ie
n'en veux pas faire mon profit, ie vous en depar-
tirai *gratis* ce que i'estimerai propre au suiet qui
se presente.

Premierement, parce que ie trouuois ces per-
sonnages encores tous scandalizés des grands
rauages qui auoyent deffiguré la face de la Fran-
ce, & desquels elle accuse les pauvres Iesuites:
pour les consoler là dessus, & leur donner de la
resolution, ie leur dis,

*Nunc & damna iuuant sunt ipsa pericula tanti:
Stantia non poterant tecta probare Deum.*

C'est à dire,

En ce temps ci les maux passez nous seruent,

Et de danger les dangers nous preseruent.

Si un estat estoit tousiours debout,

On verroit moins comme Dieu conduit tout.

Car ceux de ceste Societé, bons maistres d'escole, & bons Theologiens tout ensemble, fauent bien qu'il y a telle Escole au monde que la pratique : & que la meilleure leçon que nous puissions apprendre en ceste vie, c'est de nous desplaire en ce monde. Or l'experience monstre que nous ne le faisons iamais bien tant que nous y auons nos aises. Voila pourquoi ils trouuent expedient & necessaire d'attirer sur les peuples des calamitez si generales, que tout le monde les sente.

Rebus in angustis facile est contemnere vitam.

Fortiter ille facit qui miser esse potest.

C'est à dire,

Le mespris de ceste vie

Est fils de l'Aduersité.

La vie est tost assoumie

Qui vit en calamité.

L'homme est bien plus admirable,

Qui sçait estre miserable.

Tellement qu'à ce compte, les François ont beaucoup d'obligation aux Iesuites pour cela

qui s'est passé. Encore est-ce quelque chose, quand ils ont l'esprit de le recognoistre, & de faire tant de poursuites pour leur rappel.

De fait, eux qui cognoissent tout le monde, ne font pas ces coups-la sans cause. Ils voyent bien que sans cela la France ne viuroit pas, & deviendroit comme percluse & paralytique : témoin que nous auons desia veu qu'un plein repos de dix ans seulement, l'a rendue sans mouvement : de sorte qu'à peine l'entend on souffler.

Iamque decem totos ignaua per annos.

Que cela la gaste,

Dulcia non ferimus: succo renouamur amaro.

Sape perit ventis obruta cymba suis.

C'est à dire,

La douceurs fasche à qui la hume,

Et lui fait souuent mal au cœur.

Souuent le suc plein d'amertume

Remet l'homme en pleine vigueur.

Et le Nauires bien souuent

Perit s'il a trop de bon vent.

Qui plus est, ils cognoissent qu'un long repos assopiroit & ruineroit par succession de temps le bel esprit des François, lesquels n'ont acquis la promptitude naturelle qui les fait admirer, si non dans la prompte agitation d'une infinité d'accidens inopinés.

O quantum est subitis casibus ingenium!

C'est à dire,

*Combien les accidents soudains,
Attirez par leurs saintes mains,
Rendront nos esprits plus habiles,
Affermis dans l'aduersité?
Au lieu que la prosperité
Les rendoit desia si fragiles.*

Item,

Ingenium mala saepe mouent.

Il est vrai que pour vn temps cela est bien dur: mais ils y procedent par vne methode si excellente, qu'elle pourroit durer iusques à la fin du monde, pourueu qu'on ne les troublast point par ces importuns bannissemens: car ils y accoustument les peuples de ieunesse, & leur en font prendre comme vne habitude.

-saūoque gelu duramus & vndis.

C'est à dire,

*Les François entr'eux adoucis,
Et mollement prenans leur aise,
Ils sçauent bien rendre endurcis
A toute sorte de malaise.*

Par tel moyen ils sont venus à bout d'une chose qui anciennement eust esté impossible en ce royaume. C'est d'auoir acquis aux François ceste excellente vertu Chrestienne appelee Pa-

104 LE PASSE-PAR-TOVT

TIENCE. Ce qui pourroit sembler paradoxe à ceux qui sauent combien elle est cōtraire à l'humeur de la nation. Mais impatiens sont ordinairement ceux qui sentent qu'on leur fait tort. L'iniure donne des aiguillons à la douleur, & en rend le sentiment plus vif & plus penetrant, elle appelle la vengeance à son secours, & avec vne continuelle inquietude cherche dans le mal d'autrui allegement du sien. Au contraire ceux qui n'ont autre mal que celui qu'ils se font eux mesmes, n'en pouuans accuser autrui, ni en tirer raison de personne, sont cōtraints d'acquiescer,

Aequo animo pœnam qui meruère ferunt.

C'est à dire,

On void patiemment aualler le calice

Ceux qui ont merité la peine du supplice.

Or que les François ne soyent de ce nombre, il n'y a que tenir : & dans dix ans qu'ils commenceront à sentir les caresses de ces Rappellés, qui ne manqueront pas de ronger ces parchemins & ces Registres de la Paix & tranquillité publique, sous laquelle fleurit quant à present cet Estat, Qu'est ce qu'ils pourroyent dire? sinon,

Nos pedibus alas dedimus, nos crinibus angues.

Comme qui diroit,

Nous leur auons donné des aisles,

Auons nourris ces serpenteaux,

Pour

*Pour rendre nos peuples rebelles,
Et donner des coups de consteaux.*

Voila les principales raisons , pour lesquelles
ie disois à ces Messieurs , que leurs saintetés,
qui festudient tousiours d'enrichir & appuyer
l'Eglise , & qui ne manquent point de siecle en
siecle de lui enuoyer du renfort, & moins enco-
re en nostre siecle qu'aux precedens: Ont trou-
ué bon de nous enuoyer , pour chose de plus
singuliere recommandation,

Columnas ultima recisas Africa.

C'est à dire,

*Ils nous ont fait venir encores,
Du pays d'ou viennent les Mores,
Et bien cherement acheter,
Tous ces nouveaux piliers d'Eglise,
Dont l'estoffe & la taille exquise
Nous fera les vieux reietter.*

Le Docteur ayant acheué de parler, le Signor
Pantalon , coustumier de festonner de toutes
choses , se mit sur le theatre , accompagné de
Harlequin. Le m'estonne (dit-il) puis que la Theo-
logie de ceste sacrée Societé consiste en ces
poincts la, comment les François (qui ont esté
si long temps à l'escole du Roy Philippe , pour
apprendre à garder la paix au logis, en mettant
la guerre dehors) ne renuoyent ceste Theolo-

gie en Espagne & en Italie , faire les logis , es-
mouuoir les peuples, les diuifer & affoiblir, at-
tendant le gros de ceste genereuse nation , la-
quelle ayant repris sa premiere force, la voudra,
peut estre, faire vn iour sentir aux estrangers.

Harlequin ayant meslé de la grauité en ses ge-
stes, pour accompagner & donner grace à celle
qu'il vouloit ioindre à ses discours , tant pour
payer son Maistre de raison, que pour contenter
la compagnie de ses nouuelles inuentions , dit,
Mon Maistre, les François ne pensent point à ce-
la: ils ont senti tant de bourrasques, & souffert
tant de ruines , qu'ils ne pensent à autre chose
qu'à remettre la France en son entier. Et voyent
bien qu'elle ne le sera iamais tant que ceste pie-
ce qu'elle a eüe autresfois en sera à dire. Que
tout n'y ira iamais bien, si les Iesuites n'y alloiét,
puis que le Tout embrasse generalement toutes
ses parties, pour petites, meschâtes, malotrues,
chancreuses ou estiomenées qu'elles soyent. A
plus forte raison celles-ci , qui sont tellement
saines qu'elles suffisent pour redresser toutes les
autres , qui aboutissent aujour d'hui aux princi-
pales, les gouuernent & les font agir, voire agif-
sent sur elles, si elles ne vôt à leur gré: & par ainsi
meritēt bien d'estre appelées *Partes integrantes*.

Au surplus il y iroit (dit-il) de l'honneur de

nous autres François, si, faute de sçauoir ramasser nos bribes, il demeueroit du nostre aux estrangers qui n'en ont desjà que trop. Or n'y a-il rien que nous tenions à plus iuste titre, que ce que l'on nous a donné sans demâder, & que l'on nous rend encor aujourd'hui sans l'auoir repeté. Par ainsi combien que nous ne tinssions Messieurs les rappelés que pour tisons fumans de nos vieilles querelles, il les faut auoir. Ils peuuent encor seruir, quand ce ne seroit que pour en rallumer le feu. Je mesbahis mesmes, de ce que l'on est si long temps là dessus: veu qu'ils ne tiennent ni à fer ni à clou, comme feroit le Royaume de Nauarre, celui de Naples, le Duché de Milan, & ces deux ou trois Contés qui ont si bon maistre. Il est vrai qu'il faut que ie confesse, que les raisons de deuotiõ & de discipline scholastique ne seroyēt pas des chaisnons assez forts pour rappeler, attirer & ramener les Iesuites. Aussi les a on bien & beau renforcees de raisons d'Estat, *in hunc qui sequitur modum*. Figurez vous que leurs Saintetés apres auoir perdu les Allemands, Anglois, Escossois & autres,

Purpureis luctantia colla capistris.

C'est à dire,

Lesquels quoi qu'on sçache faire

Contredire, ou contrefaire

*Font les cheuaux eschappez,
Et ne veulent plus de Maistre,
Ny de ce pourpré cheuestre,
Dont ils se sont detrappez.*

Et depuis que les Rois & Princes se sont attribués en ces pays, la iustice haute, moyenne & basse sur les gens d'Eglise, aussi bien que sur leurs autres suiets : on a iugé necessaire, pour maintenir l'autorité du saint siege és autres grands Royaumes, de trouuer moyen d'y auoir force gens qui n'eussent autre prix fait que cela, ni autre texte de Theologie. Or ceste a esté la Commission des Iesuites, comme vous auez entendu ci dessus, ils furent enuoyez par le monde, afin d'esprendre par tout le lustre, & faire esclatter les rayons de la magnificence du Pontifical Empire Romain. Ils reuiennent, à mon aduis, en France en partie pour cela:

Solis equi elatis lucem qui narribus efflant.

C'est à dire,

*Ces bons cheuaux attelez,
Pour la lumiere produire,
Ces bons Docteurs r'appelez
Pour nostre Ieunesse instruire,
Qui s'estans fort promenez,
Viennent faire bant le nez.
N'ayans autre prix fait, ils n'ont que faire de*

DES PERES IESVITES. 109

reconoistre autre grandeur dominante en terre, ni de leuer les yeux au Ciel pour y chercher leur Soleil, lequel ne bouge de Rome,

Solémque suum, sua sydera norunt.

C'est à dire,

*Car ces Estoilles errantes,
Et ces Cometes ardentes,
Qui seruiroyent de flambeau
Pour faire vn monde nouveau,
Rangent leur serue influence
Sous la Romaine puissance,
Et tiennent pour seul Soleil
Ce Colosse nompareil:
Qui veut regir tout le monde,
Le Ciel, & la Terre, & l'onde,
Et les peuples, & les Rois,
Les coustumes & les Loix,
Et le calme & la tourmente.
Lui seul sans autre regente
Tous ces beaux petis regents,
Desquels il fait ses agents:
Et de leur science infuse,
Les nations il amuse.
Il est leur vent & leur port,
Et leur Estoile du Nort.
Pres & loin il est le Phare,
Duquel iamais ne s'esgare*

*La barque de leurs desseins,
Qui sont si beaux & si saints.*

Le Docteur, regardant les autres personnages,
dit lors en sousriant,

Idemque rubescbat stellis aurora fugatis.

C'est à dire,

*Ces belles estoiles chassées,
Ces saintes brigades cassées,
La belle Aurore rougissoit
Sur la France qui fleurissoit.*

Harlequin reprenant & continuant son beau discours dit: Or cōme les Papes ont deux mains aussi bien que les autres hommes, feu sa Sainteté tenant en sa main droite vne belle Paix, bien gauderonnee, bien patelinee façon de Lion, de l'autre presentoit à la France vn fort modeste petit escadron de Iesuites, ausquels elle haussait le menton: avec ceste deuise, *Aut hac cum illis habenda, aut illa cum his amittenda*. Sachant bien que les François ont vne chose de bon: C'est qu'ils prennent tout ce qu'on leur donne, & quelque fois plus, comme l'on m'a dit autresfois en Sauoye. Aussi ont ils pris pelle messe, & Paix & Iesuites: & le tout mis en leur gibeciere. Qu'ils s'accordent s'ils peuuent.

Harlequin ayant dit cela en façon qu'il estoit aisé à voir qu'il auoit contrefait leur Docteur,

DES PERES IESVITES. III

en se mocquant de lui, fit vne gambade, & se retirant, s'adressa au Docteur, & lui dit, Signor Dottour, j'ai commencé, dites le reste.

Lors le Signor Dottour, d'un visage riant, accosta le Sieur Patalon, qui sans cela se fust trouué estonné sur le Theatre, & ne sauoit que dire. Vostre galand m'a, (dit-il) fait vn present du reste de son prix fait, à quoi en estoit-il?

Il m'a (respondit le sieur Pantalon) à force de belles raisons d'Estat, mis la paix & les Iesuites en vne gibbeciere: & puis s'en est allé. Que vous en semble? Seroit il possible, que les François ayent logé ceste Vierge sacrée, que l'on peint si belle, si delectable, si desirable, avec tant de gens ramassés?

Io vi dirò, Signor Patalone, (respondit le docteur) il ne faut point trouuer cela estrange. Premièrement les François ne sont pas si ialoux de l'honneur des Dames, que nous pourriôs bien estre. Et puis la paix de France est encores si ieune, que ce seroit vne folie d'apporter du soin & de la ialousie, pour garder que l'on n'attête sur elle.

Le Seigneur Pantalon repliqua, *Signor Dottour, io ne sò: ma ecco vna raggione piu bella & piu forte che tutte le vostre. Cioe che questa Pace, fra gli principi Christiani, è la figliola di sua Santità: però questi monachi, tutti quanti, si guardaranno molto*

bene di toccar-la. Notez qu'il dit cela, d'une façon graue & imperieuse, qui donna tant de grace à son action, que vous eussiez veu tous les estrangers qui estoient en ceste assemblée esclatter de rire : dont, lui scandalizé, demande au Docteur, dequoi ces gens-la pouuoient ainsi rire?

Figurez vous, signor Pantalone, (dit le Docteur) que tous ces rieurs-la sont estrangers, qui ont laissé leur pays en pleine paix. Et si n'ont jamais oui dire qu'elle ait esté engendrée par sa Saincteté. Tellement que ce leur est chose nouvelle & ridicule, de vous ouir dire que la paix des Princes Chrestiens ait esté formée, moulée, pignée, coiffée & fagottée dās le Castel S. Ange: comme si le mestier des souuerains Pontifes & leur *Propriū quarto modo* estoit de faire des paix. Que si cela estoit, ceux qui ont fait la descriptiō si exacte de ceste Vierge sacrée, qui la nomment *Celeste, aux ailes d'azur, aux pieds dorez*, ayant à sa suite la *Iustice, l'Abondance*, &c. auroient fait vne grande faute d'auoir si miserablement oublié de nous faire voir au milieu de ceste heureuse pompe, vn Pape, lui donnant l'estre, la vie, & le mouuement : & auroient fait vn grand tort au saint Siege : N'en desplaise à tous les Poëtes Grecs & Latins, qui toutesfois en ce cas la seroyent plus excusables que nostre Petrarque,

DES PERES IESVITES. 113

trarque, l'Arioste & il Tasso, qui n'en ont sonné mort, non plus que les anciens.

Alors le signor Pantalon repliqua, Vous estes estrange avec vos estrangers; mais ni vous ni eux ne me sauriez nier, que sa sainteté n'ait eu bonne main, d'auoir en si peu de temps tiré de dessous le faix de tant de guerres le feu Roy Philippe, si chargé d'annees, qu'il n'en pouuoit plus: fait reposer nostre Roy, au quarante-cinquieme an de son aage, si chargé de trophées qu'il ne lui en falloit plus: & rendre à monsieur le Duc de Sauoye, du bien deçà les monts, ou il n'en auoit plus.

Le Docteur repliqua, signor Pantalone, ie vous diray la dessus, tant ce que disent les François, que le iugement qu'en font les estrangers. Pour le regard des François, les plus gens de bien recognoissent qu'une pluye descendue du Ciel a esteint l'embrasement de nos guerres ciuiles, auquel chacun sçait combien leurs saintetez auoyent mis de bois, de poix, d'huile & de soulfre, tant & si longuement qu'ils y ont peu maintenir leurs boute-feux. Que si tost que la France les eut chassés, sa sainteté, discontinuant d'y entretenir le feu, il s'estoit esteint.

Sic flammæ nullo concutiente mori.

Qu'il en auoit pris ainsi à nostre embrasement:

de forte qu'en moins de rien & comme en vn moment il n'en a plus esté de nouuelle.

*Vt leuis extinctis paulatim viribus ignis,
Ipse latet, summo candet in igne cinis.*

C'est à dire,

*Le feu n'aguieres allumé,
Ayant ses forces consumé,
On vid de soy-mesme se rendre,
Et desponillé de sa clarté,
Cacher son tison escarté
Sous l'obsur rideau de sa cendre.*

En ceste signification & en ceste façon saupoudree d'un brin de la Philosophie des Iesuites, pour prendre, *Causam sine qua non, pro causa efficiente*, ils accordēt que sa saincteté à mis de l'eau en nos feux: & par consequent qu'ils tiennent la paix de lui: tout ainsi que vous auoueriez tenir la vie d'un qui apres vous auoir bien faict du mal ne vous auroit pas tué. *Quando maius accipi à latrone beneficium nullum potuit.*

Les autres disent, que s'estant sa saincteté aperceüe que le feu des guerres intestines auoit produit mesmes effects au corps de la Frâce que fait vne longue fieure en vn corps replet duquel elle consume les mauuais humeurs, & qu'apres cela l'homme est incontinent debout, par-

ce que rien n'empesche plus les fonctions de sa chaleur & vigueur naturelle: que de mesme en France le luxe y auoit esté consumé, lequel auparavant estouffoit le courage, & par maniere de dire, la chaleur naturelle de ceste genereuse nation, qu'elle s'en alloit debout; veu mesmes qu'elle se trouuoit auoir plus de capitaines & de soldats à la fin de la guerre, qu'elle n'auoit eu au commencement. Comme si par vne grace speciale le regne de ce grand & magnanime Prince eust esté extraordinairement second en gens de guerre. Sur cela il fut aduisé à Rome d'essayer si ce Royaume inuincible par la force, se pourroit point auoir par le luxe. Et avec ce dessein, sa sainteté fut bien aise de mettre fort auant la main aux affaires de France, afin de la faire de nouveau replonger dans la volupté, & estouffer dans vne mer de delices, & cest ainsi qu'ils luy approprient ce vers,

In flammam flammis, in mare fundit aquas.

C'est à dire.

Il adioustoit du feu à nos feux allumez,

Il mettoit force bois sur nos bois consumez;

Afin de voir bien tost ce pauvre Estat en cendre,

Puis quand il veit du Ciel ceste Vierge descendre

*Qui dans vn Ocean de celestes bienfaicts
S'en alloit estouffant les feux qu'il auoit faits,
Il verse (diroit-on) le luxe & l'abondance,
Pour engloutir le corps de ceste ingrate France.*

Plusieurs autres disent que sa saincteté n'a mis la main à la paix de France, que pour y faire glisser & r'entrer tout doucement par dessous son char de triomphe ses petits boutefeux, sans bruit & sans scandale. Afin que tant par leur moyen, que par l'impression qu'il donneroit aux peuples d'auoir fait la Paix, il s'acquist vne possession de faire, refaire, desfaire, contre-faire, authoriser ou desmancher toutes sortes de traictez de Paix ou de trefues entre les grans Rois: iceux accourcir ou allonger, tant qu'il les ait mis à son point. Ceux qui en veulent parler le plus sainctement, c'est à dire plus à l'auantage de sa saincteté, disent qu'à peser toutes choses à leur balance, la France ne commencera d'estre obligee aux Papes de ceste dernier paix, qu'apres qu'elle aura plus duré que les troubles qu'ils y ont si long temps entretenus.

Pour venir au iugement des estrangers, qui ont regardé si long temps le piteux spectacle des Tragedies qui se sont iouées sur le Theatre de la France, ils tirent des maximes de nostre experience. Et en voici deux. I *Que iamais les Papes*

ne mettent la paix sinon là où ils ont mis auparavant la guerre.

II *Que iamais les Papes ne scauroient faire naistre des guerres ciuiles dans les Estats pleinement affranchis du ioug de leur domination.* Et pour preuue & demonstration certaine de ces deux propositions, ils disent que si le Souuerain Pontife, ce grand Briaree, portoit aussi bien les clés du temple de Ianus, comme il en porte d'autres, tellement qu'il peust à son plaisir ouurir ou fermer la porte aux diuisions, revoltes & guerres intestines, qu'on ne verroit iamais les Protestans sans cela. Au surplus quand ils parlent de la paix de France, ils n'ont pas honte de dire quelle est venue trop tard de la moitié, apres la desolation de toutes les Prouinces de ce grand Royaume, asseurant que pour leur regard, ils n'en voudroient point à ce prixla. Et en matiere de pacification, ils feroient volontiers mesme reproche à sa sainteté que Luther fit au Pape Leon dixiesme, lequel si hardiment il pressoit & importunoit de venir à la reformation de l'Eglise. Le Pape lui respondit qu'il en estoit content, & recognoissoit assez que l'Eglise en auoit bon besoin: Mais (comme il estoit plein d'indulgence) il lui faisoit d'y mettre la main: & respondit qu'il n'y falloit proceder que pas à pas. On dit que Luther,

interpretant ce pas à pas, repliqua qué sa saincteté faisoit de si grands pas, qu'il se passoit tousiours vn Iubilé entre vn de ses pas & l'autre. Tellement que deslors les plus hastez se mirent deuant, & depuis se sont vantez que ceux qui les suiuyoient de pres ne sen sont repentis: d'autant qu'en tout vn siecle ils n'ont point eu de troubles en leurs Estats, qui les ayent contrainsts de mandier la saincte entremise & le secours de Pise de leurs sainctetez.

Ie vous diray, Messieurs, qu'il y a long temps que i'auois ouy dire tout cela: mais ie n'en auois rien voulu croire, d'autant qu'il me sembloit incroyable, que sa saincteté laissast ainsi en repos les Estats des Protestants. Mais depuis le voyage que ie fis en Angleterre, *legatione libera*, ie n'ẽ parle plus par ouyr dire. Allez moy chercher en ce pays la ce monstre hideux, qui a tant fait parler de lui en France:

*Discordia demens
Vipereum crinem vittas innexa cruentas.*

C'est à dire,

*Discorde, ceste enragee,
Qui d'ensanglantez rubans
Tresse sa hure chargee*

De grands tortils de serpens.

Au contraire,

Illic depositis habitat concordia telis.

Et qui plus est, ils se promettent continuation d'une mesme prosperité, tant qu'ils ne laisseront point prendre terre en leurs Havres à ces porteurs de *Rogatum*, qui gastent les autres Estats : & qu'ils se resoudront de s'en passer aussi bien qu'ils ont fait iusqu'à present, & dont ils se sont si bien trouvez. Telsmoin ceste Roine, qui pleine d'ans & de gloire, a par ce moyen tenu aussi fermement le sceptre Royal en sa main, que les Rois de son temps qui auoyent le bras plus nerueux. Tellement qu'à l'Apophthegme du Roy de Macedone, qui ne trouuoit point de place imprenable, dans laquelle il peust seulement faire entrer vn mullet charge d'argent, ceste Roine a fait adiouster, *ni de Royaume assuré, dans lequel on peust ietter vn Esquade de Iesuites.* Aussi n'est-il pas croyable, comme il font gloire de n'en auoir point, car il disent,

Domus hac nec purior ulla est

Nec magis his aliena malis.

C'est à dire

*On ne void point naistre de guerre,
Ni de citoyens indigents*

*Dans ce Royaume d'Angleterre,
Nettoyé de ces bonnes gens.*

Et c'est, mon aduis, de ce climat-la qu'un
Poëte vouloit parler, quand il dit,

Illic innocui latè pascuntur olores,--

Et ailleurs,

Velucrum locus ille piarum,

Dicitur, obscæna quo prohibentur aues.

C'est à dire :

La Tamise y void sur ses bords

Des Cignes la bande innocente:

Non pas ceste troupe beante

Après les viuans & les morts.

Allez moy dire que l'on puisse voir en ce pays-
la des grandes ruynes, des fauxbourgs bruslez,
des villages deserts, la nudité & calamité du peu-
ple. Si ce n'est que vous montiez au fort de
Douvre, & iettiez la veuë sur la coste opposite.

Lors Harlequin voulut à son tour aider au
Docteur à dire, afin qu'il n'eust point d'auanta-
ge sur lui, & adiousta à son propos : Allez moi
dire que les Anglois foyent nourris des le ber-
ceau dâs la gloire des armes seditieuses, ne qu'ils
apprenent de la guerre, si ce n'est aux despens
des autres nations. Allez moi dire, qu'ils viuent
avec ce contentement d'auoir tous les iours des
nouuelles, si on ne leur porte sur mer, aussi bien
que

que nos vins d'Anjou. Allez moi dire aussi, que si l'Espagnol pouuoit entrer par l'emboucheure de la Tamize, & se rendre maistre des vaisseaux Anglois avec vne bonne & forte armee Nauale, sa saincteté youlust prendre la peine de faire vne aussi bonne paix en Angleterre, comme elle en a fait vne en France.

Alors vous eussiez veu le signor Pantalon faire trois ou quatre tours sur le Theatre, sans dire mot, la teste baissée, & la robbe retroussée par derriere, laquelle d'une main il faisoit passer toute d'un costé, & de l'autre il faisoit des gestes qui monstroyent bien qu'il estoit en action. Puis tout en colere dit, que les Papes auoyent grand tort de laisser ainsi les Estats de ces Protestans en repos & en pleine paix, que cela estoit de mauuais exemple & de dangereuse consequence, d'autant que les Rois & Princes (qui naturellement desirent d'affermir leurs Estats) la premiere mouche qui les piqueroit prendroyent opinion de chercher de la seureté dans la meffiance, qui a asseuré tous ceux-la, & ne s'attendroyent non plus aux saints Peres, que s'il n'y auoit personne au logis.

Lors Harlequin (lequel auoit ordinairement bonne grace à ramener son Maistre quand il entroit en fougue) repartit: Mon Maistre, encor

que le prouerbe soit bien vray, que les grands personnages font les grandes fautes, il ne peut, & ne doit estre aucunement approprié aux saincts Peres, pour deux raisons. La premiere, par ce que (comme chacun fait) il ne leur appartient pas de faire des fautes. La seconde, par ce que si les Estats des Princes Protestans demeurent ainsi en paix, il n'en faut pas sauoir pis aux saincts Peres, qui ont siegé depuis cent ans. Ils n'ont rien oublié de leur deuoir contre telles gens. Premièrement, par bonnes remonstrances & sainctes promesses du repos present & à venir: apres par belles censures, monitions, bulles, bullettes, & bulletins. Quand cela n'a de rien serui, pour peu de iour & d'ouuerture qu'ils y ayent veu, ils n'ont pas manqué d'y ietter plusieurs personnes expres pour y faire germer des factiōs & partialitez, & en fin esclorre des guerres ouuertes. Qui plus est, on ne sauroit reprocher aux saincts Peres de n'y auoir tousiours rapporté toute l'autorité qu'ils se sont peu dōner sur les Rois, soit par la loy *Capio*, ff. de *seruitutibus*: ou par droit de bien sceance, ou de saincte preſeance, ou par souffrance, ou par nonchalance, ou par conscience, *aut alio quouis modo*. *Ma che volete, che volete, Signor Pantalone?* Que voulez vous mon Maistre? Ils ne trouueront tantost

plus ni Roys ni Princes, qui vueillent oster le mestier aux diables, pour tourmenter les corps & les ames.

Ainsi se passa cet Acte de leur Commedie auquel Harlequin eut cet honneur de faire la re-traite. Lors vne musique fort gentille agreoit infiniment aux auditeurs, parce que c'estoyent des Airs nouueaux, sur le subiect d'aucuns vers qui sont ci dessus.

Après, voici r'entrer le maistre des Ceremonie, avec vne magnifique suite de la plus part de leurs personnages. Et vous eussiez dit à les voir qu'ils promettoyent quelque chose de bon auant que de partir. D'entree le maistre des Ceremonies s'adressant au Docteur, lui fit vne petite censure deuant tout le monde, de ce qu'il auoit esté trop long auparauant en ses discours. Que pour son particulier, estant de ses amis, il ne l'eust pas trouué mauuais: mais si faisoient bien ceux qui attendoyent en grande deuotion le reestablissement des Rappelez: parce qu'un bien peu de tēps est bien long à qui attend. Et telles gens (veu la promptitude François) s'imaginent que depuis le temps qu'on est là dessus, leurs enfans seroyent desia à moitié instruits: & disent qu'il en est mes-hui temps, ou iamais non.

Mais vous, monsieur le Maistre (dit le Docteur) prenez garde que vous ne gastiez tout, faute d'attendre l'occasion : qui est la chose à laquelle il faut principalement regarder en tous affaires que l'on desire d'amener à leur perfection.

In tempore veni, quod rerum omnium est primum.

Or selon mon iugement, ceste occasion n'est pas encore bié venue pour le retour de ces messieurs. Et ie trouue qu'elle seroit bien plus belle qui auroit la patience d'attendre,

--dum ruat Oceano nox,

*Inuoluens umbrâ magnâ terrâque polûmque,
Myrmidonûmque dolos.*

C'est à dire,

*Lors qu'une nuit obscure & sombre,
Sous le noir manteau de son ombre,
Nous cachant la terre & les cieux,
Couurira les ruses subtiles
Qu'iront tramant parmi nos villes
Ces marmitons audacieux.*

Ie suis de tout autre aduis, signor Dottour, dit le maistre des Ceremonies : car il me semble que leur importunité ne pourroit rencontrer vne plus fauorable opportunité que maintenant,

Dum placidas vagi per undas

Tuta ludimus otium carina.

C'est à dire,

*Tandis que sur la mer d'une pleine abondance
Nos plaisirs vagabons flottent si doucement,
Et qu'en toute seurte la barque de la France
Se ioue sur le dos d'un paisible element.*

L'adiouste encor.

*Mitis, & in morem stagni placidaque paludis
Sternitur aquor aquis.*

C'est à dire

*Qu'apres des flots si hideux
Vne escume paresseuse
Dort sur l'estang limonneux
D'une paix voluptueuse:
Ayant tousiours estimé que le vray moyen de
les establir estoit de les loger entr'eux.
*Quos res plus nimio delectauere secunda,**

C'est à dire,

*Qui prennent leurs plaisirs avec trop de plaisir.
Ioint qu'il y a long temps que discourant avec
des principaux de ceste sacree Societé, ils m'ont
dit,*

Pace breui nobis opus est.

C'est à dire:

Il nous faut un peu de Paix,

Pour dresser nostre attelage.

Item,

*Tempus erit, quum prima quies mortalibus agris
Incipiet.*

Comme voulant dire,

*Le temps viendra que les François
Dormiront ainsi qu'autrefois.*

Mais quoi? repliqua le Docteur, Voudriez vous ainsi introduire vne petite poignée de gens en vn si vaste Royaume, comme matras desempenné? N'entrez-vous point en considération, sur le petit nombre que vous en auez pour en-cor? Et ne craignez-vous point, qu'après auoir tant mené & ramené ce retour des Iesuites en France, quand on en verra si peu, ou die,

Parturiunt montes, nascitur ridiculus mus.

C'est à dire

*Vous promettiez montagnes d'or,
Et nous ne voyons rien encor
De vostre present magnifique,
Que meschants petits rats pelez,
Dans la France renouuelez,
Pour ronger son corps lethargique.*

Ne vaudroit il pas bien mieux reculer pour mieux sauter, & en remeubler la France pour vne bonne fois? en lieu que faisaut comme cela, il semble que nous y portons vn chat en poche.

DES PERES IESVITES. 127

Je pense (respondit le maistre des Ceremonies) auoir esté le premier qui ait representé ceste difficulté, il me fut respondu que celui qui y auoit le plus grād & principal interest, c'estoit le Roy d'Espagne, de peur qu'un si petit nôbre d'ouuriers ne se trouuast bastât pour faire sa besogne. Mais qu'il ne s'en est plus donné de peine, depuis que l'Intendant de ses bastimens l'a asseuré, que dix maçons en ruynent tousiours autant, que deux cens en sauroient bastir. Et pour le regard de la France, pour le commencement vn petit nombre valoit mieux qu'un plus grand.

Rara inuant, primis sic maior gratia ponis:

Hyberna pretium sic meruere rosa.

C'est à dire,

On cherit & on se pare

De ce qu'on a de plus rare.

Ainsi l'on void amassez

D'une main prompte & auide

Et les fruiçts plus auancez,

Et la rose plus tardive.

Et puis il y a commencement par tout : & tous les commencemens viennent de peu.

Qua prabet latas arbor spatiantibus umbras,

Quo posita est primum tempore, virga fuit.

C'est à dire,

L'arbre qui fait tout l'Esté

128 LE PASSE-PARTOVT

De ses branches vne sale

A tout le peuple de Basle,

N'estoit, quand il fut planté,

Qu'une petite housine,

Avec fort peu de racine.

Harlequin adiousta,

Et mala radices altas arbor agit.

C'est à dire,

Et l'on void entre les plantes

Celles qui sont plus mēschantes

S'enraciner plus auant.

Le maistre des Ceremonies continuant son propos: Combien pensez vous (dit-il) qu'ils en trouueront des leurs parmi les autres ordres, & qui reuiendront à eux maintenant? Ainsi, plus ils iront en auāt, & plus leur trouppes s'enflera.

Quāque venit multis accipit amnis aquas.

C'est à dire,

Comme la riuiera amasse,

Par tout où sa course passe,

L'eau qui va d'un pas roulant

Dans le valon s'escoulant.

Harlequin adiouste encor,

Hoc quoque crede mihi crebrius agmen erit.

Et apres auoir fait vn tour sur le Theatre,

Per numeros veniunt ista gradusque suos.

Alors le Docteur, hōme plein de consideratiō,

en

DES PERES IESVITES. 129

en mit vne autre en auant: C'est qu'il estoit fort à craindre, que tous ces ieunes nouuellement imprimés ou à imprimer,

Qui se posse loqui, posse tacere negant.

C'est à dire,

Qui ont, ce maintiennent-ils,

De babiller les outils,

Mais ils ne peuvent se taire.

se trouuassent ignorans & nouueaux au mestier, & que les vieux maistres eussent enrouillé leur esprit en desfrouillant les armes de la Ligue: par-tant qu'il falloit bien aduiser comme on feroit:

Ne minuat presentia famam.

C'est à dire,

De peur que leur presence

Amoindrisse le los,

Qui les marquoit au dos,

Du temps de leur absence.

Le maistre des Ceremonies respondit, qu'il ne falloit parler de cela ni en blanc ni en noir: d'autant que les François n'y regardent pas de si près qu'ils s'en puissent appercevoir. Que la bõne opinion vne fois conceuë de ces Messieurs, suppleoit aisement à tout cela: suiuant le proverbe, *Qui a bruit d'estre matinier, se peut leuer à midi.* Au surplus, qu'auant qu'on eust eu loisir d'examiner leur suffisance, ils se seroyent habi-

lités ou rehabilités. Lors ce frippon de Harlequin dit à la trauerse,

Qui non est hodie, cras minùs aptus erit.

C'est à dire,

Je ne croi pas que celui

Qui ne vaut rien aujourd'hui

Face demain des merueilles.

La disposition des affaires (dit le maistre des Ceremonies) rend la besongne qu'ils ont à faire en France si facile, qu'encor qu'elle ait esté discontinuee, elle se peut neantmoins reprendre comme en vn instant.

*Vt pene extinctum cinerem si sulphure tangas,
Viuet, & ex minimo maximus ignis erit.*

C'est à dire,

Vous n'en voyez plus que la cendre,

Mais vous pourriez bien voir reprendre

A ce feu, qui semble estre esteint,

Vne ame, vne flamme nouuelle,

D'une languissante estincelle

Qu'un peu de soulfre auroit atteint.

D'autant qu'il ne falloit point douter, qu'il ne fust demeuré quelque estincelle de reste du feu de nos seditions, puis qu'il estoit demeuré quelques Iesuites dans le Royaume, nonobstant leur bannissement. Tesmoin celui à qui l'on demandoit où nous auions peu si tost trouuer ceux que

DES PERES IESVITES. 131

nous reſtabliſſons preſentement? Il reſpondit,

Munus & hoc nobis diruta Troia dedit.

C'eſt à dire,

Dans les mazures de la France,

On a trouué ces beaux threſors

Qu'on penſoit en eſtre dehors.

Au reſte, qu'il y auoit bien vne autre raiſon plus forte que tout cela, pour laquelle les Ieſuites ne pouuoient manquer d'eſtre les biens venus en France : c'eſt aſſauoir, qu'ils venoyent de la main de ſa Sainteté.

-- *Acceptiſſima ſemper,*

Munera ſunt autor quæ pretioſa facit.

C'eſt à dire,

Les preſens que le donneur

Maintient eſtre de valeur,

Sont toujours treſagreables.

Ils ne ſemblent iamais eſtre ni rouillés, ni ſouillés, & encor que ſon ne ſen trouuaſt bien à l'aduenir, on aura toujours ceſte excuſe preſte,

Da veniam culpa, decepit idoneus autor.

C'eſt à dire,

Supportez le deſaut, ſi vous eſtes deceus:

C'eſt par vn qui toujours par tout a le deſſus.

Mais aſſeurez vous que nous ne ſerôs iamais en ceſte peine là en France, & que les Ieſuites ſont bien plus habiles gens que vous ne les faites. Et

R ij

quel plus grand tesmoignage voudriez-vous de leur heureuse capacité, que d'auoir si tost gagné ce point sur les François (qui a peine rassemblent les pieces de leur naufrage,)

Nulla fides damnis veri (que doloribus adsit?)

C'est à dire,

Que de tant & tant de pertes

De tant de douleurs souffertes

Ils n'ayent nul sentiment:

Et que la sanglante offense,

Qui blessa vn Roy de France.

S'oublie si aisement.

Ha! si cela est (dit le Docteur) ie n'en parle plus: Et vous confesse que leur retour ne peut plus receuoir de legitime empeschement, qui qu'en parle, ou qui qu'en escriue. Et afin que nous aussi n'empeschions pour plus long temps, ou les Iesuites d'entrer, ou nos auditeurs de sortir, ie suis d'aduis qu'on les face appeller & rappeler, si ce n'est que vouliez que nous discourions vn quart d'heure ensemble, sur les moyens de leur entretenement: ou nous aurons de la difficulté en ce Royaume, aujourd'hui que le monde est pauvre.

Le maistre des Ceremonies respondit au Docteur, qu'il estoit d'aduis de remettre à faire en leur presence le discours sur les moyens de leur

DES PERES IESVITES. 133

entretènement , parce qu'il falloit que les premières ouuertures vinssent d'eux , comme de personnes qui ont les yeux ouuerts à mille expédients: & selon ce qu'ils nous diront, & vous & moi (dit il) y contribuerons de ce qui sera en nostre pouuoir.

Harlequin adiousta, Et moi aussi,

Sic quæ non profunt singula, multa iuuant.

Or tandis que le maistre des Ceremonies alloit donner ordre à les faire venir, le Docteur fit quelque discours pour rendre la compagnie capable de la nouuelle disposition des affaires. Il representa donc, entre autres choses, que comme les peres , accompagnés de prudence, festudient de retenir aupres d'eux, ceux de leurs enfans qu'ils cognoissent estre plus enclins aux vices , afin de les ramener , tant par le respect qu'ils leur doiuent , que par les occupations auxquelles ils les obligeront. Et comme les grands Princes retiennent aussi vtilement aupres d'eux ceux, qui brouillons & audacieux de leur naturel ne pourroyent estre contenus par autre bride que par la presence & autorité du Souuerain: On auoit de mesmes , apres vne infinité de considerations , iugé qu'il falloit retenir les Iesuites en ce Royaume.

Sunt procul à nobis, & tamen inde nocent.

Par ainsi comme vn serpent , fil est tenu pres de la teste , ne vous peut endommager , ce qu'il feroit fil n'estoit tenu de bien court: aussi valoit il beaucoup mieux tenir ces messieurs de court, & pour cet effet les mettre en lieu où l'on vist clair en leurs actions , & à la veuë de toute la France , peuplée à present des plus clair voyans de l'Europe : en esperance qu'estroictement liés à l'instruction de la ieunesse , & obligés par vn bien fait qu'ils n'ont pas meritè, peut estre n'auroyët-ils plus ni le loisir, ni la volonté d'aiguïser des cousteaux pour blesser les Rois. Bref qu'il valoit mieux heberger des boute-feux , que les laisser coucher là dehors. Non que j'aye (dit-il) esté l'auteur de cet aduis , ou le promoteur de cet expediët. Je ne vous donne pas ces raisons, comme vn mets de ma Philosophie. Mais ie n'ay pas peu faire aller les affaires autrement. *Stulta (hercle) hac ratio est, ne dicam dolosa, atq; damnoſa: verùm quid agas? vt res est, ita morem geras.*

C'est à dire,

*La raison n'est pas des meilleures,
Ni ceste voye des plus seures;
Pour vous en parler franchement.
Mais que voulez vous que i'y face?
N'aurois ie pas mauuaise grace,
De viure aujour d'hui rondement?*

DES PERES IESVITES. 135

Alors entra au Theatre d'un pas plein de gravité vn personnage , auquel tous les autres firent place: & toute l'assistance le reconnut bien à sa parole , & à sa façon , pour celui qui auoit fait le prologue. Il prononça ces vers qui s'enfuiuent,

*Le Conseil en est pris: les voici qui reuiennent.
 Mais en interpretant ce qui est de l'arrest,
 Ils marchent à la file, il faut qu'ils se maintiennent.
 On a pourueu à tout. Je vous dirai que c'est.
 Entre les fondemens de nos maisons panchantes
 On mettra des lapins qui nous feront gratter.
 Dans nos vergers peuplez de mille ieunes plantes,
 On logera des boucs qui ne pourront brouter.
 Et parmi nos essains en des ruches nouvelles,
 On mettra des frelons qui ne sçauront picquer,
 Et dedans nos forests des meurtriers si fideles,
 Qu'on pourra parmi eux librement trafiquer.
 Pourquoi dans nos forests ces ceintes chattemites?
 Dans les Palais des Rois qu'on leur dōne leur plat.
 Les bois & les rochers seront pour ces hermites,
 Qui n'auroient pas l'esprit de troubler un Estat.
 Des lambris azurez de nos chambres Royales
 Ceux-ci tout priuement commencent d'approcher,
 Et leur agraffe sainte, & leurs faueurs fatales,
 Aux fleurons de nos Lys saintement approcher.
 Mais il le faut ainsi: la raison en est bonne,*

*Au Chef & à l'Esprit il faut vnir ce corps,
 Et ioindre nos trois lys à sa triple couronne
 Afin d'estre tousiours du costé des plus forts.
 Ceux qui s'en fascheront ne sauent pas, peut estre,
 Que ce Chef disposant de la Terre & des Cieux
 Veut qu'on passe par là, ou bien par la fenestre,
 Et fait bien plus d'estat des nouveaux que des
 vieux.*

Le docteur adiouta pour vne plus claire exposition de son dire, que les Iesuites priuatiuemēt à tous autres estoient le *Medium* des bonnes graces de leurs Sainctetés.

Hæc res & iungit, iunctos & seruat amicos.

C'est à dire,

*Afin d'estre bien ensemble,
 Et pour bien s'y maintenir,
 Il faut en faire venir,
 Ou chose qu'il leur ressemble.*

Lors apres vne admiration, Pantalon dit, regardant le Docteur, *Causa potens!*

Mais on vid à mesme instant paroistre Pere Cotton, lequel festoit auancé sans estre sonné, & tenoit la porte ouuerte aux autres qui le sui-uoient, & qui deuoient seruir de coureurs ou enfans perdus, à tout le gros qui venoit ou viendroit aux siecles aduenir,

Leuia arma minacis.

C'est

C'est à dire,

*Ces premiers que le saint Pere,
Qui menace de si loin,
Tient armez à la legere
Pour estre pres au besoin.*

Ceux la auoyent à leur queue, vne petite harde d'escoliers, desia grandets, qui auoyent appris vne leçon par cœur, pour faire honneur à leurs Maistres, à ce que toute la ieunesse Françoisé leur portast enuie. Et c'est vn chorus que vous leur verrez tantost prononcer. Mais il ne faut point demander les caresses que leur fit Harlequin, les regardant les vns apres les autres, s'il les faisoit bon voir: puis il se retourna deuers le peuple, & dit,

*Parmi ces bons Docteurs la ieunesse s'esleue,
D'un leuain excellent nostre paste se leue,
Puis que pour enfourner les Voici reuenus,
Nous ne manquerons pas d'auoir des pains cornus.*

Et derechef reuenu à eux senqueroit où ils auoyent tant esté, & à leurs escoliers où ils auoyent tant tette, pour estre desia si grands, beaux, (prononçant le B comme font les Gascons) & bien façonnés à l'auenant. Mais le maistre des Ceremonies, qui leur vouloit bien faire plus d'honneur que cela, dit à l'assistance,

Castalis hos habuit, mox prodidit vnda latentes,

*Fulgebant totis quum tegerentur aquis.
 Condita sic puro numerantur Lilia vitro,
 Sic prohibet tennes gemma latere rofas.*

C'est à dire,

En Castille (leur source) ils tenoyent leur Chapitre

Couuerts, mais non pas tant, qu'on ne les vist briller:

*Ainsi l'on pourroit voir au trauers d'une vitre
 Sur vn grand vase à fleurs les lys s'essarpiller:
 Ainsi dans le bouton, auant la fleur esclose,
 Se cache, & se paroist, la beauté de la roze.*

Les escholiers, qui auoyent en leur memento
 de commencer leur Chorus, si tost que le mai-
 stre des Ceremonies auroit fait mention de la
 source Castalide, dirent,

*Le bon pere Loyola,
 De qui les enfans nous sommes,
 Disoit bien qu'on vient de là
 En la lumiere des hommes.
 Que la Science estoit l'œil
 De ceste machine ronde,
 Et nous vn second Soleil
 Pour la vieillesse du monde.
 Si nous sauions bien garder
 Ceste source Castalide,
 Disans que pour l'aborder*

Il faille auoir nostre guide:

Et la clorre de si pres

Que la ieunesse n'y puize

Sans donner dedans les rets

De nostre sainte maistrise.

Mais nos rets aux bons esprits

N'estoyent que toiles d'araigne,

Quoi que le fil en fust pris

Du plus fin tiffu d'Espagne.

Les Nobles & Courtisans

S'en alloient en Italie:

Des marchans & artisans

Ne nous restoit que la lie.

Encor fut ce en la saison,

Que le luxe & les delices

Estoyent la douze prison

Et l'amorce de tous vices.

Lors qu'il faisoit si bon voir

Ceste hideuse abondance,

Nous commençâmes d'auoir

Vn grand pied dedans la France.

Ell' aimoit les estrangers,

Et à soi-mesme estrangere

Alloit couuans les dangers

Qui ont esclos sa misere.

Sa misere a retransché

Et le luxe & les delices,

140 LE PASSE-PAR-TOVT

*Et quelque peu esbranché
Ce grand halier de tous vices,
Or ce beau retranchement
Fut fait en nouuelle lune.
Tel bois recroist vistemment,
Aussi fait nostre fortune.*

*Mais d'où naistra la faueur
Nourrice de la science?*

„ *Ores n'a bien ni honneur*

„ *Qui ne les a de naissance.*

„ *Les aisles de la Vertu*

„ *Ne volent qu'à fleur de terre:*

„ *Et à leur vol abbatu*

„ *Tous les grands vents font la guerre.*

„ *Le vice d'autre costé*

„ *Ne nous fera plus paroistre.*

„ *Le mestier doit estre osté:*

„ *Car l'apprenti en est maistre.*

Puis le propre du François

Est d'aimer choses nouuelles.

Celles qu'il voit vne fois

A ses yeux ne sont plus belles.

Nous auions fait de bon coups

Pour nous rendre necessaires:

Mais on void bien que sans nous

Ils font prou bien leurs affaires.

Nous auions alembiqué

*La science plus subtile,
Et l'auions communiqué
Comme on fait vn vodevile.*

*Mais ces Messieurs endormis
Dans ceste paix nonchalante
Se sont rendus ennemis
De nostre troupe sauante.*

*Par vostre foy, pensez vous,
Si nous n'en faisons instance,
Qu'ils se souuinissent de nous
Pour nous rappeler en France?*

*Le pis est en tout cela
Qu'un valet qui se presente
Bien souuent demeure là
Pour vne table d'attente.*

*Et quand pour certain on sçait
Qu'il a ia fait quelque frasque,
On craint tous les pas qu'il fait,
Et lui craint vne bourrasque.*

*Quel moyen d'estre asseuré
S'il sent que l'on le redoute?
Quand il a prou enduré,
Il fait en fin banqueroute.*

Ce chant acheué, ceste troupe d'escoliers se retiroit, & en effet faisoit banqueroute à la compagnie. Mais elle fut rencontrée au passage par le SOLDAT FRANÇOIS, qui festoit porté là au

bruit du reſtaſſement des Ieſuites. Reco-
gnoiſſant à leur habit qu'ils eſtoient le diminu-
tif de ceux qu'il cherchoit, il leur demanda des
nouuelles de meſſieurs leurs maiſtres. Mais cō-
me il ſçeut qu'ils eſtoient entrés, il leur alla fai-
re de grandes accolades, & les careſſa les vns a-
pres les autres, comme s'ils euſſent eſté toute
leur vie ſes camarades. Je croi que le pauvre
ſoldat en eſtoit chez Guillot le ſongeur, & ne
ſachāt en temps de paix de quel bois faire FLES-
CHE, il ſe figuroit qu'il y en auoit vne toute faite
en Berry, propre pour donner droit au cœur à
ceſte Paix, qui le faiſoit ainſi croupir en oiſiueté
& langueur. Et ayant appris qu'elle auoit eſté dō-
née en depoſt aux Ieſuites, il ſe promit de faire
ſes affaires par leur moyen. Et pour monſtrer
qu'il ſe vouloit accōmoder à eux en toutes cho-
ſes, pour n'eſtre plus que bras & manche, il ſe mit
ſur le meſme ton de leurs eſcholiers, & dit,

*Race du bon Loyola,
De qui l'heureuſe fortune
Vient pour faire le hola
A ceſte paix importune.
Je ſuis le Soldat François,
Qui, n'eſtant plus en ſeruiſſe,
Me vien ranger ſous vos Loix,
Puis que vous rentrez en lice.*

*Je veux dependre de vous:
Car vos escholes publiques,
Et aux sages & aux fous,
Doiuent donner des pratiques.*

*Et quand l'Estat vous aura,
J'aurai bien de l'exercice:
Ainsi la guerre sera
Nostre commune nourrice.*

*Aussi vous voyant venir
(Tant ce grand calme me fasche)
Je ne me suis peu tenir
De mettre au vent mon pennache.*

*Ensemble on nous a casse:
Ensemble allumons la mesche,
Avant que des briz passez
On ait rebastie la bresche.*

Il ne se peut dire comme ce Soldat François ioua bien son personnage, au contentement de toute l'assistance. Vous n'eussiez sçeu oster de l'opinion des personnes que ce ne fust veritablement vn François de ceux qui vont en Italie apprendre les exercices, à cause qu'il n'y en a plus en Frâce. Vous lui eussiez veu auoir le geste & la façon toute Françoisise, & pour dōner grace aux ondes de son pennache secouer par fois les oreilles. Le Seigneur Pátalon eut encor meilleure grace que lui à le contempler de pied quoy:

comme chose toute nouuelle de voir vn soldat François en Italie. D'autre costé ce soldat, voyant les admirations de Pantalon, ne se peut cōtenir qu'il n'esclattast de rire, & perdit toute contenance, comme vn ieune folastre.

Mais pour parler de la mine d'un autre hōme bien estōné, il faut parler du pauvre M. Guillaume, lequel fut lors introduit en ceste assemblée, où ie m'assure qu'il ne fust pas allé qui ne l'yeust mené. Car il faut que vous sachiez qu'en tout ce grand nombre il ne pouuoit recognoistre que deux personnes: dont l'un estoit le Soldat François, auquel il n'auoit garde de s'adresser, d'autant qu'un peu auparauant il festoit, escrimé cōtre lui à coups de bec. L'autre estoit le Pere Cotton, lequel cōmençoit desia à gouuerner ciel & terre. Maistre Guillaume lui dit d'abord, Cōtentez vous de cela, mon pere mon ami. Contentez vous de cela: sans vouloir encore regēter là bas, ie ne sai où, par dela les Antipodes, & faire des questions à des diables, quand vous en trouuez quelqu'un çà haut a l'escart, dans le corps de quelque pauvre fille. Car au lieu de faire parler un Diable, vous feriez parler tout le monde. Et n'estoit que ie ne rougis iamais nō plus que vo², la couleur me fust mōtée au visage du bruit qui en court. Mais faites comme moi: allez à Niort.

Car

Car il y trois mois, que quand ie voy quelqu'un qui me veut accoster, ie lui crie de dix pas, nenni, nenni, Monsieur, me figurant que c'est de celle qu'il me veut entretenir, puis qu'il n'y a ni fol ni sage qui n'en parle. Mais puis que vous auez tant d'enuie de fauoir des nouuelles de Messieurs vos oncles, & de madamoiselle de Clarendal, & du Purgatoire, & de l'establissement de vos colleges de Poitiers & de Reims, & de la vie du Roy, & de la ruine des heretiques: vous me deuiez enuoyer en ce pays-là. Il n'appartient qu'à moy à faire de tels voyages, & en r'apporter toutes nouuelles. Et croyez que si en allant ou en reuenant i'eusse rencontré ce meschant diable, qui a fait parler de vous si mal à propos, ie l'eusse tant daubé (pourueu qu'il n'eust point eu de laquais) que i'eusse fait parler de Maistre Guillaume en ce monde & en l'autre. Car ie croy que c'est ce meschant vilain-là, qui m'y vouloit retenir à toute force, & qui me prenoit pour la Papesse Ieanne: parce que ie suis triste, & ridé comme elle estoit, & qu'elle n'auoit non plus de barbe que moy. Nonobstant tout cela, si vous voulez vous fier en moy de vos questiōs, ie porteray vostre paquet: & vous en feray auoir responsedās quinzaine pour toutes prefixions & delais. Et croyez que auant que reuenir, ie m'in-

formérai particulièrement cōment marchoit le serpent auant qu'il fust condāné à se trainer sur la poussiere, s'il alloit à pied ou à cheual, s'il voloit ou s'il nageoit. Le tout pour contenter vostre noble curiosité, & pour retirer & supprimer force copies de vos questions, si ie n'en pouuois attraper les originaux escripts de vostre main. Mais le pauvre maistre Guillaume avec toute sa folie, voyant que le Pere Cotton se tenoit si bien de rire, se figura qu'il auoit beau dire, que ceste Commission n'estoit pas pour lui: & se retournant vers la c ompagnie. Je croi (dit-il) qu'il aime mieux y aller lui mesme, s'il peut auoir son congé de la Cour, dont ie serai bien marri: parce qu'il me garde si biē des pages & des laquais. Au pis aller ie serois d'aduīs qu'il n'aille pas plus outre que iusqu'à Toledé en Hespagne, où il trouuera à qui parler, sans aller plus loin.

Harlequin qui auoit ceste bonne coustume de se faire de feste par tout, s'estoit mis droit derriere maistre Guillaume, & haussant les pieds, prestoit l'aureille pour entendre ce qu'il disoit: soudain qu'il ouit parler de ce voyage d'Espagne, pour Pere Cotton, dit,

*I precor, & totos auida cute combibe soles,
Quàm formosus eris, quum peregrinus eris.*

C'est à dire,

DES PERES IESVITES. 147

Battez moy la campagne, & allez tout l'Eſté,

Recuiſant au ſoleil voſtre peau baſanee.

*Que vous ſerez beau fils, quand vous aurez eſté
Pelerin en Heſpagne aux grands iours de l'an-
nee!*

Mais le Seigneur Pantalon, ennuyé de tant de fols, deſiroit d'en détraper la compagnie & dit qu'il falloit licentier Maïſtre Guillaume, lequel parloit touſiours, & ne diſoit rien: & Harlequin ſon valet, qui parloit touſiours, & ne faiſoit rien: & qu'il n'eſtoit pas reſolu de le plus tenir à ce prix là. Harlequin repliqua qu'il iroit donc ſervir Pere Cotton, où autre premier Ieſuite qui iroit en Heſpagne.

Lors vous euſſiez veu le ſignor Pantalon en colere: & d'une voix forte, lui reſpondre, Si tu mets cuire la deſſus tu auras le ventre bien plat. Car puis que ces meſſieurs ſont reſtablis en Frâce, ils n'ont garde d'aller plus en Heſpagne. Ce ſeroit faire vne faute qu'ils defendent ſi expreſſement par leur Logique qui s'appelle, *Petitio principii*. C'eſt le ventre de leur mere, ils n'y retournent plus.

Mais le maïſtre des Ceremonies ſ'avança, pour impoſer ſilence à tous ces fols-là, & parler d'affaires avec le Docteur, auquel il vouloit deſerer de faire l'honneur de la maiſon pour la re-

ception de Messieurs. Ce qu'il ne voulut accepter, parce (dit-il) que cela est proprement de la charge du maistre des Ceremonies, & il faut que je me remette en memoire plusieurs choses que j'ay à leur dire de la part de monsieur le Cardinal Bellarmin. Seulement ay-ie vn aduis à vous donner : c'est que si vous voulez que ces Messieurs facent merueilles à leur aduenement, donnez leur de la louange tant & plus. Cela sera cause que pour n'en paroistre pas indignes ils ne manqueront pas de mettre en euidence tout ce qu'ils sauent faire: autrement ils iroyent traînant les aîles.

Laudatas monstrauit auis Iunonia pennas.

Si tacitus spectes illa recondit opes.

C'est à dire,

*L'oiseau porté-miroirs estale son pennage,
Lors qu'il void (glorieux) qu'on louë ses beautez.
S'il se sent regardé d'un desdaigneux visage,
Il cache ses thresors dans ses riches costez.*

Laissez moi faire (respondit-il) & se retournant du costé de ces Messieurs, Vous estes bien-venus (dit-il) encore que vous ayez esté long temps en chemin. Mais en lieu de vous ramenuoir les difficultez que vous avez passees & surpassees, ie desire de mettre plustost deuant vos

yeux vne liste des auantages que vous auez à present en la France. En ce denombrement la *Reputation* de vostre sauoir doit marcher la premiere, de laquelle la seule *Idee* a vn si excellent lustre, & vn si grand esclat par tout le monde, que l'on prendroit (à voir de loin) vostre Science pour *Science en Idee*: qui ne sauroit ce que vous auez *in recessu*. Or ceste *Reputation* marche d'elle mesme entre deux airs, laissant au dessous de soy ce qui est du Commun. Les vns disent qu'elle a esté portee là par vostre grand Pere, autres par vostre *Grammaire*. Je m'en rapporte. Tant y a qu'il faut bien qu'il y ait quelque chose, puis que les plus anciens & les mieux fondez lui diferent, ce qu'ils ne feroient pas (vostre Institution estant nouuelle) s'il n'y auoit en vous quelque chose de bien rare & de bien delié. Elle est particulièrement recommandable aux François qui aiment les nouueautez en habits: & ils la trouuent habillée, parée & suiuiue à la nouuelle façon. Ils trouuent aussi que vos Sciences sont incontinât apprises, & c'est ce qu'il leur faut, puis qu'ils prennent plaisir à gorger leurs esprits d'une variété ou multiplicité de sciences, & les mettre les vnes sur les autres, comme harangs en vn caque, si bien & si beau qu'ils ayent quelque chose de tout & qu'ils n'ayent de tout rien. Il leur faut, di-

ie, donner vne superficie de ce qui est dans les bons liures, & par vostre bonne methode vne science infuse ou confuse: pour prôduire vn mesme effect en l'esprit que la foy implicite fait en la conscience, & les seditions en vn Estat.

Le second auantage que vous auez à present en France, est la vieillesse de l'Vniuersité de Paris, qui apres auoir suruescu à toutes les autres de la France, & nous auoir monstré long temps en verd l'esperance de ce Royaume, semble maintenant estre comme vne vieille descheuelee, qui fait peur aux petits enfans, pour les vous enuoyer à la foule: ou comme ces vieux troncs vermoulus qu'on va retranchant & accommodant pour y tenir des essaims de mouches à miel, afin que vous vous placiez commodement,

Corticibus canis vitiosaque ilicis alueo.

Ie tirerai en ligne de compte pour vn troisieme aduantage qui vous est acquis, ce que plusieurs iugeroient vous estre preiudiciable, c'est assauoir la *venalité des Offices*, que l'on dit estre si chers en France que merueilles. La verité est, que cela pourroit destourner beaucoup de gens de faire estudier leurs enfans, ne se sentans pas le moyen de leur acheter des offices. Mais cela ne peut preiudicier qu'à ceux qui enseignent le

DES PERES IESVITES. 151

Droict, vous n'estes pas de ceux là. Au contraire i'en tire ceste consequence, qu'une infinité de personnes, ayans des lettres & point d'argent, ne pouuans mieux, se rangeront à vous, voyans qu'un estat de Iesuite ne couste rien. Et ce sera vn renfort de potage qui rendra avec le temps vostre gros plus peuplé que celui de tous les iuges & de tous les financiers du Royaume ensemble. Iugez par là, si vous aurez de quoi rendre aux autres ordres ce qu'ils vous auront presté à ce commencement: & qui plus est de leur faire plusieurs petis presens, notamment aux Couuens des pauures Cordeliers, dont le nombre est tellement diminué, que ceux qui ont esté à leur Chapitre general tenu à Rome l'an 1596. asseuerent qu'il n'y en aura tantost plus que six vingts mille en toute la France. Il est vray que vous ne ferez pas tenus de leur donner que des plus mols & des plus lasches, qu'aussi bien voudriez vous reietter de vostre Ordre, & leur dire,

---*Discedite segnes,*

Non sunt hac timidis signa tuenda viris.

C'est à dire.

*Dauant, dauant, lasche canaille,
Qui ne feris chose qui vaille
Sous nostre superbe estendard:*

*Et ne bougés plus du bagage,
Ou reclus dedans vne cage,
Faites là vostre cas à part.*

L'Estat present de la France vous donne vn quatriesme auantage. Car si vous fussiez venus plus tost, vous n'y eussiez veu que des ruynes, dont l'obiet eust encor rendu à tout le monde le vostre odieux: & puis vous eussiez participé trop auant aux incommoditez publiques. Mais maintenant il y fait bien meilleur

Quum bene diues ager, quum rami pondere nutant.

Et si pour tout cela les François ne sauroyent encore faire les cheuaux eschapper, veu qu'ils ne font quasi que prendre terre apres vne longue tourmente: & vous pourriez bien dire,

-- *Occurramus ad vndam,
Dum tripidi egressisque labant vestigia prima.*

C'est à dire,
*Maintenant il y fait beau,
Il n'en faut que trois ou quatre,
Pour vne troupe combattre
Esfonnee du basteau.*

Au reste, ils se sont couchez tout de leur long, des qu'ils se sont veus en terre ferme. Ils se reposent: vous ne les sauriez faire leuer de là.

.- Et

-- *Et iam desueta triumphis*

Agmina.

Nostre bande les alla voir en cet estat-la, pour leur faire passer le temps à quelque chose. Nous auions *Madona Vittoria*, laquelle donaua à *i Signori Francesi* vna Image delle Vittorie loro. Il capitano *Mattamoros* donaua bona gracia alla sua attione, & nondimeno figurava vno *Thrazone Hispano*, Il Signor *Horatio* staua come vna imagine d'vno inamorato, o veramente vna statua dello Amore. *Livia* & *Flaminia* monstrauieno tutti l'inganni delle donne. Il *Fretelino* & questo *Harlequin* vno speculo d'alcuni ridiculi vecchi : & cosi generalmente tutte le altre persone ripresentauieno, con molti discorsi & piaceuole inuentione, vna *IMAGINE della Verità*.

Or sachez que nous fusmes les bien venus, & nous en sommes trouuez le mieux du monde, voire auons rôpu la glace à ceux qui apres nous seroyent rappelez ou viédroyent sans semondre pour representer sur le Theatre de la France l'Ombre du corps de la verité, l'Idée des bonnes Sciences, l'Image de la Modestie & des vertus morales, le tableau d'vne guerre sainte, le portrait au naturel des miseres passees, le crayon de celles qui passeront, & l'archetype des reuoltes & autres nouuelles impressions qu'il conuiendra

donner aux peuples.

Or Monsieur le Cardinal Bellarmin remarquoit encor pour le cinquiesme aduantage que vous auez en France, vne merueilleuse *Sympathie*, non seulement de vostre science subtile & sententieuse, à l'esprit subtil & sententieux des François: mais aussi de vostre Estat à l'Estat de la France. Car comme pour toutes sortes de rauages, oppressions, miseres & calamitez publiques (qui en apparence deuoyent laisser l'Estat desbiffé & deschiré) il ne laisse pas d'estre en plus d'honneur qu'auparauant: il semble aussi que le diable de pere Cotton a si bien sceu contrefaire par ses enchantemens les miracles que Dieu auoit faits pour la ressource de ce Royaume, quelque leçon que vous donniez ou preniez pour vous, qui que vous blessiez, qui que vous flattiez, qui que vous trompiez, vous autres Rappelez: vous trouuez tousiours sur vos pieds, aussi bien que les chats. Tout vous vient bien: *Decorant bene nata culpa, nullis casibus delebiles.*

Tandis que le maistre des Ceremonies estoit ainsi embesogné à figurer la disposition des affaires feurables pour les Rappelez & reuenus, le Docteur auoit mis ses lunettes, & tenoit les yeux fichez sur vn petit papier de la grandeur des *Agenda* du pere Cotton. C'estoit vn memoire

lequel partant d'auec Monsieur le Cardinal Belarmin il auoit dressé pour se pouuoir souuenir de certains points qu'il deuoit recommâder aux Iesuites *Nuper* Hespagnòls, *nunc* François. Il estoit si attentif là dessus, qu'il lui fallut faire signe que c'estoit à lui à parler. Quâd il eut leuë la teste. C'est pour vous monstrier, Messieurs, que ce que i'ay à vous dire, ie ne vous parleray pas par cœur mais par escrit, afin que vous ne mespriiez pas les aduis que i'ay charge de vous donner touchât la maniere de viure que vous auez à obseruer en France. Non pas pour vous obliger à quelque austerité nouuelle j'en serois bien marri: au contraire

Artis erunt tacita mollia iussa mea.

Tesmoin le premier precepte qui est sur mes Instructions de vous recommander sur tout

Blanditias molles, aurèsque inuuantia verba.

C'est à dire :

*Que vous laissiez en vos estudes
Vos façons tetriques & rudes:
Et vsiez, pour ne rien gaster,
De douceurs pleines de souplesse,
Et de mots, dont le son ne blesse
Les oreilles qu'il faut taster.*

Car vous deuez vous figuer que la *Flatterie* est la Dame d'honneur de la Paix. Feu sa sainteté la lui donna, lors qu'elle prit tant de peine à mettre le monde en repos: l'ayant recognue merueilleusement propre pour endormir & faire longuement reposer les consciences, posséder les esprits, moderer les courages, tourner & destourner les volonteiz. C'est son ordinaire de produire ces magnifiques effects-la, si ce n'est qu'elle rencontre de ces ames genereuses, & tellement releuees, que les esprits n'en puissent estre dominez, ni la volonté alteree, ni la conscience demeurer engourdie. Mais ie n'ay pas charge de vous aduertir que vous vsiez d'aucun respect, retenue, discretion ou exception en cela: poussez seulement: vous en emporterez ce que vous pourrez,

Ad multas lupa tendit oues, pradetur vt vnā.

Souuenez-vous seulement qu'une teste de Saumon vauz mieux que cent testes de grenouilles. Par ainsi, Messieurs, en quelque lieu que vous foyez, vous mettrez la douceur en monstre sur vostre visage, en vos paroles & en vos actions: afin de faire voir à tout le monde, qu'en tout & par tout vous vous conformés aux intentions du saint Pere, lequel,

*Postquam misa sua renocauit fulmina dextra,
Nunc iubet ingenium mitius esse feris.*

C'est à dire,

*Et maintenant qu'il retire
L'ardent foudre de son ire,
Qu'il auoit sur nous ietté:
Il rend ces bestes sauvages
Bien plus douces & plus sages
Qu'elle n'ont iamais esté.*

Harlequin adiousta,

Et qua nunc ratio est, impetus ante fuit.

C'est à dire,

*Ce qui n'estoit que boutades,
Ce qui n'estoit que fougades,
Conuer ti en iugement
Agira plus doucement.*

Quand tout est dit, il ne demeure bonnement autre chose aux foibles instrumens pour agir puissamment, que la douceur de la flaterie, de laquelle les Poëtes nous ont laissé vne belle description, lors qu'ils ont représenté les effects du chant des Syrenes,

*Syrenas hilarem nauigantium pœnam,
Blandasque mortes, gaudiūque crudele:
Quas nemo quondam deserabat auditas.*

Harlequin se mit à les exposer monstrant du

158 LE PASSE-PAR-TOVT
doigt ces Messieurs,

*Ce sont nos trompeuses Syrenes,
Dont les flagornantes haleines
Savent si tres bien discourir
Qu'elles font doucement mourir:
Ramenant nos ioyes cruelles,
Et nous en donnant de nouvelles
Quiconque les entend parler
Ne les sauroit laisser aller.*

Au contraire, vous voyez que ceux qui mement le plus grand bruit ne font pas les plus grands effects. Que les choses qui viennent avec violence ne durent pas. Et qu'un grand vent n'est pas si propre à attiser le feu qu'un moindre

Nutritur vento, vento restinguitur ignis:

Lenis alit flammam, grandior aura necat.

Ces petits soufflets, ces petits soufflets sont bien plus propres.

Ce que ie vous en di n'est pas pour vous garder de souffler, & de faire tousiours quelque chose de peur d'en oublier le mestier. Mais c'est pour garder qu'on ne vous oye souffler : & pour vous aduertir de ne rien esuenter.

Si latet ars, prodest: affert deprensa pudorem:

Atque adimit merito tempus in omne fidem.

L'exposition de Harlequin fut,

Celui qui couue un malefice,

*S'il en scait cacher l'artifice,
Pourroit bien atteindre à son but,
Mais s'il le met en euidence
Il met le monde en mesfiance,
Et n'attend qu'un honteux rebut.*

Non qu'il vous faille aller par la France, comme qui cacheroit quelque chose sous son manteau, & qui ne voudroit pas qu'on le vist: estant tout certain que,

Quod tegitur maius creditur esse malum.

C'est à dire,

*Car on croi que pas à pas
Glisse un mal qu'on ne void pas,
Et que son venin s'espanche,
Ceux qui ne sauent que c'est,
Font le loup plus grand qu'il n'est,
Le bras plus gros que la manche.*

Faites donc faire toutes vos fenestres sur la ruë, aussi bien que ce grand personnage qui estoit content que ses voisins vissent tout ce qu'il faisoit en sa maison: & qu'en apparence on voye clair iusques au fond de vostre estomac, ne plus ne moins que si vous auiez esté percez à iour comme cribles, en tant de charges & rencontres où vous vous estes trouuez contre ces Protestans, & estes venus si souuent aux prises avec eux qu'il est impossible que n'ayez eu de grâdes

160 LE PASSE-PAR-TOVT
estocades.

Harlequin repartit, Je ne veux pas laisser passer
ceste-la, & vous ne prouueriez point par moi,
qu'on ait iamais eu aucune prise sur eux,

Abduxere retrò longe capita ardua ab icctu.

C'est à dire,

*Quoi qui leur soit arriné,
Ils ont si bien esquivé,
Qu'ils n'ont point receu d'atteinte
De tant d'assauts au milieu,
Tousiours la teste en beau lieu
Portoit leur brigade sainte.*

Le Docteur reuenant à ses instructions: Mais
quoi qu'il en soit (dit-il) gardez vous bien de
donner toute vostre science à vos escoliers tout
à coup. Il les faut mieux mesnager que cela, &
au bout de chasque leçon accrocher leur espe-
rance pour vne autre fois,

Et quod non dederis, semper videare daturus.

C'est à dire,

*Faites qu'il semble à vostre mine
Que demain vous leur donnerez
Quelque chose toute diuine
Que ceste nuit vous songerez.*

Harlequin adiouta,

Sic Dominũ sterilis sæpe sefellit ager. C'est à dire,
Ainsi le champ de belle monstre

Qui

*Qui l'œil de son maistre flattoit,
Après (sterile) ne rencontre,
A donner ce qu'il promettoit.*

Le Docteur continuant son propos, dit, Amuses vous, abusez les des petites niaiseries de Despau-
tere vostre bon Poëte. Il ne se peut rien dire de
plus propre pour vous servir de contenance &
de couverture à vos appalts:

*Et quæ piscis edax auido malè deuoret ore,
Abdita supremis ara recurua cibis.*

C'est à dire,

*Et que la ieunesse gourmande
Se gorge de ceste viande:
Sans prendre garde aux hameçons
Que vous cachez sous vos leçons.*

Puis le Docteur ayant pris ses lunettes, & ietté
l'œil sur son papier, adiousta,

Atque illis per sæpe rota ducantur inanes.

C'est à dire,

*Mettez les aux grands ronds, faites les bien tour-
ner,*

*Et sur ceste leçon longuement sejourner,
Propre pour eslaurdir l'air de vostre manège.*

Item,

Inde alios incant cursus aliòsque recursus.

Aduersis spatiis alternisque orbibus orbes.

Impediant. Car le moyen de vous rendre ad-

mirables, c'est de savoir *obscuris vera inuolvere*.
alors *Stupet inscia turba*. Ils ne savent où ils en
sont. Ils ont beau ouvrir les yeux, ils ne sauroy-
ent voir le chemin par où vous les menés, lequel
semble avoir esté naïvement décrit en ces
vers,

*Quale per incertam lunam sub luce maligna,
Est iter in sylvis. C'est à dire,
Ainsi du flambeau de la nuit
Qui dans la forest entre luiët
Vne demi-clarté penetre
Jusqu'à l'œil du pauvre passant,
Puis va de son ombre effaçant
Le chemin où il pensoit estre.*

Harlequin adiousta,

*Et ainsi d'un pas incertain,
Qui n'aura rien de plus certain
Que nostre science profonde,
Sous la brillante obscurité
D'une tenebreuse clarté
Passera la forest du monde.*

Après cela le Docteur, en suite des preceptes
generaux, afin de s'acquitter entièrement de sa
commission, vint à l'hypothese, pour toucher ce
qui concernoit la France: & dit,

*Gallorum variant animi: variabitis artes.
Mille mali species, mille salutis erunt.*

DES PERES IESVITES. 163

C'est à dire,

*Les esprits des François, d'eux mesmes variables,
Monstrent comme il vous faut estre de tous me-
stiers,*

Au soir, bouffis de crime, estre mesconnoissables,

Reuenir au matin tout-saincts & tous entiers.

Mais le dernier & principal aduis que i'ai à vous donner, est que vous preniez garde de ne vous laisser emporter au contentement que les François reçoient en vous oyant faire des sermons en leur langue, & d'en apprenbre plus de vous en vne heure qu'ils n'auoyent fait en dix ans auparavant. Possible conclurroyent-ils de là que vous seriez capables de redorer l'Eglise des anciens Ornemens qu'auoit l'Eglise primitiue, & ramener le temps auquel il n'y auoit que la pieté & la doctrine qui autorisassent les premiers Euesques, mesmement à Rome siege de l'Empire. Si vous rencontrés de ces importuns, qui voulussent vous presser là dessus, desireux de voir osté le schisme qui est en l'Eglise, à l'honneur de celui auquel tout honneur appartient: Dites leur franchement, que telle premiere vie a fait place à celle d'aujourd'hui, laquelle est toute autre, toute nouuelle, & d'un nouveau lustre,

Qualiter Assyrios, renouans incendia nidos,

*Vna decem quoties secula vixit auis.
 Haud aliter veterem dimisit Roma senectam,
 Et sumpsit vultus praesidis ipsa sui.*

C'est à dire,

*On dit que le Phœnix laisse au bout de mil' ans
 En son bucher ardent sa caduque vieillesse,
 Et y prend (r' aiéuni) ses siècles renaissans
 Et vn estre nouueau pour celui qui le laisse.
 Ainsi Rome nouuelle & en murs & en mœurs
 A pris, en despouillant vne vieillesse sainte,
 De ses nouueaux Prelats les nouuelles humeurs,
 Qui de son premier estre ont la lumiere esteinte.*

Item,

*Simplicitas rudis ante fuit, nunc aurea Roma est
 Et magnas domiti possidet orbis opes.*

C'est à dire,

*L'Eglise à Rome estoit toute simple & naïue:
 Sous les diuines loix elle trembloit craintiue:
 Mais c'est elle auiourd'hui qui va faisant des loix,
 Qui des peuples pipez s'est acquis l'abondance,
 Et dont l'autorité à la pompe deuance
 Toute l'autorité & la pompe des Rois.*

Mais gardés vous bien de parler aux Catholiques de ceste premiere Antiquité-là ni en blanc ni en noir: ou de les vouloir ramener aux fondemens de la foy Chrestienne. De peur qu'estans vne fois conduits à la source ils ne voulussent

DES PERES IESVITES. 165

plus d'eau croupie , & laquelle est encore trou-
blée tous les iours de plus en plus,

Multum crede mihi, differt à fonte bibatur

Quæ fluit, an pigro, quæ fluit unda, lacu.

C'est à dire,

Ily a bien difference

De l'eau prise à sa naissance,

Ou son cristal va roulant

Dessus le caillou brillant:

Et de l'eau trouble baveuse

D'une mare limonneuse.

Au reste ne vous degoustés point voir que quâr
à present le tranquille Estat de la France ne vous
promet pas beaucoup de moyens d'y faire vos
affaires. Car vous deuës sçauoir que la France
n'apprehende aucunement, ne

Vulnus in antiquum redeat male firma cicatrix.

C'est à dire,

Que sa playe toute recente,

Que le temps va cicatrissant,

S'ouure derechef, & ressente

Le mal qui l'alloit aigrissant.

Aussi ai-ie ferme opinion que c'est de la France
qu'a entendu parler le Poete qui a dit,

Quàm iuuat insano pridem indulgere labori!

*Et quàm fluctus habent versântque in littore
venti!*

C'est à dire,

*Qui est en possession
De se mettre en action,
Pour se tourmenter soi-mesme,
Et penseroit auoir tort
De se tenir dans le port,
Auquel la bonté supreme
La mise à l'abry des flots,
Et dont elle auoit forclos
Les vents porteurs de l'orage:
Mais au lieu de s'y ranger
Elle attire son danger,
Et veut perir au riudage.*

Ne foyez point aussi en souci de crainte que la France ne trouue pas en vous ce qu'elle se pourroit bien promettre, & que vostre reputation lui fit esperer, lors qu'elle y alla faire vos logis. Car les François ont assez d'esprit & de discretion, pour recognoistre que comme toutes les institutions du monde ont leurs periodes, & en fin vont à l'Empire, il est bien raison que la vostre decline aussi: veu que c'est le propre des escoles, & que pour la vostre il y en a encore vne raison particuliere, c'est que,

*Vostre lampe se consume
Qui rend le monde sauant,
Reduit en petit volume*

Plus elle vient en auant.

-- Quantumque accedit ad annos

Fit minor, & spatio carpitur illa suo.

Au pis allèr vostre longue & desastree desconue-
nue vous seruiroit de suffisante & legitime ex-
cuse. Car il n'y auroit pas apparence de tirer v-
ne aussi grãde traiçte d'un cheual refait que d'un
cheual neuf: ni de se promettre autant de vos
Conuenticules, que des grands Conuents.

Et si ie respons, que les François ne vous mes-
priseront point pour tout cela, & ne vous feront
pas ce tort de mesurer la dignité de vostre In-
stitution au calcul de l'Antiquité, ou au denom-
brement des personnes qui en sont, au prix de
ce qui est en ces grandes & amples compagnies
collegiales, Cathedrales, & Claustrales, & ne sa-
muferont pas à compasser si le plan de vos Col-
leges equipolle à l'eschantillon de leurs grands
& hauts bastimens, & à leurs fondations si pro-
fondes. Mais au contraire ils prendront vostre
petit nombre & la petitesse de vos escoles pour
signe qu'il y doit auoir en vous quelque chose
de plus singulier.

Voyez vous pas qu'un grand nombre

Au grand desordre fait ombre?

Les grands bois aux grands brigands?

Au contraire dans les boittes,

*Plus basses & plus étroites,
On tient les meilleurs onguents.*

Moins faut-il que, vous ayez l'esprit perplex de crainte qu'à l'aduenir les François se refroidissent en vostre endroit, hôteux de la faute qu'ils font à présent de vous rappeler, laquelle il sembleroit que vostre presence leur deust reprocher, d'autant qu'ordinairement ceux pour lesquels on fait des fautes *quasi exprobrantes aspi-ciuntur*. Rien, rien de tout cela: car puis que les peuples à peine regardent le chemin qui est deuant leurs yeux, comment tourneroyent-ils la teste pour regarder celui qu'ils ont fait? Qui plus est, il y a tout plein de choses au monde qui sont honteuses, quand on les fait: & neantmoins agreeent estans faites,

Multa que quum fiunt turpia, facta placent.

Après tous ces beaux preceptes, & ces belles maximes pour donner bon courage à ces Messieurs nouvellement reuenus, Harlequin coustumier de parler pour les autres, voulut en peu de de mots respondre au Docteur pour messieurs les rappelés, & certifier la cōpagnie qu'ils n'auroient iamais manqué d'assurance: & dit d'une façon fort resoluë, --*famâmqe fouemus in anem,*

Et pudor omnis abest.

Partant monsieur le docteur c'est chose superflue

DES PERES IESVITES. 169

Aue de se trauailler à nous armer d'assurance
nous autres Rappelés.

Le Docteur reprenant la parole dit , Auec les
instructions que ie vien de vous donner , vous
pourrez, messieurs, tout doucement & sans bruit
espier la saison propre à replanter vostre bour-
don en France, pour y reuerdir : la saison, di-ie,
telle que la demandent tous ceux qui ont à
planter ou replanter quelque chose.

Dum sicca tellure licet, dum nubila pendent.

C'est à dire,

Quand ce terroir à sec du deluge passé,

Qui a plongé en deuil nos prouinces desertes,

D'un orage nouueau vous verrez menacé,

Et d'un nuage obscur nos campagnes couuertes.

Ainsi vostre sacrée Societé prendra bonnes &
fermes racines , & venant à estre arrousee gratis
de plusieurs benefices , s'escartera & s'estendra
en l'Eglise Catholique,

Aedibus in mediis totos amplexa Penates.

Lors le docteur fit place au Seigneur Pantalon,
lequel faisoit fort l'empesché, & qui commença
ainsi son propos , Messieurs , le principal est en-
cor à faire , puis que prouueu n'a esté à l'entrete-
nement des Rappelés , qui nous sont si chers : à
quoi necessairement il faut aduiser

De cauea fugiat ne malè pastus aper.

Il n'y auroit rien qui les nous ostant si tost que fil voyoyent que nous eussions laissé cet article en croupe. Car pour toute sorte de mocqueries, de honte, de reproches, ou accusations, ils n'en feroient que secouer les oreilles : mais faute de menestre, ils seroyent pour prédre parti & quitter le nostre. Ioint qu'il est plus que raisonnable de faire considération sur ce recommencement, auquel ils se trouueront sans doute despourueus de toutes choses : & leur conuiendra racherer, *libros, silentium*, & si les François estoient fages, *Auditores*

Audire gratis ista qui possint,

Et gratis reuoluere

Istarum tineas ineptiarum.

C'est à dire,

Qui aupres d'eux se viennent rendre,

Et pour neant vueillent apprendre

Vne science de neant.

Car de les remettre à faire comme ils faisoient autresfois, il ne se peut, tant à cause que le monde s'en va fort desniaisé en ceste France, parce aussi que feu sa Saincteté les renuoyant en France pour faire leurs affaires, leur dit expressement,

Disimulate tamen, nec prima fronte rapaces

Este: nouus viso casse resistet amans.

C'est à dire,

Mais allez vn peu escoutans,

Et diſſimulez pour vn temps

Ce courage plein de rapine:

De peur que vos nouueaux amis

Soyent de nouveau vos ennemis,

Euentans ſi toſt voſtre mine.

Il eſt donc queſtion de leur donner des biens, non pas pour tenir lieu de recompenſe (car cela ſeroit contraire à leur *gratis*) mais par forme d'anticipation, ou par maniere de prouiſion : & ſi ne faut pas donner tout aux vns, & rien aux autres : parce que la dignité de la perfection de ceſte Societé ſe diſtribue ſi eſgalement & ſi iuſtement ſur tous, que vous ne ſçauriez deuiner qui ſont ceux à qui il en faut le plus. Ioint que comme chacun ſçait, ils trauaillent tous à vn meſme prix fait:

Omnib. vna quies, operum labor omnibus vnus.

C'eſt à dire,

A tous ces bons Seigneurs-la

(Car l'ordre portoit cela)

Meſme charge fut baillee:

Et tous ſe repoſeront

Quand tous enſemble n'auront

Plus de beſongne taillee.

Et que ſon ne ſoit pas deſtourné de leur don-

ner des biens, par cet erreur populaire, que ces Messieurs ne veulent rien pour loyer de leur labeur. Ce fut vn bruit qu'on fit courir au commencement pour seruir de pipée : mais ils sont trop sages pour ne rien prendre.

Quid faciet sapiens? stultus quoque munere gaudet.

C'est à dire,

Si l'homme pour fol qu'il soit,

Ioyeux & content reçoit

Le present que l'on lui offre:

Sage au quatriesme degré

Ne prendra-il pas en gré

De le sçauoir en son coffre?

Le maistre des Ceremonies respondit , que si l'on parloit à ce commencement d'entrer en despenſe pour l'entretienement de ces Messieurs, qu'il estoit à craindre que le coust en fust perdre le gouſt aux François. Que c'estoit assez de leur dire en general, que la France est *Terra ingeniosa colenti*: que tout le monde y vit, les vns de leur labeur, les autres de celui d'autrui : que ceux qui ont de l'esprit y vivent paix & aise: qu'à plus forte raison le pourroyent faire ceux qui viennent pour donner de l'esprit aux autres, & pour rendre ce Royaume si spirituel, que le temporel ne soit rien au prix : leur faire voir qu'ils sont

DES PERES IESVITES. 173

maistres de la Compagnie: que la saison est belle,
la moisson preste, la nappe mise.

Cingenda est altis sepibus ista seges.

C'est à dire,

Ils n'ont qu'à faire une ceinture.

D'une bonne & haute closture

Autour d'un champ si plantureux.

Le Signor Pantalon repliqua, Vous ne considerez pas qu'il est infiniment à craindre, qu'ils ne soyent troublez en la moisson de ce champ, laquelle n'est encores qu'en herbe, s'il venoit à estre bien tost partagé: & que partage faisant les vniuersités de ce Royaume en prissent pour leur droit d'aïnesse la moitié, & le vol du chapon: & que sur l'autre moitié les seigneurs & gentils-hommes vinssent à trier ce qui leur en appartient en ligne directe ou collaterale, pour mettre tout cela dans le Magasin qui sert à remplir les compagnies de gens d'armes, & les rendre complètes, non seulement du nombre, mais aussi de la qualité requise, & de l'extraction dont nos Rois se sont tousiours bien trouuez. D'autre costé Messieurs de robbe longue pourroyent remonstrer qu'il est bien raison qu'ils laissent à leurs enfans leurs Estats qui leur sont si chers. Mais qu'ils n'en pourroyent iamais estre capables, les donnant à ceux qui n'enseignent

point de droit. Et finalement seroit à craindre que les marchands, qui ont le gain non seulement pour but, mais aussi pour occupation ordinaire, ayans veu par experience qu'il n'y a rien à gagner avec les Iesuites, aimassent mieux tenir leurs enfans dans leurs boutiques, que de faire de leurs esprits des boutiques à tenir le vuide de la theorie que les Iesuites y pourroyēt vuidier. le preuoy que nos Rappelez ne s'oseroient pas mocquer apres tout cela de la corneille d'Horace. Par ainsi ie conclus que sans plus de remise il y faut pouruoir, de peur que les François n'ayent gueres longue ioye de leur venue, & que ces messieurs les quittent tout à plat: aussi bien

Dedecet ingenuos tadia ferre sui.

C'est à dire,

*Quand au lieu où l'on s'est tenu,
On void qu'on n'est plus bien venu:
Tout homme ayant l'ame bien faite
Sans y auoir beaucoup songé
Prendra gentiment son congé,
Par quelque galante desfaite.*

Le maistre des Ceremonies repliqua, reposez vous sur moi de cela, Monsieur de ceans, mon ami. Il n'en viendra iamais faute. Car sans oster le mestier aux faiseurs d'almanachs pour

DES PERES IESVITES. 175

preuoir ou predire ce qu'on fera , ou qu'on ne ferapas en France , ie vous respon que ces mesfieurs les Reuenus auroyent assez de reuenu quand ils n'auroyent que leurs pratiques, *Bono vino suspensa est hederà.* mettre cela en doubte, seroit se desfier de leur industrie & capacité, comme l'on faisoit n'agueres de leur fidelité. Et n'avez vous pas veu avec combien de deuotion la France les a attendus , & avec combien d'impatience elle a porté ce retardement? Harlequin adiousta, Ils en seront plus recommandables de la moitié. *Maxima lenta mora est.* Sçauiez-vous comment la ieunesse se iettera entre leurs bras a corps perdu ! & puis il ne faut pas auoir peur qu'elle leur eschappe.

Non auis utiliter viscatis effugit alis.

C'est à dire,

*Si l'oiseau englué s'eschappe,
Ce qui n'arrine pas souuent,
Tousiours le gluan deceuant,
De ces bonnes plumes attrape.*

Pantalon fit derechef instance là dessus , remontrant qu'il auoit tousiours oui dire que c'estoit vne belle chose que la chasse , s'il n'y auoit tant de fautes , & que si les chasseurs ne viuoyent que de leur chasse , ils seroyent taillés de faire mauuaise chere , de ieusner bien souuent,

& faire quatre fois plus de quatre temps & de vigiles que les Papes n'en ont ordonné depuis quatre cens ans.

Le maistre des Ceremonies respondit , pour monstrier que ces Messieurs ne demeuroyent pas long temps inutiles,

Fit citò per multas prada petita manus.

C'est à dire,

*Quand plusieurs mains travaillent à l'enuie,
Pour mesme but & pour mesme butin,
Vn grand prix fait, n'est que pour vn matin.*

Quand ceste contestation eut prou duré, Harlequin ayant veu que le Signor Patalon son maistre n'estoit peu venir à bout de faire pouruoir ces Messieurs de quelque bonne assignation , il se presenta sur le Theatre, & dit, Si est-ce que si vous laissez les affaires descoufus comme cela, vous laisserez aussi ceste mauuaise opinion aux peuples , que ceste sainte, & (comme il appert par leur titre) ceste diuine *Societé* veut aller viure par la Frâce sur le commun, à la mode de ces troupes des Sarrafins ou Egyptiës, *O veramente come noi altri comedianti.* Je suis d'oc d'auis, quād ce ne seroit que *pro forma*, & pour contēter mon maistre, que messieurs les François desia tout accoustumés de contribuer à leur ruine , contribuent à l'entretènement de messieurs les reuenus.

Car

Car encor qu'ils soyēt assez souples & accorts,
pour s'accommoder à tout, comme fait le Ca-
meleon, ce seroit mal argumenter d'inferer qu'
ils viuront bien de l'air, puis que le Cameleon
en vit. Mais pour mettre les autres en train, ie
m'en vais leur faire part de ma dexterité & de
tout ce que j'ay appris au monde par mes iour-
nees, pour leur donner les moyens de faire bien
leurs affaires en France.

Qu'ils reprennent d'un costé

Ce que l'on auoit osté

A leur brigade proscrire:

Puis ce qu'ils deuineront

Que d'autres leur donneront

Pour releuer leur marmite.

Qu'ils s'en aillent deuorant

Quelque vieillart ignorant

Les beaux traits de leurs parrasses,

L'ayant long temps galoppé

Et en fin bien attrappé

Par leurs gentilles agraffes.

Si pour le malheur du temps

Ils n'estoyent encor contens

De ce qu'en France on peut faire

Je croy qu'ils auront tousiours

Pour un notable secours

L'Espagne leur tributaire.

*Qu'ils en prennent sur les Rois,
Entreprennent sur les loix,
Et sur les bons benefices.*

*Il est temps que les premiers
Facent place à ces derniers
Plus riches en artifices.*

Pour en trouuer le chemin,

*Qu'ils parlent à Bellarmin,
C'est lui qui en tient registre.*

Il leur dira comme il faut

Faire naistre de plain saut.

Vn Cardinal d'un Belistre.

S'il n'ont assez de cela,

Mon maistre au partir de là,

Fera pour eux vne quête.

Et de plus, qui l'en priera,

Pour la porter, fournira

D'une bonne grosse beste.

Et pour ne m'espargner pas,

Quand j'aurai pris mes repas,

Je leur donnerai ma place,

De mon conseil vn petit,

Vn peu de mon appetit,

Vn peu de ma bonne grace.

*Tout le monde trouua qu'il en auoit eu ceste
fois la, & encor plus lors qu'il se mit à chercher
vn Procureur, pour faire insinuer la presente do-*

nation .Mais le maistre des Ceremonies ayant pris de pres garde à son discours, & remarqué entre autres choses comme il s'estoit auancé d'égager son maistre à faire vne queste pour ces Messieurs les rapeliez: il se figura qu'il n'auoit pas mis cela en auant sans lui en auoir ouy parler, & que peut estre en recerchoit-il la commission. Il le voulut donc sauoir de lui mesmes. Mais le signor Pantalon lui fit responce, Quand i'aurois toutes les volonteze du monde, ie ne saurois par ou commencer, & si i'aurois peur qu'on se moquast de moi: & que les François me dissent, qu'il faut bien que sa saincteté soit de loisir de s'estre tant donné de peine pour fournir la France de meschans petits magisters, & moi d'estre leur pouruoyeur.

Le maistre des Ceremonies repliqua, Lors qu'il vous plaira, signor Pantalone, en prendre la peine, pour bien commencer il vous faudroit faire cet honneur à Messieurs du Clergé, (comme au premier Ordre) de vous en adresser à eux: & leur dire franchement que ce que vous en faites n'est pas pour des petits Regents, mais pour les *maistins qui gardent le troupeau*. Or comme vous voyez qu'ordinairement vn lourdaux, & qui sait bien qu'on le tient pour tel, est plus messiant qu'un autre, Pantalôn lui respondit qu'il

se garderoit tresbien de leur aller faire ceste harangue la: & qu'il aimerot autant leur aller dire, Messieurs, qui estes deuenus muets, donnez vostre bien & vostre place à d'autres qui parleront pour vous. Ou bien: Messieurs, de qui la science est sans zele & le zele sans science, achetez-ende ceux qui en ont. Qui leur iroit faire ces discours, trouueroit, à mon aduis, que ces muets la frapperoyent comme des sourds. Et auroyent raison; car quand vous iriez au bout du monde, vous ne sauriez trouuer vn plus outrageux sarcasme, pour les rendre contemptibles: veu que chacun sçait bien qu'un homme d'Eglise, sans bouche, sans zele, sans science est,

Vt sine gramine campus,

Vt sine fronde frutex, vt sine crine caput.

C'est à dire,

Ainsi qu'un pré sans verd, sans rameaux, vn bocage,

Vn test que la verole a laissé sans pelage.

Je vous dirai. (dit le maistre des Ceremonies) vous n'avez que faire de leur en dire autre chose, sinon que ces Messieurs les Reuenus sont les aureilliers, sur lesquels se repose le Chef de l'Eglise.

Pantalon continuant en ses apprehensions dit qu'il auroit peur que l'on lui reprochast que

DES PERES IESVITES. 181

l'Eglise n'auoit iamais dormi d'un bon sommeil depuis qu'elle s'estoit voulu reposer là dessus: & qu'à l'aduenir il n'y auoit point d'apparence non plus, qu'elle trouuaſt du repos dans l'inquietude meſmes. Qu'il n'y a rien de ſi inquiet que ces gens-ci. Que toutes les parties du monde en fauent quelque choſe, & la France plus que toutes les autres enſemble, où il n'y a rien eu de trop grand, de trop ſainct, de trop chaud, de trop peſant pour eux. Teſmoins les vers qui ont eſté faits ſur ce ſubiect:

Scilicet omne ſacrum ſecta importuna proſanat,

Regibus obſcuras iniicit illa manus.

Auſa nihil tale eſt cælo dum uixit Ibero.

Postquàm inter nos eſt, plus feritatis habet.

C'eſt à dire,

Auſi bien ceſte ſecte importune & marrane,

Ce qui nous eſt ſacré tient pour eſtre profane,

Et leur main contemptible oſe attaquer les Rois,

Non pas dedàs l'Eſpagne en l'air de leur naiſſance:

Leur grande cruauté naſquit dedans la France,

Pour eſtre acquiſe en propre à Meſſieurs les

Francçois.

Le maiſtre des Ceremonies trouua encor vn autre expedient pour le Seigneur Pantalón, qui fut, dites leur que ces Meſſieurs ſont de requeſte afin de combattre pour la Foy. Mais Pantalón,

apres vne grande exclamation repliqua, Encore pis: car ie n'en aurois pas plustost ouuert la bouche, qu'ils me demanderoient,

An sit in infida proditione Fides?

C'est à dire,

Feroit on croire à la France

Que dans L'INFIDELITE,

La Foy pour sa demeurence

Eust pris logis arresté?

Ou, comme il se trouue en France des gens plus courtois, ceux qui me voudroient parler plus gracieusement, me diroient que ie prendrois trop de peine de la moitié pour des rapelez

Qui non sunt tanti, superantque pericula causam.

C'est à dire

Qu'ils n'en valent pas la peine.

Car leur presence rameine

Sur nous un danger present

D'un desastre tout recent.

T'aurois beau repartir pour eux: Ils fauent faire ceci: Ils fauent desfaire cela. Ie preuoy bien qu'ils me fermeront la bouche, & me diront,

Scire piget post tale decus quid fecerit ante,

Quam vidi satis est hanc mihi nosse manum.

C'est à dire:

Ce seroit un vrai badinage

De plus en aller au deuin.

Car sans en sauoir d'auantage

On voit bien s'ils ont bonne main.

Quand le Docteur vit que le Seigneur Pantalou trouuoit tant de difficultez en son chemin, il dit que Messieurs les rappelez n'en trouueroyent pas tant, où s'ils les trouuoient, qu'ils sauroient bien brosser legerement par dessus, sans faire semblant de rien. Ils en ont bien veu d'autres. Puis en fait de queste y a-il gens au monde qui en sachent à eux? Ils tonnent: ils estonnent: ils testonnent ces pauures consciences,

Et caligantes nigrâ formidine mentes,

C'est à dire,

On les voit ainsi dominans

Les esprits qui vont taſtonnans,

Et ſillez d'une noire crainte

Cerchent dans la terre les cieux,

Attandans de l'homme des yeux

Et clarté d'une lampe eſteinte.

Si bien & si beau que les ames eslourdies, & les consciences effarouchees, sont les fondemens de toutes leurs fondations & les piliers de tous leurs Colleges. Et de là vient (à mon aduis) qu'ils sont si conscientieux. Ne vous en donnez donc point de peine: car ils scauent bien attirer les cœurs du peuple & toute la petite marmaille d'un pays. Harlequin aiousta, *Nidifq; loquacibus escas.*

Sur toutes ces contestations, l'arrest en fut donné en peu de mots, par celui que je vous ai dit avoir fait le prologue. Car il se presenta sur le theatre, & s'adressant à messieurs les Rappelez, dit
Si bonnes es, casu viueres, Sexte, potes.

C'est à dire,

Si tu sers bien ton quartier,

Si tu fais bien ton mestier,

Si tu fais bien la gambite,

Si tu as l'entendement

D'exposer bien promptement

L'escriture non escrite:

Si tu la fais mignarder,

Si tu la fais bien farder,

Si tu la rends bien polie,

Son visage bien lissé,

Et son manteau bien plissé.

Et sa grace bien iolie:

Si tu oses soutenir

Que l'on ne doit pas tenir

Pour seul escrit Authentique

Le liure ou du Souuerain

Reluit la tracante main

Et le burin magnifique:

Si tu es si suffisant

De le dire insuffisant

Pour guider l'ame Fidele

Qui

Qui ne mettroit quand & lui

Pour lui servir d'un appui

Quelque chose plus nouvelle:

Puis si monté de degré

Parlant aux grands à leur gré,

Tu leur dis des fariboles:

Et sans estre descouvert

Si tu les fers à connert,

Sous vn voile de paroles:

Si tu es bon à cela

Pour peu qu'au partir delà

Tu faces naistre d'esmeutes:

Tu peux, tout en deuissant,

Et le peuples abusant,

Bien viure de chappes cheutes.

Après cela les personnages comencèrent à se retirer pour le dernier Acte de ceste histoire. Je croy que pour la longueur du precedent, les Musiciens s'estoyent endormis: au moyen dequoy le Seigneur Pantalō qui faisoit la retraite, retint le Docteur pour faire obseruer la bien-sceance. Et en attendant la Musique, lui fit ceste question. Je vien d'ouïr parler de ie ne sçay quelle Escriture non escrite, *Che cosa é questa, signor Dottour?*

Le Docteur respondit, qu'à regarder de loin, il seroit bien malaisé à vn homme qui ne voit pas bien sans lunettes de discerner ce que ce peut e-

stre. Mais ie vous diray en vn mot, que ce sont tous ces grands volumes, dās lesquels les saincts Peres ont fait grossoyer leurs Canons, decrets & ordonnances, sauf à leurs successeurs le droit qui leur est reseruē *vsque in infinitum*, de les amplifier, multiplier, enrichir, enchasser, enluminer, suspendre, casser, bretauder, ou authentifier, selon qu'il sera trouuē à propos pour le bien & vtilité du sainct Siege. Or toutes ces besongnes la tant visibles qu'inuisibles, c'est à dire tant faites qu'à faire sont appellees escriture non escrite, *ad differentiam* de L E S C R I T V R E, ainsi appellee par excellence comme la reigle celeste & parfaicte, laquelle ne se ploye pas aux intentions & inuentions des hommes. Au lieu que celle dont il est question, s'y agence & s'y accommode tous les iours. Comme qui diroit, *scriptura nondum scripta*: Encor que le commencement en soit beau & grand. Mais puis que saincte mere Eglise Romaine doit estre visiblement triomphante iusqu'à la fin du monde: il faut presumer qu'elle fera iusques à la fin du monde, ses ordōnances ses Escritures, & tiendra registre de ses volonte. Tellement que s'il vient à point, il en reste encor plus à faire & a escrire, qu'il n'y en a de fait ou descrit.

Basta, basta, repart le seigneur Pantalon: Mais

DES PERES IESVITES. 187

dites moy, de grace, ces Messieurs nouvellement rappelez, & introduis, ces regents sans regence, ces ambitieux sans honneur, ces brouillons apres la sedition, ces sourdines en temps de paix, qui commencent à mettre ainsi leurs affiches pour amasser les petits enfans, n'est-ce que pour leur monstrier à lire, à entendre, & à croire ceste Escriture non escrite?

Le Docteur lui respondit, signor Pantalone, il ne disent pas ainsi publiquement ce qu'ils veulent faire : mesmes ie croy qu'ils trouueroyent mauuais qui le leur demanderoit ainsi naïfvement. Mais la Musique m'empescha d'entendre d'auantage de leurs discours.

Après vous eussiez veu reuenir sur le Theatre, d'un pas precipité le maistre des Ceremonies, ayant vn paquet de lettres en sa main, & se faisant suyure au Courrier de Rome, qui en auoit esté le porteur. D'abord il dit à toute l'assistance, Messieurs, ie suis reuenu pour vous faire part *gratis* d'une grande nouuelle. Or afin qu'elle vous soit plus intelligible vous deuez sçauoir que la France ne sceut aualler la douceur de la paix, qu'au prealable elle n'eust vomi de son sein Messieurs les Rappelez, que lors on appeloit

Faiseurs de coups du Ciel. Et que ce poison ne fut pas plustost hors de ses veines, qu'asseuree de son repos elle en fit dresser vn trophée: & deuant la grand'porte du Palais, eriger vne Pyramide, pour dire à la posterité combien elle se sentoît glorieuse & triomphante de s'estre deffaitte de ceux qui auoyent cuidé deffaire le Roy & le Royaume. Depuis pour les grandes raisons, que vous auez entendues, ils ont esté rappelez. Mais (comme ils sont subiects à aller & venir souuent ça & là) passans sur le pont saint Michel, ils se trouuoient moult scandalizez de ceste Pyramide, en laquelle ils se voyent comme executez en effigie: leurs Iuges pres de là, dès sergens aux aduenues: en somme tout cela n'alloit point bien. Or ie vous apprens, Messieurs, que ceste magnifique Pyramide là, qui faisoit ainsi la sentinelle au deuant du Palais, a eu la teste tranchée, & que son corps a esté mis en quatre quartiers.

Le Docteur faisant fort l'estonné de ceste nouuelle, demandoit s'il y auoit point dans le paquet le decret, en execution duquel la Pyramide s'en estoit ainsi allée. Mais le maistre des Ceremonies, apres auoir fouillé entre ses lettres, n'en trouua autre chose que ces deux vers écrits en lettre Romaine,

Tollite Pyramidis molem, nec querite causam,

Indicta causâ pulsus & Ordo fuit.

Après les auoir leus, en retournant son papier, il trouua au dos, escrits en lettre François-
se ceux-ci,

Publica supplicij pœna est: nec querite causam.

Regius ecce dolor publica causa fuit.

Iusta sed illa fuit: nec enim lex iustior vlla est,

Quàm necis artifices arte perire sua.

Deuotoque animos inueni turba ista ministrans.

Ipsa necis causam prœbuit: ille manum.

Le Docteur demanda derechef si cela auoit esté bien soudainement despeché. Le messager respond, que celâ fut fait du soir au lendemain: & que le soir, que la nouuelle en vint, vous eussiez vëu vne infinité de personnes estonnees, demander d'où pouuoit venir vne si prompte ruine à vn bastiment tout neuf & tout massif?

Est-ce par faute de ciment,

Ou faute de bon fondement,

Ou faute de bonne matiere,

Ou faute de l'artiste main,

Que doit trebucher dans demain

La Pyramide toute entiere?

*Ou faute d'auoir esleué
Vne croix sur l'œuvre acheué,
Pour faire signe à nostre France,
Qu'elle se remet sous la croix:
Et rompt en renuersant ses loix,
Le sommeil d'un heureux silence?*

*Ou par ce qu'en France on desfait
Ce que la France a de mienx fait?
Où que l'on n'y tient plus de compte
Du bien, quand le mal est passé,
Du mal quand le bien entasse
L'esperance humaine surmonte?*

Or d'autant qu'en tout ce dernier Acte il n'y en auoit que pour ceux qui diroyent des nouuelles, Harlequin ne se voulant pas desmentir sur la fin, alla changer d'habit, & prendre vne Roupille à l'Espagnole avec la gibbeciere, les bottes & les esperons de son Maistre: & en cet equippage entra d'un pas precipité au theatre, & dit, Messieurs, pour sauoir bien des nouuelles de tout le faict dont il est question depuis le commencement iusqu'au renuersement, il faut parler à moy: *Qui non solum interfui rebus, verum etiam præsui.* Il faut donc que vous sachiez, qu'au commencement que nous parlâmes de ce malefique reſtablissement, les

François s'en mocquoyent, & si je vous promets qu'il leur sembloit que nous nous mocquions du monde, & n'auions pris ce prix fait que par con-
 tenance: comme fait mon maistre son curedent
 apres disner. Ils nous demandoient, si nous
 estions tousiours apres nostre mouuement per-
 petuel. Mais, comme sans faire semblant de
 rien, fines gens se mesloyent de nos affaires,
 Nous leur fismes bien cognoistre que nous ne
 nous mocquions mie: & deslors ils s'empesche-
 rent en toutes façons pour nous en empescher.
 Estoyent ils quatre ou cinq ensemble? ils fai-
 soient force Arrests contre nos pauvres Rapel-
 lez. Mais par ce qu'ils n'estoyent pas nombre on
 ne les a tenus que pour des Arrestes. d'autant que
 les effects sont masles, & les paroles sont femel-
 les, comme disent les Gascons. Ils nous ont
 donc arresté pour vn temps en beau chemin,
 toutesfois ce n'estoit qu'en attendant le beau
 temps, qui nous deuoit amener ces Roses. Si
 vous dirai-je bien qu'il y en auoit d'autres plus
 péneux que nous: quand ce ne seroyent que ces
 pauvres Picards de Compiègne & de saint
 Quintin, qui disoyent en leur langage les vns
 aux autres, Agamen ami! Comment ferons
 nous pour garder nostre Roy de tant de maistres
 passez! Il ne faut qu'un de leurs nouices pour

faire vn meschant coup ! Et le moyen de le garder de ceux qui veulent bien mourir pour le tuer,

Animâsque in vulnere ponunt:

C'est à dire,

*Et qui ont si belle enuie
De pouuoir les Rois blesser
Que leurs couteaux & leur vie
Ils sont contens d'y laisser?*

Et quand nous fusmes en Normandie, nous entendions ces Messieurs de Dieppe & de Caen, qui d'un rude langage se faschoient que ce grand Roy mesprisé avec plus de generosité qu'ils ne voudroyent, les dangers qui regardent sa personne, apres auoir tant monstré la grandeur de son courage & de sa prudence à tirer la France hors de danger, nous disoyent,

*Nunquam tardatus casu neque territatus heros,
Ecce alius cauit, non cauet ipse sibi.*

De mesmes quand nous fusmes à Langres & à nostre retour à Clermont en Auvergne, ces bonnes villes qui ont esté Realistes *per omnes casus*, & ausquelles les troubles n'ont iamais troublé la pure fidelité des Citoyens ; voire qui ont tant serui à y ramener des Prouinces entieres:

Les

DES PERES IESVITES. 193

Les vns oyans parler de nostre ioyeux reſta-
blement, nous diſoyent, hauſſant les eſpaules,

Et qui ſanauit vulnera, vulnus habet.

Les autres nous diſoyent en bon Auuergnat,
que les mouuemens de tant d'eſprits viſiblemēt
diaboliques & diaboliquement inuiſibles, iuſ-
ques aux funeſtes effets qu'ils produiſent, ne ſe
gouuernent pas par les reſſorts de belles pro-
meſſes & de bonnes remonſtrances, ni par les
contrepoids de ſerieuſes menaces. Que l'on ne
ſauroit apporter trop de prudence à ſen garder.
Que les coniectures & les eſperances doiuent
faire ſilence, quand l'experience parle: Si ce n'eſt
que nous fuſſions ſi barbares de vouloir que la
face des Rois de France ſoit deſormais la pierre
de touche pour eſprouuer ceſte nouuelle mon-
noye. Et puis ils diſoyent en ſeſciant,

Longa procul longis via diuidat inuia terris.

C'eſt à dire,

Qu'une longue longue voye

Les porte ſi loin ſi loin,

Que plus la France n'en voye

La monnoye ni le coin.

Quoi qu'ils ſçeuffent dire, ie ne demeurai pas
muet entre ces gens là. Au contraire, j'entre-
pris de leur faire croire par viues raiſons, qu'ils
ne voyoyent goutte aux affaires du monde: &

que le vrai moyen pour mettre les Rois de France *tutò abutris viperis*, estoit de les reſtablir (neantmoins avec les aſtrictions, reſtrictions & clauſes opportunes) & ſur tout leur donner au pluſtoſt que faire ſe pourroit, ſuiet d'oublier la memoire de leur exil, d'autant que,

Qualibet extinctos iniuria ſuſcitāt ignes.

Ils repartoyent que remettre ainſi ces gens aux quatre coings & au milieu de la France avec ces reſtrictions,

C'eſt aualler force poiſon,

Pour faire apres l'experience

Des effets d'un contrepoiſon,

Aux deſpens du corps de la France.

Mais ie ne me faſchois pas tant de leur reſponſe, que du mauuais vin que ces Royalites nous faiſoyent boire en ceſte Auuergne de ie ne ſçay quel gouſt deſagreable, & qui ſentoit ſa queuë de Renard. Ie m'aduifai de taſcher à leur complaire, afin d'en auoir du meilleur, & neātmoins faire tout en riant nos affaires. Ie leur diſ donc, qu'il ne faloit pas qu'ils ſen miſſent en peine: d'autant que ce reſtabliſſemēt qui ſe faiſoit ainſi general par toute la France n'eſtoit que pour la guerir de ceſte maladie epidemique, qui l'auoit portée à repeter les Ieſuites, & les appeter d'un appetit ſi deſreiglé, afin d'en faire paſſer pour vn

DES PERES IESVITES. 195

bon coup la fantasie aux François, leur en donnant tout leur saoul pour les leur faire haïr par après: suivant cet Aphorisme,

Tadia quare mali, faciunt & tadia finem.

C'est à dire,

Saoulez vous en insqu'à la gorge,

Qu'il en faille ouvrir le pourpoint.

Bien souvent quand le mal regorge,

C'est alors que l'on n'en veut point.

Regle ou precepte lequel *noi altri Dottori Italiani* pratiquons si heureusement à l'endroit de tant de ieunes solastres gentilshommes François. Pour les retirer du vice & du luxe, nous les en gorgeons, nous les en chargeons, & puis les renuoyons en France pleins de retenue.

Le maistre des Ceremonies adiousta, *supplé* verole, & rompit le propos à Harlequin, voyant qu'il commençoit à s'extrauaguer: & que sorti des nouvelles escoles qu'on veut dresser en France, il estoit entré en celles qui sont de longue main dressées en Italie. Et à l'instant fit auancer le Courrier, pour en dire à la compagnie des nouvelles plus fraïches. Mais ce pouure Courrier, qui n'estoit pas accoustumé de parler en public, pour trouuer moyen d'eschapper de là, assëura la compagnie, que le magnifique Harlequin auoit fort bien dit iusques là: de fait qu'il

auoit en toutes les peines du monde à mettre en la teste à ces pauures bons Francois que mesieurs les Iesuites eussent esté veritablement appellés, mesmes qu'aucuns festoyent figuré, vn temps fut, que les Appels estoient generalemēt defendus en France sous grandes peines, afin que personne, n'appellast les Iesuites. D'autant que par le moyen de tels Appeaux ou Rappeaux on voyoit tous les iours la plus genereuse partie du sang François se perdre miserablement. Mais qu'en fin ils auoyent esté induits à le croire, voyans d'un costé qu'on bastissoit pour eux fort & ferme: & d'ailleurs qu'en leur faueur on auoit desbasti le Mausolée des reliques de la ligue. Au surplus qu'on trouueroit dans son paquet les discours que l'on fait là dessus en France, protestant pour son regard qu'il pensoit auoir aussi bien gagné à boire que les maçons qui y auoyent trauaillé.

Ainsi qu'il commençoit à esquiuer, le maistre des Ceremonies donna au docteur le paquet, pour en faire lecture. Et vous noterez qu'apres la lecture de quelques missiues, contenant la verité du fait, comme les Italiens aiment les nouuelles de discours, on leur auoit representé en demi feuille de papier ce que la France auoit dit à celui qui vint destruire la Pyramide, & i'en

DES PERES IESVITES. 197

voulus auoir vne copie pour la faire voir vn iour à mes amis: dont la teneur fensuit:

Abstine manum: quid moliris? molem hanc amoliri, perduelis est. Solum Tempus, quod rerum edax, in marmorea ius obtinet. Hac vero nouissima durissimaque sacrosancto azylo deposita, in hominum luce locata, Regie salutis & incolumitati publicæ dedicata, salus ipsa seruat, si nescis. Quatuor hæ tabule cum vestituris basium eodem illo cimento adunatae sunt, quod Gallorum animos antè distractos feliciter adglutinat. Ergo hoc opus retexere, atque istos male feriatos reos absoluerè, felicem hunc nexum, soluere est. Eâ si restitisti gratiâ, te male perdat is qui REGEM & REGNUM vsque tutatus est, qui que infelicem perduellium colligatorum nexum diremit ac perdidit. Sin autem hoc tantum operam das ut parricidij notam Senatusconsulto inuistam olim expungas, nihil agis, quinimo notam magis hanc totam relinquis, nostris, exteris, posteris. Hoc promoues, qui PYRAMIDEM amoues. Etenim si muta hæc materia mutari, ac (si lubet) motari potest, formamque ipsa triumphalis deformari: Rerum certe formam nunquam dirues, tamen si totus irruas. Factum infectum fieri nequit: seuire in hominum iudicia nemo possit. Nedum quispiam mortalium summa DEI in summum Principem beneficia terrâ marique promulgata deleat aut supprimat. Nedum secta quæ toto or-

be diuagatur immane scelus audeat, toto orbe male non audiat. Calatum hoc Marmor calari amplius non potest, eius structuram, & verò destrutturam MEMORIA suo sibi iure vendicat: illam Diuini beneficij, hanc nostra inconstantia monumentū. Quippe sculptores ea sibi habet, & radios, & tabulas immortales. VERVM hac DIVA custos huiusce Palatij, Palladium Regno seruando cœlitus demissum, diuina Maiestatis & regia dignitatis fulgore coruscans, queritur hac ruinâ inuersas vices, euersas ceruices sibi. Adeoq; aduenienti tibi & cum ferro circumstanti visa modò dicere, VENTREM PERI. At noctem tuo crimini obiice, ne videam (inquit) ne videar: potius deletos dolore vultus eodem velo obnubam. Enim-verò ut hac signa hac Rei restituta augusta insignia in mea gloria luce ac splendore extracta sunt: Sic tua diruentis opera tenebrarum operiri latebras debuerunt. Nisi ita feres habet, ut non solum victas gentes alienis legibus viuere, sed etiam inuictos reges sacrilega tyrannidi aperto cœlo fasces submittere necesse sit. Ce sont les mots de la France.

Or comme toute ceste despesche estoit pour donner du contentement à l'Italie lui faisant sauoir les mescontentemens de la France, pour la plus agreable nouuelle qu'on y eust sçeu apporter: celui qui auoit fait le paquet festoit estu-

DES PERES IESVITES. 199

dié non seulement de monstrier le desplaisir present des François, mais aussi les estranges & melancholiques apprehensions qu'ils se donnent, pronostiquans de mauuais & funestes presages, & de l'instruction des Iesuites, & de la destruction de la Pyramide. Je n'ai pas voulu oublier certains vers Latins faits pour cela.

*Tempore quo Franci Maiestas lesa Senatus,
Et Legum temeratus honos, resoluta salutis
Vincula praeipiti damnarunt sceptrum ruina,
Quo belli flabra, haec bruti noua numina seclum
Incubuerunt iterum rebus, tentare parata*

*Si postliminio possent noua texere damna,
Perdere victorem, Regnumque volubilis axe
Sistere compositis Romanas fraudibus arces:*

*Tunc quoque Pyramidis moles (mirabile dictum)
IUSTITIÆ trepidauit opus, noua machina facta
est.*

Præda reis, decus exulibus, noua victima victis.

*O ciues, ciues, sic sic monumenta triumphum
Antiquata noui: veterisque infamia culpa
Extat, & inficiet seros rediniua nepotes!*

C'est à dire,

Au temps qu'on renuerroit, en faueur des coupables,

*Des Souueraines Cours les Arrests venerables,
Que l'honneur violé de nos plus saintes loix,*

*Et que les arc-boutans des Royaumes paisibles
Abbatus ont laissé toutes choses possibles*

A qui voudra sapper la grandeur de nos Rois:

*Au temps que les soufflets de nos guerres dernie-
res,*

De ce siecle abruti les nouvelles lumieres,

(Dont la paix estouffoit le funeste flambeau)

Ont mis pour derechef Regenter en la France,

Vne impudente fin à leur honteux silence,

Vn nouveau fondement pour bastir son tombeau:

Que leur crime effacé, leur haine reprise,

On les vit renouer leur premiere entreprise,

Et leurs doctes desseins longuement meditez:

Pour voir si du debris d'un Estat qui chancelle

Ils pourroyent quelque iour faire vne Citadelle,

Dont leur Maistre tiendra nos Rois suppeditez:

En mesme temps aussi ce marbre dont IUSTICE

Graua de tous costez le sacré frontispice,

Tomba du contre-coup d'un tel estonnement,

Releua les vaincus par sa honteuse chute,

Et seruit de curee à la sanglante mente

Qui apres cet Estat abboye incessamment.

Ainsi, ainsi la Paix, la fille de Victoire,

Dont ce marbre monstroït la triomphante gloire,

Et le lustre nouveau d'une prosperité:

Au lieu de triompher en sa gloire naissante,

Des crimes enuieillis void la honte presente,

Honte

Honte qui flestrira nostre posterité.

Or faut-il remarquer que tandis que le Signor Dottour, le Signor Pantalon, & autres principaux personnages, estoient ainsi attentifs à la lecture de ce paquet le maistre des Ceremonies se dispoſoit à licentier la compagnie, & pour le faire *cum decoro*, c'est à dire avec grace & dignité, il cherchoit par tout les grands personnages dont les escholes des Iesuites ont honoré la Chrestienté: afin de les leur dōner pour escorte, & rendre par ce moyen leur reſtabliſſement plus fauorable & plus auguste. Mais le malheur fut qu'il ne ſ'en trouua vn ſeul: de sorte qu'apres auoir tourné la teſte çà & là, & d'vn œil plein de ſouci regardé de tous coſtés, reuenu a ſes compagnons: le me trouue (dit-il) encoꝛ plus empesché à la releuée que ie n'auois eſté en la ſeance, ne ſachant où prendre la compagnie que ie donneroie volōtiers à ces meſſieurs, afin de ne rien oublier aux complimēs neceſſaires à leur reſtabliſſement. Car, ni en la liſte des grands Iuriſconſultes, ni parmi les rangs des pilliers de l'Eſtat, ni en toute la ſuite du docte Galien, ie n'ai ſçeu recognoiſtre aucun homme de nom, qui ait eſté fait de la main de Meſſieurs nos Rappelés & Reuenus. Et cependant de les renuoyer ſans cela, i'en ferois conſcience.

Le Seigneur Pantalon lui demanda pourquoy il fen donnoit tant de peine ? Il respondit, *Perche ? non lo vedete , Signor Pantalone ?* C'est afin qu'au premier qui demandera que c'est que les Iesuites viennent faire en France , ils ayent leur response preste, *Qu'ils s'y tiennent pour y faire des grands personages :* Et que pour monstrier de-quoy , ils ayent a leur costé leur *Opus operatum*. Tellement qu'il en faut trouuer , n'en fust-il point, voire y deusse-ic brusler tous mes liures, *de Inuentione*: ou, pour auoir plustost fait, d'eusse ie (auec la permission de Pere Cotton) inserer dans ses questions a la demoniaque celles-ci. Que sont deuenus les excellens escholiers de ces Messieurs qui en sauoyent plus qu'eux ? A quel ieu nous les auons perdus ? S'ils ne sont pas venus en auant ? où ils sont demeurés à mi-chemin ? S'ils leur ont point enioint d'aller en Hongrie pour vn temps ? S'ils sont point encor parmi nous en habit dissimulé ? S'ils se sont rendus de leur Ordre , tellement que les Colleges des Iesuites ne soyent que pour faire des Iesuites ? Ou si leur instruction a cela de propre de ne faire honneur à personne ? Et si c'est point pour autant qu'ils donnent & distribuent les sciences selon la proportion Arithmetique, autant aux vns qu'aux autres. Et tout d'un train

ie m'informerai aussi, Si vne telle distribution est vtile en vn Estat , & dequoi leur Latin guerira tant de François?

Alors Harlequin fessança au milieu du Theatre tirant apres soi le Courrier (lequel il auoit retenu au passage, afin qu'il n'eust pas l'aduantage d'aller boire deuant que lui) & adressant sa parole au maistre des Ceremonies: Le porte(dit-il) sur mes espaules l'impatience de ce compagnon , qui m'a dit à l'oreille que vous y faites trop de façon de la moitié. Qu'il n'y a point de ieu là. Que ceste belle recefche de grands personages, peut estre, vous emportera iusques aux Indes, aux Moluques, au Royaume de la Chine, ou en celui des aueugles, auquel on dit que les borgnes sont Rois. Et cependant Messieurs les Rappelés, & moi, & mon yurongne de Courrier, aurions bel attendre. Mais voulez vous bien faire, & obseruer les loix de nos Comedies, qui veulent que tout le monde s'en aille content, laissez nous faire à nous deux ces derniers compliments. Puis se mettant sur vn port graue, avec vne démarche releuée: il dit, Defaut pur & simple contre ces grands personnages qui n'ont point comparu: & pour le profit d'icelui, dit a esté qu'eux & leurs successeurs n'auront à l'aduenir aucune part aux Colleges

des Iesuites, leurs appartenances & dependances. Et afin que leur absence ne laisse vn vuide ou vne bresche ou solution de continuité au corps de ceste sacrée Societé, Voici l'emplastre que nous y mettrons:

Recipe, garrulorum, friponatorum, grammaticulorum, ana manipulos sexcentos; Doctorum gregariorum & Gregoriorum (utrunque enim latinè dicitur) necnon cucullatorum minorum maiorumque syluam totam; Tubicinum, turbicinum, adulatorum, modulatorum, lenonum, sicariorum quot vsus tempusque postulabit: veneficiorum & beneficiorum Ecclesiasticorum, quantum satis.

Après ceste belle & leste ordonnance de la conduite & escorte qu'il donnoit à ces Messieurs (& laquelle on ne leur eust sceu honnestement refuser) il s'adressa à eux, & les licentiant, leur dit,

Exite, oppositas vicistis gurgite moles.

C'est à dire,

Vous auez rompu la digue

Qui bridait la pauvre ligue:

Sortez, sortez hardiment.

Allez vous-en regenter en France, & y bastissez de bons Colleges.

- quò vulgus ut olim

Conueniat, lapsis quesitum oracula rebus.

C'est à dire,

*Et qu'au lieu de vostre sejour,
Après quelque autre grand naufrage,
On voye nos peuples un iour,
S'en aller en pelerinage.*

*Et ravis par vostre sçavoir
Qui fait tant de nouveaux miracles,
Ne s'adresser pour mieux auoir,
Qu'à la bouche de vos oracles.*

Lors vous eussiez veu ceste sainte Societé s'es-
pardiller sur le theatre de la France, sy placer
aux quatre coins & au milieu, & en quelques
endroits iouer au bout hors. Cependant Harle-
quin dit à son Courrier, Tu nous as bien dit des
nouvelles de France, mais de Rome, rien. Quoi
donc ? & quelle contenance tient sa Sainteté,
specialemēt en ce recit de la-Pyramide de capit
escartelée, & du rapel des Compagnōs Loyoli-
tes? Alors le Courrier, grossissant & haussant sa
voix, respondit, Quelle contenance tient ce S.
Pere?

-- ridet hians immaane,

C'est à dire,

Il s'en gausse, il s'en rit à gorge desployee.

Surce Harlequin & le Courrier deslogent, &
s'en vont prendre le frais. Le maistre des Cere-
monies soudain introduit sur le Theatre, celui

qui auoit prononcé le prologue , afin de faire le *Plaudite*, & renuoyer la Compagnie , qui commençoit à se remuer, & faisoit la croix sur le dos des Rappelés , desia fort loin. Ce prologueur pour l'epilogue recita quelques vers Latins , où il parloit du deuoir de la noblesse, du peuple, & du Parlement , en la reception des Iesuites. Ne me souuenant pas bien des mots, la substance en fut comprise en quelques vers François, qui me furent donnés , & contiennent ce qui sensuit.

*Les Rappelez s'en vont, à la bonne heure,
Planter leur camp en leur douce demeure:*

*Afin qu'un iour ils remettent dessus
Leur ancienne & nouuelle Cabale.*

*Tout ira bien: car nostre chere Itale
Et nos amis n'y seront point deceus.*

*La Nation & Noblesse Françoisse
Peut deormais reposer paix & aise:
Nous lui rendons ce qu'elle auoit perdu:*

*Qu'un Loyolite un Loyolite attire,
Et leur troupeau se garde bien de rire,
Tant qu'on leur ait ce qu'ils cherchent rendu.*

*Claquent des mains les feu-François encore
A ce retour: les Rappelez on dore,
Et le Senat les parfume d'odeurs,
Pres du tombeau de seueres Iustice.
Bref France soit la muable tutrice,*

De ces benins & simples Commandeurs.

Il dit encor tout plein d'autres choses que mes compagnons ne peurent bien remarquer, ni moi non plus, à cause du bruit des gens qui rioient encore de ce Courrier, lequel auoit d'une grace Romanesque naïfvement contrefait le S. Pere avec son *hians immaane* : car le cri, la voix enrouée, la contenance & desmarche du courrier, auoit eu son poids tel, qu'il n'est possible le bien représenter de paroles. La foule s'esboula lors, & nous porta ribon ribaine loin du theatre, duquel voulans nous rapprocher tost apres, nous n'y trouuâmes, ni Docteur, ni Pantalon, ni Harlequin, ni Courrier, ni maistre des Ceremonies: mais seulement ie ne scai quel valet enleuant la tapisserie & tout le reste des pieces du theatre. Icelui enquis de nous de tel changement (car nous pensions qu'on continueroit quelques iours apres à nous représenter en vne autre Comedie l'entree & l'acueil des Rappelés en France) nous dit en son langage ces mots : Allez en vostre pays, voir le theatre que les Iesuites y dresseront pied à pied, qui les lairra faire. Et sans s'expliquer d'auantage nous plante-là. Ce qui fut cause de nostre retraite.

CVI MALVS EST NEMO, QVIS BONVS
ESSE POTEST?









